

YOWAN

Bingi Dook Mata Yo Yowan Iwode I

Betanga Iportak Le Iyei Tooltool

1 ¹Kulkulunu yege, ye kene yo Maro itar so nga le imot a pompombe tiao nga, ngan Betanga iyepe. Le Betanga tani in iye Maro tiyepe, inbe ya taunu in Maro. ²Le ye kene tani in nga, ngan Betanga iye Maro tiyepe. ³Ya in la dada ke so tina le imot yo Maro itar a pompombe nga. Le so sa yo pombe ye dada san mulu, ngan tiap. ⁴Inbe Betanga tani in yepongo dook mata ipa ye. Inbe yepongo dook mata tani, in la iyei ben sul a ilangarai di tooltool nga le imot i. ⁵Ngan sul tani, in ilangaraia ni yo todo lono i, inbe todo in taukan gurana yo be illosi nga.

⁶Kene atu in Maro iwanga tool atu a si pombe, in ene la Yowan i. ⁷Ya in isi be si iwetewete pang di tooltool ye sul tani, a be nen ngan di tooltool nga le imot tilongo betanga ki ngan titara lodi medana panga. ⁸Yowan ya taunu in sul tani in tiap. Bong ya in isi nga, ngan be si iwetewete pang di tooltool ye sul tani in leu. ⁹Ngan sul tani, in sul moolmool yo be isi tana a be si ilangarai di tooltool le imot i.

¹⁰Le Betanga in si iyepe la tana nga. Ya taun in dada ke so tina le imot yo Maro itar a pompombe nga, bong ngan le di tooltool ke tana i tikilala tiap. ¹¹Ngan be isi pang ye tana ki ya taunu, bong ngan di rara ki lodi ponana ye a be tikauu, ngan tiap. ¹²Bong di tooltool yo titara lodi medana panga a tikauu nga, ngan di la be imalum pang di a tiyei ben Maro di natunu nga. ¹³Ngan di tooltool tina yo be tiyei ben Maro di natunu nga, ngan pombe ye rara ke di tamadi le tinadi, too ye tool ke tana i sa lono, too ye dada ke di kerenge, ngan tiap, bong ye Maro ya taunu lono ngan la iyei di le tiyei ben di natunu nga.

¹⁴Ngan Betanga tani in iportak le iyei ben tooltool a si amye amyepe. Ya in lono pam mai san a iyei dada dook mata pam, inbe itoo dada

moolmool yo ke Maro nga. Inbe amkamata ben Tamana iyeie ene le ilo ete ke be di tooltool tipayiti ye, yesoo ya in Natunu ataleu.

¹⁵Yowan iwetewete pang di tooltool ye, le tina koonoo le mai nen. Iyei ne, “Tool tani, in tool yo muku ngan awete pang ye a ayei ne, ‘Tool atu yo be itoo au a ipa mur a isi i, in ene mai san le illosau, yesoo ye kene yo tipasui au ye tiao nga, ngan ya in iyepe mukot.”

¹⁶Dada ki yo be lono paidi mai san a iyei dada dook mata paidi ye nga, ngan ke be imot tiap. Ngan nen le iyei urata dook mata paidi le ikenen leu nen a tala. ¹⁷Moolmool, ger ke Maro ngan ipa ye Mose baene, bong dada yo be Maro lono paidi mai san a iyei urata dook mata paidi nga, inbe dada dook mata moolmool yo ki nga, ngan ipa ye Yesu Kirisi. ¹⁸Ngan idi nga tool sa ikamata touo Maro pitiap yege. Bong Maro Natunu ataleu yo iye tiyepe i, in ya la ipatnaia Maro pang di tooltool a lodi galanga ye i.

Yowan Yo Irriu Di Tooltool In Iwete Be Ya In Kirisi Tiap
(*Matiu 3:1-12; Maka 1:1-8; Luka 3:1-18*)

¹⁹Kene atu in di kuto maimai kidi Yuda yo tiyepe Yerusalem nga, ngan tiwanga di tooltool ke paroranga so pang Maro, tiye di rara ke Liwi yo tiyei urata bareme mai ke sungunu lono nga be la titoro Yowan be ya in sei. ²⁰Titoru, ngan le ipataukala tiap, bong iwete pobe pang di nen, “Au i Mesaia, tool yo Maro ipootoo be si ikap di tooltool ki a ipamulu di ye so dook tiap yo be igarung di i, in tiap.”^a

²¹Motong la titoru mulu nen, “Ngan ong i sei? Ong i Maro koonoo yo Ilia i, too?”

Ngan Yowan iyei ne, “Tiap.”

Motong la titoru mulu. Tiyei ne, “Ngan ong i o Maro koonoo yo amtar matamam ye be isi i, too?”

Ngan iraua torungu kidi nen, “Tiap.”

²²Motong la titoru mulu a tiyei ne, “Ngan ong i sei? Am nga lomam be kuwete ninong dook pam, a be nen ngan la amwete pang di tooltool yo tiwangam a amman nga. Ngan ong taum i kuwetong ye sei?”

²³Motong la Yowan iwete pang di ye betanga ke Maro koonoo Esai yo mukot ngan iwete nen,

“Au i tool atu yo kalongo kalngana ye ni sorrakene a iwete le koonoo maimai nen,

‘Kakarata dada le tarantatu pang Tool Mai be ipa ye.’”^b

²⁴Motong la di tooltool pattu yo di Paresi tiwanga di nga, ngan timan ²⁵le man titoro Yowan nen. Tiyei ne, “Ai, ngan ong i be Kirisi tiap, inbe

^a 1:20 Ngan betanga tani yo Mesaia i, in punu ben Kirisi, tool yo Maro ipootoo be si ikap di tooltool ki a ipamulu di ye so dook tiap yo be igarung di i. ^b 1:23 Esai 40:3

Ilia tiap, inbe Maro koonoo yo amtar matamam ye, in tiap nga, ngan nga yelei a le kurriu di tooltool nga?”

²⁶Motong la iraua betanga kidi nen, “Au i arriu di tooltool ye ran leu, bong tool atu yo nookoot man ikododo kataunu kiang i, in lomim galanga ye tiap. ²⁷Ya in tool tani yo be itoo au a ipa mur a isi i. Inbe ya in ene mai san, le au i akamatau ben au i tool dook mata ke be aloni ben poranga ki a aruwu ooroo ye loningi ke kene tiap.” ²⁸Ngan so tina nga pombe ye malala yo ene Betani i, inbe malala tani in iken ke ran Yodan koonoo kapala ye ni yo ke ipa ye a ise i. Ngan ye ni tani in la Yowan irriu di tooltool ye i.

Yesu In Sipsip Natunu Ke Maro

²⁹Tiyepe le nga bongbongini ki, motong la Yowan ikamata Yesu ipa a iman pang ye, le nga iyei ne, “Ai, kakamata! Sipsip Natunu Ke Maro yo isi be si imata a be nen ngan igiri noonoo kidi tooltool ke tana i, in la iman i! ³⁰Ya in tool tani yo muku ngan awete pang ye, a ayei ne, “Tool atu yo be itoo au a ipa mur a isi i, in ene mai san le illosau, yesoo ye kene yo tipasui au ye tiaoa nga, ngan ya in iyepe mukot.” ³¹Moolmool, muku ngan au tauk i lok galanga ye tiap. Bong ye punu yo nookoot ngan man arriu di tooltool ye ran in nga, ngan be nen a nen ngan di tooltool ke Isrel lodi galanga ye.”

³²Motong la Yowan isudungu betanga ki mulu a iwete nen, “Akamata Maro Amunu Silene iyege malala ke Maro a isi dawa ben bal utu le si iwot ye. ³³Ngan au i lok galanga ye tiap lapau, bong ngan tool yo iwangau be si arriu di tooltool ye ran i, in iso talngak nen, ‘Kumata le be kumata Amuk Silene isi le si iwot ye tool atu nga, ngan tool tani in la be irriu di tooltool ye Amuk Silene i.’ ³⁴Le akamata so tina yo nen ngan pombe pang ye, ngan la be awete pang nen: Ya in Maro Natunu moolmool.”

Yesu Di Galiunu Yo Ikap Di Muku Nga

³⁵Tiyepe a bongbongini ki, motong la Yowan iye di galiunu ru timulu a tila ye ni tani in mulu. ³⁶Inbe nga ikamata Yesu yo ipa a iman a ila nga, motong la iwete pang di nen, “Ai, kakamata! Sipsip Natunu ke Maro meneng, e ni!” ³⁷Ngan ye kene yo Yowan di galiunu ru ngan tilongo tina yo iwete nen ye in nga, ngan yaru timadit a tila le la titoo Yesu.

³⁸Motong la Yesu be iptak ngan ikamata di tina yo titoo nga, le nga itor di nen, “Ai, nga angru kasere soo so?”

Ngan yaru tikiui Yesu ye di Ibru koodi inbe tiyei ne, “Rabai, ngan kuyepe ngai?” (Ngan betanga yo “Rabai” in punu ben “Pannoongoo.”)

³⁹Motong la Yesu iraua betanga kidi nen, “Angru kaman a tala la kakamata.” Ngan ye kene tani in ke idu le so ben ke matana pai la yaru

tiye Yesu tila la tikamata ni tani yo iyepe ye i, inbe tiye tiyepe tiyepe le du bong.

⁴⁰Ngan di tooltool ru tina yo tilongo betanga ke Yowan a le titoo Yesu nga, ngan atu in Antares yo Simon Pita taini i. ⁴¹Ngan Antares tani in iyepe, motong la iyege Yesu inbe ila la isere toonoo Simon. Le nga isere a ipuske, motong la ikaua bingi panga nen, “Simon, am nga ampuske Mesaia.” (Ngan betanga yo “Mesaia” i, in punu ben “Kirisi.”) ⁴²Motong la ikauu a tila pang ye Yesu nga.

Ngan tila, le nga Yesu ikamata, motong la matan kenen ye, inbe iyei ne, “Ai, ong i Simon tani yo Yowan natunu i. Bong pang dama ni ngan ole tikiui em ye Sipas.” (Ngan ene yo Sipas i, in be tiportaki ngan punu ben Pita).

Yesu Ikiui Pilip Ye Nataniel Be Tiyei Ben Di Galiunu

⁴³Tiyepe a bongbongini ki, motong la Yesu lon kau urata be ila pang Galili. Le nga ilo ngan ipuske Pilip, motong la iwete panga nen, “Ai, kuman a man kutoo au.” ⁴⁴Ngan Pilip tani in iye Antares ye Pita ngan di ke malala yo ene Betsaida i. ⁴⁵Motong la Pilip ila be la isere Nataniel ngan ipuske, le nga iwete panga nen, “Am nga ampuske tool tani yo muku ngan Mose iwodo betanga ki lo ye Ger ke Maro i, inbe di Maro koonoo lapau tiwodo betanga ye i. Ya in Yesu ke Nasaret, inbe tamana la Yosep i.”

⁴⁶Bong ngan Nataniel imadit tina le iwete panga nen, “Ona tiap! Ai, Nasaret la o ke be so dook mata yo nen nga pombe ye i, too?”

Motong la Pilip iwete panga nen, “Kuman a tala la ong taum kumata ye matam.”

⁴⁷Ngan ye kene tani in Yesu ikamata Nataniel yo ipa a iman nga, le nga iyei ne, “Kakamata, tool yo ipa a iman i, in tool moolmool ke Isrel. Inbe ya ni dada yo ke kaplungunu ngan sa iken ye, ngan tiap.”

⁴⁸Yesu iwete nen, le nga Nataniel itoru. Iyei ne, “Ai, ngan ong i lom galanga yau belei?”

Motong la Yesu iraua betanga ki nen, “Ye kene yo Pilip koonoo pong ye tiao nga, ngan akamatong yo kuyepe ye kai yo tiwete ene ye pik i, in parmana nga.”

⁴⁹Motong la Nataniel iyei ne, “Pannoongoo, ong in Maro Natunu moolmool! Inbe ong in tool kuto mai yo be matam kala tana kidi Isrel le imot i!”

⁵⁰Motong la Yesu iwete panga nen, “Ngan ong in kutara lom medana pau nga, yesoo ye yo awete be akamatong kuyepe kai pik parmana nga, too? Awete pong nen, pang dama ni nga, ngan ole ayei urata maimai le illoso so yo nookoot kumata i.” ⁵¹Motong la Yesu iseke betanga ki a iwete pang di mulu nen, “Awete pang moolmool nen, pang dama ni nga,

ngan ole kakamata malala ke Maro koon panganga, inbe ole kakamata di bangabangana ke Maro be tipa a tilo be tisi ye Tool Moolmool ke Maro nga.”

Yesu Iportaka Ran Sokorai Le Iyei Ran Medana Yo Wain I

2 ¹Tiyepe le nga ke ru iman a ila le ye ke tol ki, motong la tiyeie mailang atu ke kerenge la malala mai Kana yo iken ye tana mai ke Galili i. Ngan Yesu tinana in ila nango la iyepe ye kerenge tani. ²Inbe Yesu iye di galiunu ngan tikiu di be tila ye kerenge tani in lapau. ³Le nga ye kene tani in, di tooltool yo tikiu di nga, ngan tikan be tiyin le le ran medana kidi yo wain nga, ngan imot. Motong la Yesu tinana iwete panga nen, “Ai, di tooltool nga timaka ye wain sa.”

⁴Ngan iraua betanga ki nen, “Atoo, tinak nga yelei be koom gautau a alo ye mailang i lapau nga? Lal kiau yo be ayei urata kiau ye i, in pombe tiao.”

⁵Motong la tinana iwete pang di kapraingi yo matadi kala kaningi ngan nen, “Kumata le be iwete pang ye soo so be kayeii nga, ngan kayeii leu.”

⁶Ngan rumu tani in bor ki somaimai limi be atu yo tikaata ye pat nga, ngan tikododo potai pang ye ni yo tiyepe ye i. Ngan bor tina ngan titar pang di Yuda be titoo momo kidi ngan tikap ran ki, a be nen ngan tingas so kidi le igalanga ye Maro matana. Inbe bor tina ngan atu atu nga, ngan ke be tipaling ran somai ilo ye.^c ⁷Motong la Yesu iwete pang di kapraingi tina nen, “Kapaling ran lo ye bor ngan.” Le nga tipaling ran lo ye bor tina ngan atu atu le lo iponen. ⁸Motong la iwete pang di nen, “Oo, kakut ran tina ngan pattu, inbe kakap pang tool mai yo matan kala mailang i.” Le nga tiyei ben tina yo iwete pang di nga.

⁹Motong la be tool mai tani in iyin touo, ngan ran tina ngan iportak a iyei wain oo. Le nga lon sarere ye wain nga tikap ngai, bong ngan di kapraingi yo tipaling ran nga, ngan di leu la lodi galanga ye nga. Motong la tool mai tani in ikiui tamoto yo be ikere i, in a iman pang ye man, ¹⁰iwete panga nen, “Ai, di tooltool le imot nga, ngan ole timalimi wain yo dook mata ngan pang di tooltool a tiyin muku. Le kumata be tiyin kaiye koot nga, ngan la be timalimi di ye wain yo ben nen be nga. Bong ong i kuyeii nen tiap, kupataukala wain yo dook mata ngan a iken le se nookoot yege, motong la kupapos nga.”

¹¹Ngan i mos tani yo Yesu iyeii kulkulunu yege a be nen ngan ya taunu ipaposi ben ya in Maro iyeie ene le ilo ete ke be di tooltool tipayiti ye. Ngan iyeii ye malala mai Kana yo iken ye tana mai ke Galili i. Inbe di

^c 2:6 Ngan bor somaimai tina ngan atu atu nga, ngan ke be tipaling ran somai ben 100 lira ilo ye.

galiunu tikamata, ngan le titara lodi medana ye. ¹²Ngan mailang ke kerenge tani in imot, motong la Yesu iye tinana le di taini inbe di galiunu tiyege malala mai tani a tidu pang Kapenam. Tidu, ngan le du tiyepe ye ke ben alunu kasin.

Yesu Inganga Di Tooltool Ke Yawaringi So Ye Bareme Mai Ke Sungunu
(*Matu 21:12-13; Maka 11:15-17; Luka 19:45-46*)

¹³Tidu tiyepe nango, le lo lal maiyoko kidi Yuda ke sungunu yo tiweta ye Paskimoolooningi ke Maro in potai be pombe, le nga Yesu ilo pang Yerusalem. ¹⁴Motong la ipa so a ilo koongoo lono ke bareme mai ke sungunu, ngan ikamata di tooltool yo tiyawar bulumakau le sipsip le man nga. Inbe ikamata di tooltool kapala lapau yo tiwurur ye kookoowoo kidi a tiraukol pat nga. ¹⁵Le nga ikap ooroo pattu a ipirak le dook mata pang salitingi di. Motong la inin di tooltool tina le imot tipa ye di sipsip le bulumakau kidi a tidu tana ye bareme mai ke sungunu. Inbe igirigiri pat ke di tooltool ke raukolingi pat ngan du tana, inbe ipaturtur kookoowoo kidi. ¹⁶Inbe ila la iwete pang di tooltool yo tiyawar man kidi ngan nen, “Kakap man kiang nga a kakoo ye ni! Nga yelei be kayeie rumu ke Tamak i, le iyei ben ni ke yawaringi so nga!”

¹⁷Ngan ye kene yo Yesu iyei nen ye in nga, ngan le di galiunu lodi tut ye betanga pattu yo iken ye Rau ke Maro nga. Ngan betanga tina ngan iwete nen, “Au i lok yo mai san ye rumu kiong i, in ikanene lok dawa ei ikanau nga.”^d

¹⁸Bong ngan di kuto maimai ke di Yuda tikamata tina yo iyei nen nga, le nga tiwete panga nen, “Ai, nga ole kuyeie soo mos be iyei ben tarkilanga pam, a be nen ngan amkamata ngan lomam galanga yong nen, be ong i Maro itarong la le kuyeie so yo nen ngan le imot nga?”

¹⁹Motong la Yesu iraua betanga kidi nen, “Kumata be kasua bareme mai ke sungunu i nga, ngan ole apatokode mulu ye ke tol.”

²⁰Yesu iwete nen, motong la di Yuda tiyei ne, “Ona tiap, bareme mai i tire ye rai sangaul pai inbe balana limi be atu, motong la imot nga. E nga yelei a kuwete be ole kupatokode mulu ye ke tol leu nga?” ²¹Bong bareme mai yo Yesu iwetewete ye i, in iwete ye ya taunu tinini. ²²Ngan nanga, ye kene yo imadit mulu ye ni ke matenge ye in nga, ngan le di galiunu tina lodi tutu betanga ki yo iweta i. Motong la titara lodi medana ye betanga yo iken ye Rau ke Maro nga, inbe ye betanga ki yo iweta i.

²³Le nga ye kene yo Yesu iyepe Yerusalem ye lal maiyoko ke di Yuda ke sungunu yo tiwete ene ye Paskimoolooningi ke Maro ye in nga, ngan di tooltool alunu kaiye tikamata mos tina yo iyei nga, le titara lodi medana panga. ²⁴Bong ngan Yesu matan ru di, yesoo lon galanga ye di tooltool

^d 2:17 Rau ke Woungu 69:9

tina, ngan oo. ²⁵Ya in ke be isere tool san a iwete nin dada kidi tooltool panga, ngan tiap. Yesoo ya taunu, in lon galanga ye so le imot yo iken di tooltool lodi, ngan oo.

Yesu Iye Nikodimas Tiwetewete

3 ¹Tool atu ke di Paresi yo ene Nikodimas i, in iyepe. Ya in kuto mai atu, inbe iyepe ye budanga ke di kuto maimai kidi Yuda yo ke karatanga betanga nga. ²Ngan bong, motong la iman pang ye Yesu man iwete panga nen, “Pannoongoo, am nga lomam galanga yong nen, ong i Maro iwangong a kusi be si kuyei ben pannoongoo. Yesoo, kumata le be Maro iyepe ye tool tiap nga, ngan o ke be iyei mos yo ben ong kuyei, ngan tiap.”

³Motong la Yesu iraua betanga ki nen, “Awete pong moolmool nen, kumata tool sa be iptorka lono le iyei ben tool paunu mulu tiap nga, ngan o ke be lo igaua ye di tooltool yo Maro be matan kala di nga, ngan tiap.”

⁴Motong la Nikodimas itoru mulu nen, “Ngan yelei ye tool yo iyei kolman koot i, in ole iyei belel a be iyei tool paunu mulu nga? Tool tani in ke be imulu a ilo tinana kapono lono, lo ngan be tinana ipasuii mulu, ngan tiap.”

⁵Motong la Yesu iraua betanga ki nen, “Awete pong moolmool nen, kumata tool sa be iptorka lono le iyei ben tool paunu mulu ye ran, inbe ye Maro Amunu Silene, tiap nga, ngan o ke be lo igaua ye di tooltool yo Maro be matan kala di nga, ngan tiap. ⁶Ngan so yo di tooltool ke tana tiyei a pombe i, in so ke tana, bong so yo Maro Amunu Silene iyei a pombe i, in so ke Maro Amunu. ⁷Le kin kutakrai ye betanga yo aweta pong be kuportaka lom le kuyei ben tool paunu mulu, ngan be. ⁸Awete pong nen, muru i be ipa nga, ngan ole ipa pang ye ni yo be ipa pang ye i. Ngan ole kulongo mununu, bong o ke be lom galanga ye ni yo ipa ye a iman i, too ye ni yo be ila pang ye i, in tiap. Ngan dada gaongo leu, ye urata yo Maro Amunu Silene iyei ye di tooltool a be iptorka lodi le tiyei ben di tooltool paunu mulu nga.”

⁹Ngan tina Yesu iwete nen nga, le nga Nikodimas itoru. Iyei ne, “Ai, so yo kuwetewete ye nga, ngan ole pombe belel?”

¹⁰Motong la Yesu iraua betanga ki nen, “Ong i pannoongoo, inbe em mai ye di pannoongoo kapala yo ke di Isrel nga. E nga yelel a lom galanga ye so nga tiap nga? ¹¹Awete pong moolmool nen, am nga amwetewete ye soo so yo lomam galanga ye nga, inbe ampapos soo so yo amkamata nga. Bong ang nga lomim be kakap betanga kiam yo amwetewete pang ye, ngan tiap. ¹²Au i awete pang ye so yo ke tana i nga, bong ngan katara lomim medana ye tiap. Ngan nanga, kumata le be awete pang ye so yo ke malala ke Maro nga, ngan ole katara lomim

medana ye bele? ¹³Ngan ni tool sa yo ilo koot ye malala ke Maro, ngan siap. Bong Tool Moolmool ke Maro ya taleu in la ipa ye malala ke Maro a isi i. ¹⁴Muku ngan Mose ikarata tomonaia moto kanningana ye pat sallinene, motong la itaru lo ye kai inbe ipatakode le ikodo ye ni sorrakene, a be nen ngan di tooltool tikamata ngan timmata be. Ngan dada gaongo leu ole pombe ye Tool Moolmool ke Maro. Ya in ole titaru lo ye kai inbe tipatakode le lo ikodo, ¹⁵a be nen ngan di tooltool le imot yo titara lodi medana panga nga, ngan ole tikaua yepongo dook mata yo taukan motingi i.

¹⁶“Maro lono pang di tooltool ke tana i mai san, ngan la le iraiia Natunu tani yo ataleu in pang di nga, a be nen ngan di sema tooltool yo titara lodi medana panga nga, ngan be tilledi be, bong tikaua yepongo dook mata yo taukan motingi i. ¹⁷Yesoo, Maro iwanga Natunu a isi ye tana i nga, ngan be si ipapos di tooltool ye urata dook tiap kidi yo tiyei nga, a be nen ngan iyemenai di ye, ngan tiap. Bong iwanga a isi nga be si ikap di tooltool le imot a ipamulu di ye so dook tiap yo be igarung di i. ¹⁸Ngan nen le di sema tooltool yo titara lodi medana ye nga, ngan o ke be Maro iyemenai di tiap. Bong di sema tooltool yo titara lodi medana panga tiap nga, ngan Maro ikarata betanga kidi oo, le ole iyemenai di. Yesoo, di ngan titara lodi medana ye Maro Natunu tani yo ataleu i, in tiap. ¹⁹Ngan ye punu yo be Maro iyemenai di tooltool ye i, in nen: Maro iwanga sul a isi tana i oo, bong ngan di tooltool lodi pang sul nunngana tiap. Di ngan lodi pang dada dook tiap yo ke todo lono nga, ngan mai san, yesoo di ngan ran kidi yeingi dada yo dook tiap nga. ²⁰Inbe di tooltool le imot yo tiyei dada dook tiap nga, ngan tiyei koi pang sul. Di ngan titattadai be timan potai ye sul ngan ipapos dada dook tiap yo kidi ngan se mallangana nga, ngan nen le tiyepe manga mooloo ye. ²¹Bong di sema tooltool yo titoo dada moolmool ke Maro nga, ngan lodi be tiyepe ye sul nunngana, a be nen ngan di tooltool tikamata, ngan lodi galanga ben titoo Maro lono ye dada kidi yo tiyei nga.”

Yowan Yo Ke Rriungu Di Tooltool I, In Iwete Nini Yesu

²²Yesu iwetewete pang Nikodimas a imot, motong la iye di galiunu timadit a tila pang tana mai Yudia nga. Ngan le la tiyepe kasin nango, inbe ikaua urata ye rriungu di tooltool. ²³Ngan Yowan lapau itu ye rriungu di tooltool ye malala Ainon yo iken potai pang ye malala mai Salim i, yesoo ni tani in ran ki alunu san. Ngan la le di tooltool tila le ikenen leu pang ye ni tani a be la irriu di nga. ²⁴(Ngan ye kene tani in Erot itara Yowan ilo rumu dook tiap kidi talnga dikidiki lono tiao.) ²⁵Ngan betanga atu in iken kataunu ye Yowan di galiunu tiye tool atu kidi Yuda. Di ngan tiwetewete a tiparsu ye momo kidi Yuda yo be titoo a tirriu le tinidi igalanga dook mata ye Maro matana i. ²⁶Motong la Yowan

di galiunu tina ngan tila pang ye la tiwete panga nen, “Pannoongoo, lom tut ye tool yo muku ngan angru kayepe ran Yodan koonoo kapala, inbe kuwetewete pang di tooltool ye i, in nookoot nga di tooltool le imot ngo la tigaua pang ye, inbe irriu di.”

²⁷Motong la iraua betanga kidi nen, “Dada yo nen ngan sa ke be pombe sokorai pang ye tool tiap. Bong kumata le be Maro yo iyepe ye malala ki ete ni, in ipamede tool be iyei so yo nen nga, ngan ole iyei. ²⁸Ngan ang tapmim nga kalongo betanga yo muku ngan awete pang inbe ayei ne, ‘Au i Mesaia, tool yo Maro ipootoo be si ikap di tooltool ki a ipamulu di ye so dook tiap yo be igarung di i, in tiap. Bong au i Maro iwangau a asi be si amuku panga.’”

²⁹Motong la Yowan ikatte betanga atu pang di nen, “Kumata le tamoto atu be iyooloo garup atu nga, ngan ole garup tani in iyei ben ya rimana. Inbe tamoto tani yo be ikere i, in tool ki atu yo ipare so pang kerenge ki i, in ole ikodo a itar talngana be ilongo ene tani yo be iman i. Le yeisa be ilongo kalngana, ngan ole lon ponana le lon ponana kaiye. Ngan dada gaongo leu, nookoot nga au i lok ponana le lok ponana kaiye nen lapau. ³⁰Ngan nanga, ya in ene ole ilo pang ete, inbe au ek ole idu pang lopo.

³¹“Ngan tool yo ipa ye malala ke Maro a isi i, in ene mai san le illos di tooltool nga le imot. Inbe tool yo ke tana i, in ke tana le iwetewete ye so yo ke tana i nga leu. Bong tool yo ipa ye malala ke Maro a isi i, in ene mai san le iyepe ete ye di tooltool nga le imot. ³²Ya in iwetewete ye soo so yo ikamata inbe ilongo ye malala ke Maro nga. Bong ngan tool sa ikap betanga ki a iparama le imede, nga tiap. ³³Bong kumata le tool be ikap betanga ki tina a iparama le imede nga, ngan ole ipaposi ben ya in itara lono medana pang Maro be betanga ki ngan moolmool. ³⁴Tool tani yo Maro iwanga a isi i, in si iwetewete betanga ke Maro. Yesoo, Maro ikaua Amunu Silene panga a ipaponi ye, le manga pa be iken tiap. ³⁵Ngan Tamana lono pang Natunu tani in mai san, le itar so tina nga le imot lo baene. ³⁶Ngan nen le sei tool be itara lono medana pang Natunu nga, ngan ole ikaua yepongo dook yo taukan motingi i. Bong kumata sei tool be iwala murini pang Natunu tani, in nga, ngan o ke be ikaua yepongo dook mata yo taukan motingi i, in tiap. Bong kate malmal ke Maro ole iken ye nen a tala.”

Yesu Iye Garup Atu Ke Samaria Tiwetewete

4 ¹Ye kene tani in di Paresi tilongo betanga be Yesu illos Yowan a irriu di tooltool alunu kaiye le tiyei ben di galiunu a titoo nga. ²Bong ngan Yesu ya taunu la irriu di tooltool tina, ngan tiap, di galiunu la tirriu di nga. ³Le nga Yesu talngan rau be di Paresi tilongo betanga ye di tooltool tina yo titoo ngan oo. Motong la imadit a iyege tana mai Yudia, inbe imulu a ila pang tana mai Galili mulu nga. ⁴Ngan itoo dada

yo ipa kataunu ye tana mai Samaria in a ila. ⁵Le nga ipa nen a ila, ngan le la pombe ye malala mai atu kidi Samaria yo ene Saika i. Ngan malala tani in iken potai pang ye tana kasin yo muku ngan Yakop ikap pang natunu Yosep nga. ⁶Inbe ran gumono yo muku ngan Yakop ikeli i, in iken ye ni in lapau. Ngan tina Yesu ipa ye dada mooloo a ila le panga rauu, le nga la iwur potai pang ye ran kelingi tani in gigini. Ngan ke ise isolokati kataunu kat le igoro ke matana sangaul be ru.

⁷⁻⁸Le nga Yesu iyepe, inbe di galiunu tilo pang malala mai lono be lo tiyimi kaningi pang di. Inbe mooloo tiap be garup atu ke Samaria isi be si idok ran ki. Motong la Yesu iwete panga nen, “Atoo, nga ole kukut ran pattu se ayin ngan.”

⁹Motong la garup tani in iwete panga nen, “Ai, ong i tool kidi Yuda, inbe au i garup ke Samaria. E nga yelei a kutorau be akap ran pong a kuyin nga?” (Ngan garup tani in iwete nen, yesoo di Yuda ngan tiye di Samaria tigauagaua tiap.)

¹⁰Motong la Yesu iraua betanga ki nen, “Kumata be lom galanga ye so dook mata yo be Maro ikauu pang di tooltool ye lo ponana ki i, inbe ye tool yo itorong be kop ran panga a iyin in nga, ngan matin nga le kutoru a nen ngan ikaua ran yo be ikaua yepongo dook mata pang di tooltool i, in pong.”

¹¹Motong la garup tani in iwete panga nen, “Tool Mai, ran i idu lopo san, inbe ong i taukam so yo be kukut ran ye i. E nga ole kouo ran yo be ikaua yepongo dook mata pang di tooltool i, in ngai? ¹²Sasa kiidi yo Yakop i, in ikele ran naii pam. Inbe ya taunu iye di natunu tiye di asara ki yo edi bulumakau le sipsip nga, ngan di le imot tiyini ran tani i lapau. Bong ong i yelei, o kullosa Yakop la kuwete be kouo ran yo be ikaua yepongo dook mata pang di tooltool i, too?”

¹³Motong la Yesu iraua betanga ki nen, “Di tooltool le imot yo tiyini ran i nga, ngan ole moorook di mulu. ¹⁴Bong kumata sei tool be iyini ran yo be akauu panga i nga, ngan o ke be moorooku mulu tiap. Bong ran tani in ole iyei ben ran punu nga, inbe rongrongbe ke lono, a nen ngan ikaua yepongo dook mata yo taukan motingi i, in panga.”

¹⁵Motong la garup tani iyei ne, “Atoo, Tool mai, nga ole kouo ran tani in pau, a nen ngan moorookau a amulu si adoko ran i mulu be.”

¹⁶Motong la Yesu iwete panga nen, “Kulo lo kouo nimtooroo, lo ngan be angru kasi.”

¹⁷Bong ngan garup tani in iraua betanga ki nen, “Atoo, au i taukak niktooroo.” Motong la Yesu iyei ne, “Betanga kiong yo kuwete be ong i taukam nimtooroo, ngan moolmool. ¹⁸Yesoo, ong in kuyooloo tamoto limi oo, inbe tamoto yo nookoot angru kayepe ni, in nimtooroo tiap. Le betanga kiong yo kuwete nga, ngan moolmool le imot.”

¹⁹Motong la garup tani in iyei ne, “Tool mai, akamatong ngan ong i Maro koonoo atu. ²⁰Muku ngan di sasa kiam tisung ye kawal bi e i. Bong ang Yuda nga kawete be ni yo be tagaua a tasung ye i, in la Yerusalem leu i.”

²¹Motong la Yesu iwete panga nen, “Garup, kutara lom medana ye betanga kiau. Ye lal atu yo be pombe i, in di tooltool ole se tisung pang Tamada ye kawal i mulu tiap, inbe lo tisung panga Yerusalem tiap lapau. ²²Ang Samaria nga kasung pang tool yo lomim galanga ye tiap i. Bong am Yuda nga amsung pang tool yo lomam galanga ye i. Yesoo, dada yo Maro be ipamulu di tooltool ye so dook tiap yo be igarung di i, in ipa yam Yuda. ²³Bong lal tani yo awete pong ye be pombe i, in nookoot nga pombe oo. Le di tooltool yo be tisung moolmool nga, ngan ole tisung pang Tamada ye gurana ke Maro Amunu yo be ipasongosongo di ye nga, inbe ye dada yo moolmool nga. Yesoo, Tamada in lono dook mata ye di tooltool yo tisung panga nen nga. ²⁴Maro i ben amunu le ke be takamata tiap, le di tooltool yo be tisung panga nga, ngan ole tisung panga ye gurana ke Maro Amunu yo be ipasongosongo di nga, inbe ye dada yo moolmool nga.”

²⁵Yesu iwete nen a imot, motong la garup tani in iyei ne, “Au i lok galanga ye Mesaia yo tiwete ene ye Kirisi i, in ole isi. Inbe ye kene yo be isi ye in nga, ngan ole ipagalanga lodo ye so nga le imot.”

²⁶Motong la Yesu iwete panga nen, “Ai, au tani naii la nookoot nga awetewete pong i.”

Yesu Di Galiunu Timulu Pang Ye

²⁷Yesu iwetewete pang garup tani in go, inbe di galiunu timulu ke malala mai a tisi. Ngan tikamata yo yaru tiwetewete nga, le titakrai. Bong di atu sa mala be itoru nen, “Nga kusere soo so?” too “Nga yelei a kuye garup i kawetewete nga?” ngan tiap.

²⁸Motong la garup tani in iyege bor ki ke ran in sila iken, inbe imulu a ilo pang malala lo iwete pang di tooltool nen, ²⁹“Ai, kaman a tadu du kakamata tool atu ni ngan. Tool ni iwete pau ye so le imot yo ayei muku nga. Ya ni o Kirisi tani, too?” ³⁰Motong la di tooltool tina ngan tiyege malala mai tani, inbe tidu pang ye be du tikamata.

³¹Ngan ye kene tani in Yesu di galiunu tiwete panga nen, “Pannoongoo, kon so pa ngan.”

³²Bong ngan iwete pang di nen, “Au i kaningi kiau yo be akan nga, ngan ang nga lomim galanga ye tiap.”

³³Ngan iwete nen, le nga di galiunu di tapdi tiwetewete nen, “Ai, o tool sa ikap kaningi si ikap panga a ikan, too?”

³⁴Motong la Yesu iyei ne, “Kaningi yo kiau i, in nen, be ole atoo tool yo iwangau a asi, in lono, inbe ayei porai urata ki. ³⁵Ang nga kawete be

taudu pai mulu la iken pang dama nga, lo ngan be takana so matana. Bong awete pang nen, matamim gaga a kakamata kumu nga, ngan dingding patunu ke kaningi nga, ngan isullungu ke be tagogo oo. ³⁶Ngan tool yo iyei urata ye goganga kaningi i, in nookoot nga ikap pat ye urata kootoonoo ki. Moolmool, nookoot nga ya in la igogo kaningi yo ke yepongo dook mata yo taukan motingi i. Ngan nen le tool yo ke penge kaningi iye tool yo ke goganga kaningi i, in ole yaru le ru be lodi ponana. ³⁷Ngan nen le betanga yo tiweta in kanono pombe moolmool nen, ‘Tool atu ole ipe so, inbe tool san ole igogo kaningi kanono.’ ³⁸Au i awangang be la kagogo kaningi kanono ke kumu yo kayei urata ye tiap nga. Ngan di diemim kapala la urata rau di ye kumu tina ngan, inbe ang nga be kala kumu leu la kagogo kaningi kanono tina yo pombe ye urata kootoonoo kidi nga.”

Di Tooltool Ke Samaria Alunu Titara Lodi Medana Pang Yesu

³⁹Di tooltool alunu ke Samaria yo tiyepe ye malala mai tani nga, ngan tilongo betanga ke garup tani, le nga titara lodi medana pang Yesu. Yesoo, garup tani in iwete nen, “Tool ni iwete pau ye so le imot yo ayei muku nga.” ⁴⁰Le nga di tooltool ke Samaria yo tidu pang ye Yesu nga, ngan titoru a timangmang ye be iye di tiyepe kasin ngan. Motong la sila iye di tiyepe ye ke ru. ⁴¹Ngan nen le di tooltool alunu mulu la titara lodi medana pang Yesu lapau nga, yesoo di tapdi tilongo betanga ye ya taun koonoo. ⁴²Motong la tiwete pang garup tani in nen, “Am nga amtara lomam medana ye betanga kiong yo kuwete ngan leu tiap. Bong nookoot nga am tapmam amlongo betanga ye le lomam galanga nen: Ya in tool tani yo isi be si ipamulu di tooltool ke tana i ye so dook tiap yo be igarung di i.”

Yesu Ikarata Tool Kuto Mai Atu Natunu Le Tinini Dook Mata Mulu

⁴³Yesu iye di tooltool ke Samaria tiyepe ye ke ru tina ngan a imot, motong la iyege di sila tiyepe inbe ila pang Galili. ⁴⁴(Ngan muku ngan Yesu ya taunu iwete nen, be tool atu iyei Maro koonoo nga, ngan o ke be di tooltool ke malala ki ya taunu tilongo betanga ki inbe tiraua panga tiap.) ⁴⁵Ngan ye kene tani in ipa le la pombe Galili nga, ngan le di tooltool ke Galili lodi ponana ye a tikauu. Yesoo, di ngan tilo Yerusalem ye lal maiyoko kidi Yuda ke sungunu yo tiwete ene ye Paskimoolooningi ke Maro in ngan, ngan tikamata so tina le imot yo iyei nga, ngan lapau.

⁴⁶Motong la Yesu ipa mulu a ila pombe ye malala mai Kana yo iken ye tana ke Galili i. Ngan Kana in malala tani yo muku ngan iportaka ran le iyei wain ye i. Ye kene tani in tool mai atu yo matan kala urata ke tool kuto mai ki i, in natunu tamoto yo iyepe Kapenam in matamatenge mai ikauu. ⁴⁷Ngan tool mai tani in ilongo betanga ke Yesu be iyege Yudia a

iman pang Galili nga, le nga ila pang ye la itoru a imangmang ye be yaru tidu pang Kapenam, a nen ngan du ikamata natunu a ikarata le dook mata mulu. Yesoo, mooloo tiap ngo be natunu imata.

⁴⁸Ngan iwete nen, motong la Yesu iwete panga nen, “Ang tooltool nga ole kakamata mos matana matana inbe urata maimai yo ayei nga, ngan la be o katara lomim medana yau nga, too?”

⁴⁹Ngan tool mai tani in iwete panga nen, “Tool mai, kupa tarai a kuman a aru tadu, mooloo tiap natuk ni ngo be imata.”

⁵⁰Motong la Yesu iyei ne, “Kudu. Natum ni ole imata tiap.” Le nga tool mai tani in itara lono medana ye betanga ke Yesu, inbe imulu a idu. ⁵¹Ngan ye kene yo ipa dada go ye in nga, ngan itauaraia di kapraingi ki yo tikaua bingi ke natunu tani in a tise nga. Le nga tiwete panga nen, “Ai, natum tani, in tinini dook mata mulu oo.” ⁵²Motong la itor di ye ke matana yo tinini dook mata mulu ye i. Ngan tiwete nen, “Rono pang rrai ye so ben ke matana atu, ngan matamatenge ikoo ye a tinini dook mata mulu.”

⁵³Motong la kase tani in tamana lon galanga nen, rono ye so ben ke matana atu, ngan Yesu iwete panga nen, “Natum ni ole imata tiap.” Ngan nen le tool mai tani in iye di tooltool yo tiyepe rumu ki nga, ngan di le timot titara lodi medana pang Yesu.

⁵⁴Le i mos ru ki yo iyei ye kene yo ipa ke Yudia a imulu a ila Galili ye i.

Yesu Ikarata Tool Atu Yo Ikapye Panga I

5 ¹Yesu tiyepe a ke kapala iman a ila, le nga lal maiyoko kidi Yuda san mulu be pombe, motong la imadit a ilo pang Yerusalem. ²Ilo Yerusalem, ngan pombe ye ran atu yo tiwete ene ye di Ibru koodi, ngan tiweta ye Betseda i. Ngan ran tani in iken potai pang ye dada ke koongoo yo tiweta ye Dada Kidi Sipsip, inbe tire bale limi le iwakai i. ³⁻⁴Inbe di tooltool malala mai yo matamatenge ikap di nga, ngan tikenen bale tina ngan parmana. Di ngan kapala matadi kisis, inbe kapala ngan kedi dook tiap, inbe kapala ngan tikap rama.^e ⁵Ngan tool kidi atu yo ikap rama a ikenen ye ni tani lapau i, in matamatenge ikauu mukot le iyepe ye rai sangaul tol inbe balana limi be tol oo. ⁶Ngan ye kene tani in Yesu ikamata yo ikenen nga, le nga lon tar nen tool i o matamatenge ikauu mukot. Motong la itoru nen, “Ai, ngan lom be tinim dook mulu, too?”

⁷Ngan tool tani se iraua betanga ki nen, “Atoo, tool mai, au i taukak tool yo be ilonau a ikau au a adu ran lono ye kene yo ran bolbolbe ye i.

^e **5:3-4** Di tooltool kapala yo lodi galanga ye Rau ke Maro nga, ngan lodi tar be betanga damono kasin mulu la iken ye arono 3 le 4 nga. Ngan betanga tina, ngan nen: *Di tooltool tina tikenen a tinam kumata le be bangabangana ke Maro isi le si iyeie ran tani in le bolbolbe nga, ngan sei tool yo ipas muku a idu ran i, in ole matamatenge ki imot.*

Au tauk i akapye be adu ran lono, bong di diek yo timuku nga, ngan ole tidada sukau a tidu ran lono, inbe akino.”

⁸Motong la Yesu iwete panga nen, “Kumadit! Kouo mie kiong a kupa.”

⁹Yesu iwete nen, le tina pattu leu, inbe tool tani in tinini dook mata mulu, inbe imadit a ikaua mie ki a ipa a ila. Ngan ye ke tani yo Yesu ikarata ye i, in ye lal kidi Yuda ke sungunu, ¹⁰le di Yuda tikamata yo ikaua mie ki a ipa nga, le nga tiwete panga nen, “Ai, katai nga lal kiidi Yuda ke sungunu, inbe ger kiidi igunkalidi be tayeida dada yo nen ngan be.”

¹¹Bong ngan iraua betanga kidi nen, “Tool yo ikaratau a le tinik dook mata mulu i, in ya la iwete pau be akaua mie kiau a apa i.”

¹²Motong la titoru nen, “Sei tool iwete pong be kouo mie kiong a kupa i?”

¹³Ngan tool tani yo tinini dook mata mulu i, in lon sarere ye tool yo iwete panga nen i, yesoo Yesu la ikatbon di tooltool malala mai yo tiyepe ye ni tani in nga.

¹⁴Mooloo tiap, inbe Yesu ilo bareme mai ke sungunu lono, ngan ikamata tool tani in, le nga iwete panga. Iyei ne, “Kumata! Ong i tinim dook mata mulu oo. Le kin kuyei noonoo mulu be. Ole nen ngan moonoo san mulu yo dook tiap san i, in la be pombe pang yong i.” ¹⁵Motong la tool tani in ila la iwete pang di Yuda nen, “Tool tani yo ikaratau a le tinik dook mata mulu i, in Yesu.”

¹⁶Ngan so tina nga Yesu iyei ye lal kidi Yuda ke sungunu, ngan nen le di Yuda tina be tigarungu. ¹⁷Bong ngan Yesu iwete pang di nen, “Tamak i, kanakana ngan ikaua urata le taukan maryoongoo. Le au i ayei urata nen lapau.” ¹⁸Ye punu in la le di Yuda tikapye be tisere dada sa yo be tiraumate ye i. Yesoo, tiwete idada ger pono kidi ye lal ke sungunu leu tiap, bong iwete be Maro in ya taunu Tamana. Le ye betanga ki yo nen i, in iwete be ya in gaongo ben Maro lapau.

Maro Ikaua Gurana Mai Pang Natunu Yesu

¹⁹Yesu ilongo tina yo di Yuda tiwete nen nga, motong la iraua betanga kidi nen, “Awete pang moolmool nen, Natunu i ke be iyeie so sa ye ya taunu lono tiap, bong ole iyei so yo ikamata Tamana iyei, ngan leu. Yesoo, soo so yo Tamana iyei nga, ngan Natunu ole iyei nen lapau.

²⁰Ngan Tamana lono pang Natunu mai san le ole ipatnai so le imot yo iyei nga, ngan panga. Inbe Tamana ole ipatnai so maimai kapala mulu panga le illos so yo nookoot kakamata iyei koot nga. Ngan nen le ole katakrai welewele ye. ²¹Le nen, Tamana in ipamadit di tooltool yo timmata koot nga le timaur mulu, inbe ikaua yepongo dook mata pang di. Ngan nanga, Natunu ole iyei nen lapau a ikaua yepongo dook mata yo taukan motingi in pang di tooltool ye ya taunu lono. ²²Inbe so san mulu

in nen, Tamana in ole ikarata betanga ke tool sa tiap, bong urata tani ke karatanga betanga ke di tooltool i, in isuku la Natunu baene, ²³a be nen ngan di tooltool le imot ole tiraua pang Natunu dawa ben tina yo tiraua pang Tamana nga. Kumata le sei tool be iraua pang Natunu tiap nga, ngan iraua pang Tamana yo iwanga a isi i, in tiap lapau.”

²⁴“Awete pang moolmool nen, sei tool ilongo betanga kiau, inbe itara lono medana pang tool yo iwangau a asi i, in ikaua yepongo dook mata yo taukan motingi i. Inbe tool tani in o ke be tipaposi ye urata dook tiap ki yo iyei ngan sa, a be nen ngan Maro iyemenai ye, ngan tiap, yesoo iyege dada ke matenge inbe iyepe ye yepongo dook mata yo taukan motingi in oo. ²⁵Awete pang moolmool nen, lal yo be pombe i, in nookoot nga pombe oo. Le di tooltool yo tiyepe ben timmata koot nga, ngan ye kene yo be tilongo Maro Natunu kalngana a be titoo nga, ngan ole tikaua yepongo dook mata yo taukan motingi i. ²⁶Ngan Tamana in yepongo dook mata tani in ipa ye. Le gaongo leu ikaua gurana tani in pang Natunu le yepongo dook mata tani in ipa ye lapau. ²⁷Inbe Tamana ikaua gurana mai panga be ikarata betanga ke di tooltool ye dada le urata kidi yo tiyei nga, yesoo ya in Tool Moolmool ke Maro.

²⁸“Kin katakrai ye betanga yo awete nga be. Yesoo, lal yo be pombe i, in ole di tooltool le imot yo timmata a tikenen agoro lono kidi ke matenge nga, ngan tilongo kalngana, ²⁹ngan ole timadit a tisi tana. Lo ngan be di tooltool yo tiyei dada dook mata nga, ngan ole timadit a timaur mulu inbe tiyepe ye yepongo dook mata yo taukan motingi i. Inbe di tooltool yo tiyei dada dook tiap nga, ngan ole timadit a timaur mulu, lo ngan be tipapos di ye urata dook tiap kidi yo tiyei nga, a be nen ngan tiyemenai di ye. ³⁰Au i ke be ayeie so sa ye au tauk lok tiap. Au i alongo Tamak koonoo le atoo betanga ki, inbe akarata betanga ke di tooltool ye dada kidi yo tiyei nga. Ngan nen le urata kiau ke karatanga betanga tani, in ipa tarantatu dook mata, yesoo atoo au tauk lok tiap, bong atoo Tamak yo iwangau a asi i, in lono.”

Di Tooltool Kapala Tiwetewete A Tipaposo Yesu

³¹Motong la Yesu iwete mulu nen, “Kumata be au tauk awetewete pang ye urata le dada kiau au tauk nga, ngan ole kawete be betanga kiau nga moolmool tiap. ³²Bong tool san la be ikaua nek a iwetewete, inbe ipaposau ye urata le dada kiau yo ayei nga. Le lok galanga nen, betanga ki yo be iwetewete yau nga, ngan moolmool le imot. ³³Muku ngan kawanga di tooltool a tila ye Yowan be la titor yau nga, ngan le iwete betanga moolmool pang di yau lapau. ³⁴Moolmool, au i asere tool ke tana i sa be iwetewete yau tiap, bong awete nen pang nga, ngan be nen a nen ngan Maro ikau ang a ipamulang ye so dook tiap yo be igarungang i. ³⁵Yowan in iyei ben sul loloana le ilolo a ilangarai di tooltool. Ngan le lomim ponana ye sul ki ye manga modono kasin.

³⁶“Bong so san mulu yo ipaposau le illos betanga ke Yowan yo iwetewete yau i, in nen. Urata yo Tamak itar la baik be ayei porai nga, ngan la ayei le ipaposau pang di tooltool be au i Tamak la iwangau a asi i. ³⁷Ngan Tamak yo iwangau a asi i, in ya taunu la iwetewete yau a ipaposau i. Bong ang nga kalongo touo kalngana, inbe kakamata touo matana pitiao. ³⁸Inbe kaparama betanga ki sa a iken lomim tiap, yesoo ang nga katara lomim medana pang tool yo iwanga a isi i, in tiap. ³⁹Kanakana ngan ang nga kasootoo kinkatingi betanga ke Maro yo iken ye rau ki nga, yesoo lomim tar nen, betanga tina ngan la be ikaua yepongo dook mata yo taukan motingi in pang i. Bong awete pang nen, betanga tina yo iken ye Rau ke Maro nga, ngan la iwetewete yau a ipaposau nga. ⁴⁰Bong ang nga lomim be kaman pang yau, a be nen ngan man kakaua yepongo dook mata yo taukan motingi i, in tiap.

⁴¹“Au i asere tool ke tana i sa be iyitmaka ek, in tiap, ⁴²bong au i lok galanga yang oo. Ang ngan lomim pang Maro mai san tiap. ⁴³Au i akaua Tamak damono ngan la le apa ye ene a asi nga, bong lomim pau tiap. Bong kumata le tool atu be ipa ye ya taunu ene a iman nga, ngan ole pattu leu be lomim ponana ye a katoo betanga ki. ⁴⁴Ang ngan lomim ponana yo be di diemim tiyitmakang nga, bong lomim be kayeie dada dook mata sa pang Maro ya taleu, a be nen ngan iyitmakang ye, nga tiap. Ngan be nen nga, ngan ole katara lomim medana pau belei?

⁴⁵“Kin lomim tar be au i la be lo kakodo dama ke Tamada, inbe awetewetang a apaposang ye urata dook tiap kiang yo kayei, nga be. Bong tool yo be iwetewetang a ipaposang pang Tamada ye urata kiang yo kayei nga, in la Mose, tool tani yo katara lomim ye be ole ilonang i. ⁴⁶Kumata be katara lomim medana ye betanga ke Mose nga, ngan ole katara lomim medana ye betanga kiau lapau, yesoo betanga yo Mose iwodo nga, ngan iwetewete yau i. ⁴⁷Bong kumata be katara lomim medana ye betanga yo Mose iwodo, ngan tiap nga, ngan ole kayei belei be katara lomim medana ye betanga kiau yo awete nga?”

Yesu Ipankan Di Tooltool Alunu Ben 5,000
(*Matu 14:13-21; Maka 6:30-44; Luka 9:10-17*)

6 ¹Tiyepe a ke kapala iman a ila, motong la Yesu imadit a ila pang ye ran yo Galili i, in koonoo kapala. Ngan ran tani in tiwete ene san ye Taibirias. ²Ngan di tooltool malala mai tikamata mos yo iyei ye di tooltool yo matamatenge ikap di nga, le nga di lapau timadit a titoo. ³Motong la Yesu inau a ilo ye kawal atu madini a lo iye di galiunu tiwur. ⁴Ngan ye kene tani in, lal kidi Yuda ke sungunu yo tiweta ye Paskimoolooningi ke Maro i, in potai oo.

⁵Le nga Yesu be matan gaga, ngan ikamata di tooltool malala mai tina yo timan pang ye nga, motong la itoro Pilip nen, “Ai, nga ole tayimi

kaningi ngai pang di tooltool nga be tapakan di ye nga?” ⁶Ngan betanga ke Yesu yo itor ye i, in be nen a itoua ye, yesoo ya taunu in lon galanga ye so yo be iyeii, in oo.

⁷Ito ro Pilip nen, le nga Pilip iraua betanga ki. Iyei ne, “Ona, kumata be tayimi porong ye pat silba ke yimoongoo so ben 200 nga,^f ngan o ke be di tooltool nga le imot ole di atu atu tikanen kasin kasin leu.”

⁸Motong la Yesu galiunu san yo Antares i, ya in Simon Pita taini, in iwete pang Yesu nen, ⁹“Tool kase atu yo iyepe ni, in porong ki ngan dukumu limi, inbe i paranga ki ru leu. Bong di tooltool nga malala mai san. Le be nen ngan ole porong le i tina nga ilonidi belei?”

¹⁰Antares iwete panga nen, motong la Yesu iyei ne, “Kawete pang di tooltool ngan a sila tiwur.” Ngan ni tani in dingding isup ye le alunu, le di tooltool tina ngan du tiwur dingding pono. Ngan kinkatingi kidi tamoto leu ngan ben 5,000. ¹¹Di tooltool tina ngan du tiwur, motong la Yesu ikap porong dukumu tina a iwete lo ponana ki pang Maro ye, inbe itepalapala a iwete be timalimi di tooltool tina ngan ye. Motong la iyei nen lapau ye i ru tina a timalimi di, ngan le tikap le lo iye di tooltool tina le imot.

¹²Ngan le tikan tikan le lo kapodi sung, motong la Yesu iwete pang di galiunu nen, “Kawinoko kaningi naunu naunu yo iken ngan a kagaua dook, kin le kayege kasin pa a ilene sokorai be.” ¹³Motong la di galiunu tina tiwinoko porong dukumu limi yo di tooltool tina ngan tikan be tiwulai naunu naunu nga, ngan a tipadid ngan le ikan karei ponene sangaul be ru.

¹⁴Le di tooltool tina ngan tikamata mos tani yo Yesu iyeii i, le tiyei ne, “Moolmool yege, i Maro koonoo tani yo tatar matada ye be ole isi tana, in naii.” ¹⁵Ngan tina Yesu ilongo betanga tina yo tiwete nen nga, le nga lon galanga ye di nen, nga be tiparama a nen ngan titaru a iyei tool kuto mai yo be matan kala tana kidi le imot i. Le nga iyege di, inbe ya taleu ilo pang kawal.

Yesu Ipa Ran Pono

(Matiu 14:22-33; Maka 6:45-52)

¹⁶Ye kene tani in tiyepe le du rrai, motong la Yesu di galiunu tidu pang ran koonoo. ¹⁷Tidu, tinam ngan Yesu pombe pang ye di tarai tiap. Motong la tisuku ookoo atu a tiyiri ye, a be tisiutu ran a tila pang Kapenam yo iken ke ran koonoo kapala i, ngan bong oo. ¹⁸Tikooi a tila, ngan eng mai imadit a kokor ki popobe le dook tiap yege. ¹⁹Ngan di galiunu tina, ngan tipie ye ookoo tani a tila kataunu, le manga mooloo kasin.^g Inbe matadi nen ngan tikamata Yesu yo ipa ran pono a ipot potai pang ye ookoo nga, le

^f 6:7 Ngan pat silba ke yimoongoo so tina ngan iye pat yo be tool atu ikap ye urata kootoonoo ki yo iyei ye taudu limi be tol nga. ^g 6:19 Manga yo tipie ye ookoo a tila ye i, in mooloo kasin ben kilomita limi too limi be atu.

nga titattadaii. ²⁰Bong ngan Yesu iwete pang di nen, “Katattadai be! I au tani naii.” ²¹Motong la lodi ponana ye a tikauu a ilo ookoo lono, ngan le pattu leu be ookoo ila isolu ye ni tani yo be tila pang ye i.

Di Tooltool Malala Mai Tikau Urata Ye Serenge Yesu

²²Tiyepe a bongbongini ki, motong la di tooltool malala mai tina yo tiyepe ran koonoo kapala nga, ngan lodi galanga nen, rono ngan tikamata ookoo ataleu la iken ye ni yo tiyepe ye. Inbe ookoo tani in tikamata touo Yesu pa be iye di galiunu tiyiri ye, nga tiap, bong di galiunu leu la tiyiri ye a tila nga. ²³Motong la ookoo pattu kidi Taibirias tilong le long tisolu potai pang ye ni tani yo Tool Mai iwete lo ponana ki pang Maro ye porong, motong di tooltool tikan i. ²⁴Ngan tina di tooltool tina ngan tikamata touo Yesu iye di galiunu pitiap nga, le nga tiyiri ye ookoo tina ngan a tila pang Kapenam be la tisere Yesu.

Yesu In Dawa Ben Porong Ke Yepongo Dook Mata

²⁵Di tooltool malala mai tina tila le la tipuske Yesu ran koonoo kapala, motong la titoru. Tiyei ne, “Pannoongoo, kuman ni nga ye soo lai?”

²⁶Motong la Yesu iraua betanga kidi nen, “Awete pang moolmool nen, ang nga kaman man kaserau nga, ngan ye mos yo ayeii a iyei ben tarkilanga kiau a kakamata, in tiap, bong ye porong yo apakanang ye a kakan ngan le kapomim sung welewele ye nga. ²⁷Ngan nen le kin urata porang ye kaungu kaningi yo be iwi palbe le dook tiap, in be, bong be nen ngan urata porang ye kaungu kaningi yo be ikaua yepongo dook mata yo taukan motingi i. Ngan kaningi tani in ole Tool Moolmool ke Maro la be ikauu pang i, yesoo Tamana Maro ipootoo be ya la ole iyei urata tani i.”

²⁸Yesu iwete pang di nen, motong la titoru nen, “Nga ole amyei belei a be nen ngan amyei urata ke Maro yo lono dook mata ye nga?”

²⁹Motong la Yesu iraua betanga kidi nen, “Urata ke Maro in nen, be katara lomim medana pang tool yo Maro iwanga a isi i.”

³⁰Iwete pang di nen, motong la titoru. Tiyei ne, “Ole kuyeie soo mos a nen ngan iyei ben tarkilanga kiong pam be amkamata, ngan amtara lomam medana yong i? ³¹Muku ngan di sasa kiam tikana porong yo ene mana in ye ni sorrakene, ben betanga tina yo tiwodo lo ye Rau ke Maro nga. Ngan betanga tina ngan iwete nen, ‘Ya in ikap porong yo ipa ye malala ke Maro, ngan pang di tooltool be tikan.’^h”

³²Motong la Yesu iwete pang di nen, “Mose la ikap porong yo ipa ye malala ke Maro ngan pang di tooltool be tikan, in tiap, bong Tamak la ikap pang di i. Inbe ya la ikaua porong moolmool yo ipa ye malala ke

^h 6:31 Pamulenge 16:4; Rau ke Woungu 78:24

Maro, in pang i. ³³Ngan porong moolmool ke Maro i, in tool yo ipa ye malala ke Maro a isi be si ikaua yepongo dook mata yo taukan motingi i, in pang di tooltool ke tana i.”

³⁴Yesu iwete nen, motong la tiwete panga. Tiyei ne, “Tool mai, be nen nga, ngan kanakana ngan kouo porong tani in pam.”

³⁵Motong la Yesu iwete pang di nen, “Au tauk i la porong tani yo ke yepongo dook mata i. Ngan nen le sei tool be iman yau nga, ngan o ke be pitola mulu tiap. Inbe sei tool be itara lono medana pau nga, ngan o ke be moorooku mulu tiap lapau. ³⁶Bong dawa ben awete pang koot nga, ang nga kakamata gurana kiau oo, bong lomim be katara lomim medana pau tiap. ³⁷Di tooltool le imot yo Tamak ikap di pau nga, ngan ole timan pang yau. Inbe sei tool be iman pang yau nga, ngan o ke be anganga tiap lapau. ³⁸Yesoo, au i apa ye malala ke Maro a asi nga, ngan be si atoo au tauk lok tiap, bong be si atoo Tool yo iwangau a asi, in lono. ³⁹Inbe Tool yo iwangau a asi i, in lono nen, be kin ayege di tooltool yo ikap di pau nga, ngan sa le ilene be. Bong be apamadit di le imot ye lal yo itaru be ikarata betanga kidi tooltool ye i. ⁴⁰Ngan Tamak lono nen, be di tooltool le imot yo titar matadi pang Natunu a titara lodi medana panga nga, ngan ole tikaua yepongo dook mata yo taukan motingi i, inbe ole apamadit di ye lal yo itaru be ikarata betanga kidi tooltool ye i.”

⁴¹Di Yuda tilongo tina yo Yesu iwete be ya in porong moolmool yo ipa ye malala ke Maro a isi i, le nga katedi malmal a timadit tina le tipasa mur ye. ⁴²Tiyei ne, “Ona tiap! Tool i Yesu, inbe ya in tamana la Yosep i, too? Idi nga lod galanga ye tamana le tinana, e nga yelei be nookoot nga iwete be ya in ipa ye malala ke Maro a isi nga?”

⁴³Motong la Yesu iwete pang di nen, “Ai, katemim malmal a kapasa mur yau dookoot! ⁴⁴Tool sa ke be itoo ya taunu lono a iman pang yau, ngan tiap, bong be Tamak yo iwangau a asi i, in ipamaditi lono be iman, ngan la be iman pang yau nga. Inbe tool yo nen, in ole apamaditi mulu ye lal yo Maro itaru be ikarata betanga kidi tooltool ye i. ⁴⁵Le betanga yo Maro koonoo iwode a iken ye Rau ke Maro in nen, ‘Ole Maro ipatomonai di tooltool nga le imot.’ⁱ Ngan nen le di sema tooltool le imot yo tilongo betanga ke Tamak a lodi galanga ye nga, ngan ole timan pang yau.

⁴⁶Ngan tool sa yo ikamata Tamak koot, ngan tiap, bong tool ataleu yo iye Maro tiyepe motong isi i, in leu la ikamata Tamak i. ⁴⁷Le awete pang moolmool nen, sei tool itara lono medana pau nga, ngan ikaua yepongo dook mata yo taukan motingi in oo. ⁴⁸Au tauk i la porong ke yepongo dook mata tani i. ⁴⁹Di sasa kiang tikana porong yo ene mana, in ye ni sorrakene nga, ngan di le imot timmata. ⁵⁰Bong porong moolmool tani in ipa ye malala ke Maro a isi, le kumata be di tooltool tikani, ngan o ke

ⁱ 6:45 Esai 54:13

be timmata tiap. ⁵¹Ngan au i la porong tani ke yepongo dook mata yo ipa ye malala ke Maro a isi. Le kumata sei tool be ikana porong tani in nga, ngan ole iyepe ye yepongo dook mata yo taukan motingi i. Ngan porong tani in au tauk medak yo be akauu pang di tooltool ke tana i le imot i, a be nen ngan tikaua yepongo dook mata tani.”

⁵²Yesu iwete nen, le nga di Yuda tina tilongo, le katedi malmal a di tapdi tiparsu inbe tiwetewete nen, “Nga ole tool i iyei belel be ikap medana a takan nga?”

⁵³Motong la Yesu ikatte betanga pang di nen, “Awete pang moolmool nen, kumata le be kakana Tool Moolmool ke Maro medana tiap, inbe kayini rara ki tiap lapau nga, ngan o ke be kakaua yepongo sa yo dook mata, ngan tiap. ⁵⁴Bong kumata sei tool be ikana medak, inbe iyin rara kiau nga, ngan ole ikaua yepongo dook mata yo taukan motingi i. Inbe ye lal yo Maro itaru be ikarata betanga kidi tooltool ye in nga, ngan ole apamaditi mulu ye ni ke matenge. ⁵⁵Yesoo, au i medak in kaningi moolmool, inbe rara kiau in la ran moolmool ke yinungu i. ⁵⁶Ngan nen le tool yo ikana medak be iyini rara kiau i, in ole iyepe yau, inbe au i ayepe ye. ⁵⁷Tamak yo yepongo dook mata ipa ye i, in ya la iwangau a asi i. Ngan ya in ikaua yepongo dook mata tani in pau. Ngan nen le ye dada gaongo leu ben yo ikaua yepongo dook mata pau nga, ngan la au i ole akaua yepongo dook mata pang di tooltool yo tikana medak nga. ⁵⁸Le porong moolmool tani yo ipa ye malala ke Maro a isi, in naii. Ngan porong i dawa ben yo muku ngan di sasa kiang tikani, motong timmata, in tiap. Bong sei tool be ikana porong moolmool i nga, ngan ole ikaua yepongo dook mata yo taukan motingi i.” ⁵⁹Ngan Yesu iwete betanga yo nga malala mai Kapenam, ye kene yo lo ipatomonai di tooltool ye rumu kidi Yuda ke gaongo in lono ye i.

Betanga Ke Yepongo Dook Mata

⁶⁰Ye kene tani in Yesu di galiunu alunu la tilongo betanga ki tina yo iwetewete nga, le nga tiyei ne, “Atoo, betanga yo ipatomonai idi ye nga, ngan imoo san. Nga ole sei tool be ikap i?”

⁶¹Bong ngan Yesu lon galanga ye di yo tipasa mur ye betanga ki tina, ngan oo. Le nga iwete pang di nen, “Nga yelei, betanga yo awete nga igarung lomim, too? ⁶²Ngan le be kakamata Tool Moolmool ke Maro be imulu a ilo pang ete ye ni yo muku ngan iyepe ye in nga, ngan ole kawete belel? ⁶³Maro Amunu la be ikaua yepongo dook mata yo taukan motingi in pang di tooltool i. Bong di tooltool ke tana ngan taukadi gurana yo be tiyei nen ye i. Ngan nanga, betanga yo awete pang ngan ipa ye Maro Amunu, le betanga tina ngan la be ikaua yepongo dook mata yo taukan motingi in pang i. ⁶⁴Bong ang kapala nga katara lomim medana pau tiap.” Yesu iwete nen, yesoo ye kene yo imadit ye urata ki ye in nga, ngan

lon galanga ye di tooltool yo be titara lodi medana panga tiap nga, inbe lon galanga ye tool yo be pang dama ni ngan ole itaru la di koi ki baedi, in lapau. ⁶⁵Motong la Yesu iwete mulu nen, “Ye punu in la le awete pang be tool sa ke be itoo ya taunu lono a iman pang yau, ngan tiap, bong be Tamak ipamede be iman, ngan la be iman pang yau nga.”

⁶⁶Ye kene tani in tilongo tina yo Yesu iwete nen nga, le nga di galiunu alunu la tiyege a timulumulu pang ni kidi le titoo mulu tiap nga.

⁶⁷Motong la Yesu itor di galiunu tina yo sangaul be ru ngan nen, “Nga yelei, ang nga lomim be kayegau a kala lapau, too?”

⁶⁸Motong la Simon Pita iraua betanga ki nen, “Tool Mai, sei tool be amla ye i? Ong i, betanga kiong nga ke be ikaua yepongo dook mata yo taukan motingi i, in pang di tooltool. ⁶⁹Le am nga lomam galanga yong, inbe amtara lomam medana nen, be ong i la Tool Tani Yo Maro Ipootoo Panga Ya Taunu I.”

⁷⁰Pita iwete nen, motong la Yesu iraua betanga ki nen, “Ang di galiuk yo sangaul be ru nga, ngan au tauk la apootang i. Bong emim atu in tool kuto mai kidi so sadi iyepe ye!” ⁷¹(Ngan Yesu iwete nen nga ye Yuta yo Simon Iskariot natunu i. Ya in Yesu di galiunu tina yo sangaul be ru nga, ngan atu kidi, bong pang dama ni ngan ole itara Yesu la di koi ki baedi i.)

Yesu Ilo Ye Mailang Ke Badabada

7 ¹Yesu iwete pang di galiunu nen a imot, motong la ipa a iwakaia tana mai kidi Galili leu. Ngan lono be iyepe manga mooloo ye tana mai ke Yudia, yesoo di Yuda ngo tinamu be ila mulu ni kidi nga, ngan ole tiraumate a imata. ²Bong ye kene tani in lal kidi Yuda ke sungunu yo tiweta ye Mailang ke Badabada i,^j in iman potai oo. ³Le nga Yesu di taini tiwete panga nen, “Ai, ong i nga ole kuyege ni, inbe kulo pang Yudia, a be nen ngan di galium tikamata mos yo be kuyei nga. ⁴Yesoo, kumata tool sa lono be di tooltool lodi galanga ye nga, ngan ke be iyepe nen inbe iyei urata ki sollono, ngan tiap. Le lom be kuyei so nen nga, ngan kulo lo ong taum kupapos matam mallangana, a nen ngan di tooltool le imot tikamata so yo kuyei nga.” ⁵Yesu di taini tina ngan tiwete panga nen, yesoo di ngan titara lodi medana panga tiap.

⁶Motong la iwete pang di nen, “Lal nga le imot nga, ngan kiang, bong au i lal moolmool yo kiau i, in pombe tia. ⁷Ngan di tooltool ke tana i nga, ngan o ke be lodi dook tiap pang, ngan tiap, bong ole lodi dook tiap pau, yesoo apapos di ye dada dook tiap kidi yo tiyei nga. ⁸Le be nen ngan ang kalo ye Mailang ke Badabada tani. E au i o alo tiap, yesoo lal moolmool kiau in pombe tia.” ⁹Yesu iwete pang di nen a tilo, inbe ya sila iyepe Galili.

^j 7:2 Ngan Mailang ke Badabada tani in gaongo mai kidi Yuda yo be lodi tut ye kene yo di sasa kidi tipa ye ni sorrakene ngan tiyepe ye badabada i.

¹⁰Di taini tina ngan tilo pang ye mailang tani, motong la ya lapau itoo di a ilo. Ngan ipa mallangana tiap, bong ipa sollono le di tooltool tikamata tiap. ¹¹Ye kene tani ngan di tooltool maimai kidi Yuda yo tiyepe ye gaongo mai kidi tani in nga, ngan tisere Yesu. Le nga titortor ye a tiyei ne, “Ai, tool tani in ise lapau, too tiap?”

¹²Le di tooltool malala mai tina yo tigauagaua nga, ngan timangunngun a tiwetewete ye. Ngan di tooltool kapala tiyei ne, “Ya ni tool dook mata.” E di kapala ngan tiyei ne, “Tiap, ya ni illung di tooltool.” ¹³Bong di tooltool tina ngan ke be tiwetewete mallangana ye urata yo Yesu iyei, ngan tiap, yesoo titattadai di tooltool maimai kidi Yuda.

Yesu Iyepe Ye Mailang Ke Badabada Inbe Ipatomonai Di Tooltool

¹⁴Ye kene tani, in gaongo mai tani in imadit le ilo kataunu tiao, inbe Yesu ipa a ilo koongoo lono ke bareme mai ke sungunu a lo ipatomonai di tooltool. ¹⁵Ngan di Yuda tilongo betanga ki tina yo ipatomonai di tooltool ye nga, le nga titakrai ye patomonaingi ki. Inbe tiyei ne, “Ona, tool i iyepe touo ye ni ke patomonaingi pitiap. E nga ikaua lo galanga mai i ngai?”

¹⁶Motong la Yesu iwete pang di nen, “Betanga yo apatomonai ang ye nga, ngan betanga kiau au tauk tiap, bong ipa ye tool yo iwangau a asi i. ¹⁷Le kumata be sei tool itara lono moolmool be itoo Maro lono nga, ngan ole lon galanga nen, be betanga yo apatomonai ang ye nga, ngan ipa ye Maro, too akap ye au tauk lok la awete nga. ¹⁸Ngan tool yo ikap betanga ye ya taunu lono a iwete i, in lono be iyei nen a di tooltool tiyitmaki ye. Bong sei tool yo iyei urata be di tooltool tiyitmaka tool yo iwanga a isi in ene nga, ngan ya in betanga ki ngan moolmool, le dada yo ke kaplungunu ngan sa iken ye, nga tiap. ¹⁹Muku ngan Mose ikap ger ke Maro pang oo, bong ang ngan sa iparama ger tina, inbe itoo dook, nga tiap. E nga yelei a kakapye be karaumatau a amata nga?”

²⁰Motong la di tooltool malala mai tina ngan tiwete panga nen, “Ai, ong i o so sadi idiwiwong! Ngan di sema tooltool tikapye be tiraumatong nga?”

²¹Le nga Yesu iwete pang di nen, “Au i ayeie mos atu ye lal kidi Yuda ke sungunu a kakamata, ngan la le ang le imot katakrai ye. ²²Bong muku ngan Mose ikap betanga pang ye dada ke koranga tiniidi nga, ngan le kakoro di natumim yo tamoto ngan tinidi ye lal kiidi Yuda ke sungunu lapau. (Ngan moolmool dada in nookoot imadit ye Mose a ise, nga tiap, bong in dada gurunu ipa ye di sasa kidi.) ²³Ngan nen le ang ngan kumata le lal kidi natumim ke koranga tinidi in be igoro lal kidi Yuda ke sungunu nga, ngan kapas le kakoro tinidi leu. Yesoo, lomim be katoo ger ke Maro yo iwete pang Mose a iwodo ngan dook. E nga yelei be katemim malmal pau ye tool atu yo akarata ye lal kidi Yuda ke sungunu a tinini dook mata

mulu le imot, in nga? ²⁴Ang nga kin kakamata tool leu, inbe kawete be ya in tool dook mata, too dook tiap, ngan be! Bong be nen ngan kayepe a lomim kaua urata ye dada ki dook ngan, lo ngan be kawete nen kooti.”

Ngan Yesu I Kirisi Tani, Too?

²⁵Yesu iwetewete nen a imot, motong la di tooltool pattu ke Yerusalem timadit tina le tiwete nen, “Ai, i tool tani yo tikapye be tiraumate a imata i? ²⁶Kakamata, ya in iwetewete betanga ki mallangana la di tooltool matadi a tilongo ngan le tiwete touo kan betanga siap. Ngan di tooltool maimai nga lodi tar belel, i Kirisi tani yo Maro ipootoo be si ikap di tooltool ki a ipamulu di i, in naii, too? ²⁷Bong tool i, lod galanga ye malala ki, le ya in o Kirisi tiap. Yesoo, ye kene yo be Kirisi isi pombe ye in nga, ngan o ke be tool sa lon galanga ye malala ki yo ipa ye a isi i, in tiap.”

²⁸Ngan Yesu iyepepe koongoo lono ke bareme mai ke sungunu a ipatomonai di tooltool go, inbe isulu katkat a iwete nen, “Ai, ang nga lomim galanga yau, inbe lomim galanga ye malala kiau yo apa ye a asi i. Bong atoo au tauk lok la asi nga tiap, Tamak la iwangau a asi i. Inbe dada ki yo iyei nga, ngan moolmool le imot. Ang nga lomim galanga ye tiap, ²⁹bong au i lok galanga ye, yesoo au i amru amyep, motong la iwangau a asi nga.”

³⁰Yesu iwete nen, le nga di Yuda tina ngan tilongo le katedi malmal a tikapye be tikauu a tiparama. Bong ngan le tool sa iparama tiap, yesoo lal ki in pombe tiao. ³¹Bong di tooltool yo tiyepe ye ni tani nga, ngan alunu la tilongo betanga ki le titara lodi medana panga nga. Le nga tiwete nen, “Ye kene yo be Kirisi isi ye in nga, ngan ole iyei gogo mos a iyei ben tarkilanga panga le illoso tool i tiap, too?”

Di Tooltool Maimai Tiwanga Di Bianga Be Tiparama Yesu

³²Di Paresi tilongo yo di tooltool malala mai tina ngan tiwetewete a timangunngun ye so yo Yesu iyei nga, le nga tiye di tooltool maimai ke paroranga so pang Maro ngan tiwanga di bianga yo tikodokala bareme mai ke sungunu nga, ngan be la tikaua Yesu a tiparama. ³³Motong la Yesu iyei ne, “Lal yo be ayang tayepe ye nga, ngan mooloo tiap, lo ngan be amulu a alo pang ye Tamak yo iwangau a le asi i. ³⁴Ang nga ole kakaua urata mai ye serengau, bong o kakamatau tiap. Inbe ni yo be lo ayepe ye i, in o ke be kalo ye tiap.”

³⁵Le nga di Yuda tina ngan di tapdi tiwetewete nen, “Ai, tool i nga ole be ilo pang ngai a be takamata mulu tiap nga? Ole ila pang ye di diede kapala yo la tiyepe nin la nin kataunu ye di Girik nga, a be nen ngan la ipatomonai di Girik, too? ³⁶Ngan nookoot nga iwete nen, ‘Ole kakaua urata mai ye serengau, bong o kakamatau tiap. Inbe ni yo be lo ayepe ye i, in o ke be kalo ye tiap.’ Ngan betanga ki nga, ngan punu belel?”

Yesu Iwete Ye Ran Ke Yepongo Dook Mata

³⁷Ngan ke yo Mailang ke Badabada tani be imot ye i, in tikamata ben lal maiyoko pang di. Le nga ye kene tani in Yesu imadit lo ikodo, inbe iwete le koonoo maimai nen, “Kumata sei tool be moorooku nga, ngan iman pang yau, a nen ngan man akap ran panga a iyin. ³⁸Yesoo, betanga yo iken ye Rau ke Maro ngan iwete nen, sei tool be itara lono medana pau nga, ngan ole ran yo ke yepongo dook mata i, in pombe lono a rongrongbe a idu.” ³⁹Yesu iwete nen nga, ngan ikatte betanga ye Maro Amunu Silene yo be pang dama ni nga, ngan ole iwanga si ipapon di tooltool yo titara lodi medana panga ngan lodi i. Bong ye kene tani in Maro iwanga Amunu Silene a isi tiao, yesoo iyeie Yesu ene le ilo ete ke be di tooltool tipayiti ye tiao lapau.

Di Tooltool Tiparpoto Le Tiyepe Ye Budanga Ru

⁴⁰Di tooltool malala mai tina ngan tilongo yo Yesu iwete nen nga, le nga kapala tiwete nen, “Moolmool sa! Tool i Maro koonoo tani yo tanamu be isi, in naii.”

⁴¹Tiwete nen, ngan di diedi kapala tiyei ne, “Tiap! Ya in Kirisi, tool tani yo Maro ipootoo be si ipamulu di tooltool ki i.”

Ngan tiwete nen, bong ngan di kapala tiyei ne, “Nga yelei, be Kirisi ole ipa ke Galili, too? Tiap yege! ⁴²Betanga yo iken ye Rau ke Maro ngan iwete be Kirisi in ole pombe ye rara ke Dawiti. Inbe ole tipasuii Betlem ye malala yo muku ngan Dawiti iyepe ye i.” ⁴³Ngan tina di tooltool tiwete gogo betanga ye Yesu nen nga, le nga di tapdi tiparpoto le tiyepe ye budanga ru. ⁴⁴Ngan le di tooltool kapala lodi be tikaua Yesu a tiparama, bong ngan le tool sa itara baene ye tiap.

Di Kuto Maimai Kidi Yuda Titara Lodi Medana Pang Yesu Tiap

⁴⁵Motong la di bianga tina yo tikodokala bareme mai ke sungunu nga, ngan timulu a tila pang ye di tooltool maimai ke paroranga so pang Maro tiye di Paresi. Tila, motong la di tooltool maimai tina ngan titor di nen, “Nga yelei be kakaua tool ni a kaman tiap nga?”

⁴⁶Ngan di bianga tina tiyei ne, “Muku ngan tool sa iwete betanga dawa ben yo nookoot nga tool ni iwetewete ye nga, ngan tiap.”

⁴⁷Motong la di Paresi tirau betanga kidi nen, “Ang nga o ikaua lungunu yang lapau, too? ⁴⁸Ngan kakamatam Paresi amye di kuto maimai yo matadi kala di Yuda nga, ngan sa itara lono medana panga, too? ⁴⁹Tiap yege! Di tooltool malala mai ngo yo lodi galanga ye ger ke Maro tiap nga, ngan di ngan tiyei kapakapa a tilongo panga sa. Bong dookoot, ole Maro igarung di.”

⁵⁰Di Paresi tina ngan tiwete nen, motong la edi atu yo ene Nikodimas i, in muku ngan ila ye Yesu la yaru tiwetewete, in itor di nen. Iyei ne,

⁵¹“Nga yelei, ger kiidi iwete be tayemenai sokorai di tooltool, too? Tiap, iwete be kulkulunu ngan ole talongo betanga ke tool atu, a nen ngan lod galanga dook ye urata ki yo iyei nga, lo ngan be tayemenai kooti.”

⁵²Motong la di Paresi tina ngan tiwete panga nen, “Ona, ong i ke Galili lapau, too? Kumata betanga yo iken ye Rau ke Maro nga, ngan iwete touo pa be Maro koonoo ole ipa ke Galili, nga tiap.”^k

⁵³Motong la di tooltool tina ngan tiparmagiri a tila pang ye rumu kidi atu atu nga.

Tiparama Garup Atu Yo Iyei Bauk I

8 ¹Di tooltool tina ngan timagiri a tila pang rumu kidi atu atu, bong Yesu in imadit a ilo pang kawal Olip. ²Ilo iyepe le muntu bongmai koot, motong la imulu a idu a ilo koongoo lono ke bareme mai ke sungunu. Ngan le di tooltool le imot timan pang ye man tigaua a tigaliuu le tiparkat, motong la du iwur, inbe ipatomonai di nga. ³Inbe di pannoongoo ke ger ke Maro tiye di Paresi tikaua garup atu yo iyei bauk, in a timan le man tipatokode dama kidi tooltool tina, ⁴inbe tiwete pang Yesu. Tiyei ne, “Pannoongoo, garup i kerenge, bong tikamata yo iye tamoto san tiyei bauk nga. ⁵Ngan ye ger ke Maro yo iwete pang Mose a iwodo ngan nen, garup atu be iyei dada nen nga, ngan ole takatmate ye pat a imata. Le nookoot nga ole kuwete bele?” ⁶Di kuto maimai tina ngan tiye di Paresi lodi be titoua. Ngan la le titoru nen nga, a nen ngan be Yesu koon kapsap ye betanga sa nga, ngan tiweteweta a tipaposi ye betanga ki tina yo iwete nga. Bong ngan Yesu itur du iwodowodo tana ye baene buruburene. ⁷Ngan ye kene tani in di tooltool tina ngan titor tootoo, le nga itot a imadit le lo ikodo, inbe iwete pang di nen, “Kumata be ang tina ngan atu be taukan noonoo nga, ngan ya la be ikaua pat a ikata garup tani in ye muku i.” ⁸Iwete pang di nen, motong la itur du iwodowodo tana mulu nga.

⁹Ngan tilongo tina yo Yesu iwete nen nga, le nga di atu atu tipases a tidu pang tana. Di tooltool yo maimai ngan timuku, inbe yo kakase paunu nga, ngan titoo di a tidu le tiwulaia Yesu ya taleu iye garup tani in sila ikododo dama ki. ¹⁰Motong la itot a imadit le lo ikodo, inbe itoro garup tani nen, “Garup, di tooltool tina ngan tila ngai koot? Nga yelei a atu kidi iyepe be ipaposong ye urata dook tiap kiong yo kuyeii i, a be nen ngan tiyemenai ong ye, in tiap nga?”

¹¹Ngan garup tani in iyei ne, “Tool mai, tool atu sa iyepe tiap.” Motong la Yesu iwete panga nen, “Au lapau, au i o ke be apaposong ye urata dook

^k 7:52 Di tooltool alunu yo lodi galanga ye Rau ke Maro nga, ngan lodi tar be betanga yo Yowan iwodo ngan imot ye arono 52. Bong ngan di tooltool kapala tiseke betanga yo ke bingi dook mata ke Yowan i. Ngan betanga tina ngan la nookoot katai ngan iken ye tarkatingi limi be ru inbe arono 53 le lo ye tarkatingi limi be tol inbe arono 11 nga.

tiap kiong yo kuyei i, in tiap. Le nookoot nga kula ngan kuwulaia dada dook tiap kiong ke yeingi noonoo i.”

Yesu In Dawa Ben Sul Ke Di Tooltool Ke Tana

¹² Motong la Yesu iwete pang di tooltool tina yo ipatomonai di ngan mulu nen, “Au i la be ayei ben sul pang di tooltool ke tana i. Le kumata sei tool be iman itoo au nga, ngan o ke be ipa todo lono mulu tiap, bong ole ikaua sul ke yepongo dook mata yo taukan motingi i.”

¹³ Le nga di Paresi tiwete panga nen, “Ai, ong i nga ong taum kuwetewete ye urata le dada kiong yo kuyei nga sa. Ngan nanga, di tooltool yo tilongo betanga kiong nga, ngan o ke be titara lodi medana ye betanga kiong pitiap yege.”

¹⁴ Motong la Yesu iraua betanga kidi nen, “Moolmool, au tauk i awetewete ye urata le dada kiau yo ayei nga, bong di tooltool ke be titara lodi medana ye betanga kiau, yesoo au i lok galanga ye ni yo apa ye a asi i, inbe ye ni yo be amulu a alo pang ye i. Bong ang nga lomim galanga ye ni yo apa ye a asi i, inbe ye ni yo be amulu a alo pang ye i, in tiap. ¹⁵ Ang nga be kakarata betanga kidi diemim ye dada kidi yo tiyei nga, ngan katoo dada kidi tooltool ke tana i leu. Bong au tauk i akarata betanga ke tool sa ye dada ki yo iyei nga, ngan tiap. ¹⁶ Bong kumata le be akarata betanga ke tool sa ye dada ki yo iyei nga, ngan matin nga le atoo betanga yo moolmool nga leu. Yesoo, au ataleu la akarata betanga, i tiap, bong aye Tamak yo iwangau a asi i, in la amru amyei urata nen i. ¹⁷ Ngan ye ger kiang ang tapmim i, in tiwode nen, be di tooltool ru tiwete betanga atu nga, ngan betanga kidi in moolmool. ¹⁸ Le kumata be au tauk i awetewete ye urata le dada kiau yo ayei nga, inbe Tamak yo iwangau a asi in ikata suanga ye nga, ngan betanga kiau ngan moolmool.”

¹⁹ Yesu iwete nen, motong la di Paresi tina ngan titoru. Tiyei ne, “Tamam yo kuweta i, in iyepe ngai?”

Motong la iraua betanga kidi nen, “Ang nga lomim galanga yau tiap, ngan la le lomim galanga ye Tamak tiap nga. Kumata be lomim galanga yau nga, ngan ole lomim galanga ye Tamak lapau.” ²⁰ Ngan ye kene tani in Yesu iyepe potai pang ye rumu lono sokalanga yo titar pat ke bareme mai ke sungunu ye i, inbe iwete betanga nga a ipatomonai di tooltool ye. Bong tool sa ikauu a be iparama ngan tiap, yesoo lal ki, in pombe tiao.

Di Yuda Lodi Pang Longono Betanga Ke Yesu Tiap

²¹ Motong la Yesu iwete pang di tooltool tina ngan mulu nen, “Au i be ayegang nga, ngan ole kaserau, bong o kakamatau tiap. Inbe ang nga ole kammata ye noonoo kiang yo kayei nga. Ngan nen le ni yo be alo pang ye i, in ang nga o ke be kalo ye tiap.”

²² Di Yuda tina ngan tilongo yo Yesu iwete nen nga, le nga di tapdi tipartortor a tiyei ne, “Ai, kakamata ole ya taun iraumate a imata, too? Ye

punu in la le iwete nen, ‘Ni yo be alo pang ye i, in ang nga o ke be kalo ye tiap’ nga, too?”

²³Di tooltool tina tiwete nen, bong ngan Yesu isootoo betanga pang di a iyei ne, “Ang nga malala kiang naii lopo i, bong au i malala kiau la ete ni. Inbe ang nga ke tana i, bong au i ke tana i tiap. ²⁴Ngan nen la le muku ngan awete pang be ole kammata ye noonoo kiang nga. Le kumata be katara lomim medana pau be Au Tauk I Tool Tani Yo Iyepe Nen I, in tiap nga, ngan ole kammata ye noonoo kiang tina yo kayei nga.”¹

²⁵Motong la di tooltool tina ngan titoru nen, “Oo, ngan ong i sei?” Le nga iraua betanga kidi nen, “Au tauk awete ninau pang mukot le se nookoot nga. ²⁶Ngan au i betanga kiau alunu san la be awete a apaposang ye urata dook tiap kiang yo kayei nga. Bong o ayei nen tiap, yesoo Tool yo iwangau a asi i, in betanga ki ngan moolmool. Ngan la betanga yo alongo ye nga, ngan nanga la awete le imot pang di tooltool ke tana i nga.”

²⁷Yesu iwete pang di tooltool tina nen, bong di ngan lodi galanga ye yo nga iwetewete pang di ye Tamana, ngan tiap. ²⁸Motong la iwete pang di nen, “Ye kene yo be kayitmaka Tool Moolmool ke Maro ene ye in nga, ngan ole lomim galanga nen, Au Tauk I Tool Tani Yo Iyepe Nen I. Le au i ayeie so sa ye au tauk lok tiap, bong awete betanga ben tina yo Tamak ipatomonai au ye nga, ngan leu. ²⁹Ngan Tamak yo iwangau a le asi i, in iyepe yau. Le ke be iyegau a si au ataleu ayepe nga tiap, yesoo kanakana ngan atoo lono ye so le imot yo ayei nga.” ³⁰Di tooltool tina tilongo betanga yo Yesu iwetewete nga, ngan le di alunu la titara lodi medana panga nga.

Apram Di Natunu

³¹Motong la Yesu iwete pang di Yuda tina yo titara lodi medana panga ngan nen, “Kumata be kakap betanga kiau yo apatomonai ang ye nga le katoo nga, ngan ang nga ole kayei ben di galiuk moolmool. ³²Inbe ole lomim galanga ye betanga moolmool, inbe betanga moolmool tani ole ipamulang ye so yo ikau ang a iparamang i.”

³³Yesu iwete nen, motong la di Yuda tina ngan tiwete panga. Tiyei ne, “Ai, am nga sasa kiam la Apram i, le tool sa ikau am a amyeyi poranga panga pitiap. E nga yeleyi kuwete pam be betanga moolmool tani be ipamulam ye so yo be ikau am a iparamam in nga?”

³⁴Motong la Yesu iwete pang di nen, “Awete pang moolmool nen, di tooltool yo tiyei noonoo nga, ngan tiyei ben poranga pang noonoo. ³⁵Ngan tool yo iyei poranga pang tool mai ki i, in ke be iyepe so ye tool mai ki, ngan tiap, bong tool mai tani in natunu leu la be iyepe so ye i.

¹ 8:24 Pamulenge 3:14

³⁶Ngan nanga, kumata le be Natunu ipamulang ye so yo be ikau ang a iparamang in nga, ngan ole ipamulang moolmool le kayege so tani in.
³⁷Au i lok galanga yang be ang nga sasa kiang la Apram i. Bong lomim pang betanga kiau tiap, ngan nen le kakapye be karaumatau a amata.
³⁸Au i awetewete pang ye so yo Tamak ipatnai pau nga. E ang ngan kayei so le katoo dada yo tamamim iwete pang ye nga.”

³⁹Yesu iwete nen, motong la di Yuda tina ngan tiyei ne, “Am nga tamamam la Apram i.”

Motong la Yesu iwete nen, “Kumata be ang nga Apram di natunu moolmool nga, ngan matin nga le dada kiang ngan gaongo ben ke Apram.
⁴⁰Ngan au i awete pang ye betanga moolmool yo alongo ye Maro nga. Bong ang nga kakapye be karaumatau a amata. Ngan Apram in iyei dada yo nen, ngan tiap. ⁴¹Le ang nga kayei dada ben yo ang tapmim tamamim iyei nga.”

Yesu iwete pang di nen, ngan le tiraua betanga ki nen, “Am nga di tinamam tiyei bauk la le kapodi a tipasui am, nga tiap. Am nga Tamamam ataleu in la Maro i.”

Ang Nga Tool Kuto Mai Kidi So Sadi Di Natunu

⁴²Motong la Yesu iwete pang di nen, “Kumata le ang nga Tamamim moolmool la Maro in nga, ngan matin nga le lomim pau mai san, yesoo au i aye Maro amyepe, motong la asi nga. Inbe au i atoo au tauk lok la asi, nga tiap, bong ya la iwangau a asi i. ⁴³Bong nga yelei a lomim galanga ye betanga kiau yo awete ngan tiap nga? Ngan ye punu in nen, ang nga lomim be kalongo betanga kiau tina ngan kaparama, ngan tiap.
⁴⁴Le ang nga tamamim la tool kuto mai kidi so sadi i. Ngan nen le lomim mede be katoo dada yo ya lon dook mata ye nga. Ngan kulkulunu yege nga, ngan ya in tool ke raumatenge di tooltool. Inbe iparama betanga yo moolmool in tiap, yesoo betanga moolmool ngan sa iken ye tiap. Ngan ye kene yo be illung nga, ngan ole iwete betanga ki ke kaplungunu, yesoo ya in tool ke lungunu, inbe betanga yo ke kaplungunu nga, ngan tamana la ya in. ⁴⁵Bong au i awete betanga yo moolmool ngan pang, ngan le katara lomim medana ye betanga kiau, nga tiap. ⁴⁶Ngan ang nga sei tool ikamatau ben au i akapsap ye noonoo i? Le kumata be au i nga awetewete pang ye betanga moolmool nga, ngan yelei a katara lomim medana ye betanga kiau tiap nga? ⁴⁷Maro di natunu nga, ngan ole tilongo betanga ki yo iwete nga. Le ye punu yo lomim be kalongo betanga ke Maro ye tiap i, in nen, ang nga Maro di natunu tiap.”

Yesu Iwete Apram In Pombe Tiao, Ngan Ya In Iyepe Mukot

⁴⁸Yesu iwete nen, motong la di Yuda tiraua betanga ki. Tiyei ne, “Am nga amwete be ong in tool ke Samaria, inbe so sadi la idiwidiwong i. Ngan moolmool, too?”

⁴⁹Motong la Yesu iyei ne, “Tiap! Au i so sadi sa idiwidiwau tiap. Ngan au i nga ayitmaka Tamak ene, bong ang nga karautoo ek. ⁵⁰Au tauk i lok be ayeie ek le ilo ete ke be di tooltool tipayitau ye, nga tiap, bong Maro la lono be iyei dada nen pau i. Inbe ya in la tool ke karatanga betanga kidi tooltool i. ⁵¹Le awete pang moolmool nen, kumata sei tool be ikap betanga kiau nga le itoo nga, ngan o ke be imata pitiap yege.”

⁵²Di Yuda tilongo tina yo iwete nen nga, le nga tiyei ne, “Nookoot nga la lomam galanga yong nga, ong i so sadi idiwidiwong. Kumata, Apram iye di Maro koonoo ngan di le imot timmata. Bong ngan kuwete nen, ‘Kumata sei tool be ikap betanga kiau le itoo nga, ngan o ke be imata pitiap yege.’ ⁵³Nga yelei, ong in em mai le kulloso tamada Apram iye di Maro koonoo yo timmata koot nga, too? Ngan lom tar be ong in tool belei a le kuwete nen nga?”

⁵⁴Motong la Yesu iraua betanga kidi nen, “Kumata be au tauk i ayeie ek le ilo ete ke be di tooltool tipayitau ye nga, ngan urata kiau yo ayei ngan ben so sokorai. Bong Tamak yo kawete be ya in Maro kiang i, in ya la iyeie ek le ilo ete i. ⁵⁵Ngan ang nga lomim galanga ye tiap, bong au i lok galanga ye. Ngan kumata le awete be au i lok galanga ye tiap nga, ngan au i tool ke kaplungunu dawa ben ang nga. Bong lok galanga ye, ngan la le akap betanga ki inbe atoo nga. ⁵⁶Muku ngan tamamim yo Apram in lon ponana be ikamata lal kiau yo be asi ye i. Yeisa be ikamata, ngan le lon ponana kaiye.”

⁵⁷Di Yuda tilongo tina yo Yesu iwete pang di nen nga, le nga tiwete panga. Tiyei ne, “Ona, ong i rai kiong sangaul limi tiao, e nga yelei a kuwete be kumata Apram nga?”

⁵⁸Motong la Yesu iraua betanga kidi nen, “Awete pang moolmool nen, ye kene yo tipasuiu Apram tani in tiao nga, ngan Au I Ayepe Nen mukot yege.” ⁵⁹Yesu iwete nen, motong la di Yuda tina tikap pat a be tikatu ye, bong ngan itarkoo a iyege bareme mai ke sungunu lono inbe idu pang tana.

Yesu Ikarata Tool Yo Tinana Ipasuiu Ngan Matan Kis I

9 ¹Yesu iyege di Yuda tina, motong la ipa a ila, ngan ikamata tool atu in matan kis. Ngan tool tani in kene yo tinana ipasuiu ye i, ngan matana nga ikis nen. ²Motong la di galiunu tikamata tool tani le nga titoru nen, “Pannoongoo, sei iyei noonoo a le tinana ipasuiu ngan matan kis nen nga, ya taunu, too tamana le tinana?”

³Titoru nen, motong la Yesu iraua betanga kidi nen, “Ya taunu, too tamana le tinana la tiyei noonoo ngan la le matana nga ikis nen, ngan tiap. Bong so yo nen in be pombe ye, a be nen ngan ikarata dada pang Maro be ipatnai gurana le urata ki le iken mallangana pang di tooltool.

⁴Nookoot nga ni galanga nen, le kin tayeie urata ke tool yo iwangau a asi

i. Kumata be tayepe nen le lo bong pombe nga, ngan kene tani in tool sa ke be iyei urata yo nen ngan mulu tiap. ⁵Ngan ye kene yo ayepe ye tana i nga, ngan au i la be ayei ben sul pang di tooltool ke tana i.”

⁶Yesu iwete nen a imot, motong la ikoronai ngoonoo du ye tana, inbe isaraii ye baene le iyei ben tingi, motong ikap a isirimi tool mata kis tani, in matana ye. ⁷Inbe iwete panga nen, “Kula le la kupusu matam ye ran kelingi yo ene Siloam ni.” (Ngan betanga yo Siloam i, in punu ben Tiwanga). Le nga tool tani in ila la ipusu matana, motong la ye kene yo be imulu a ila pang rumu ki ye in nga, ngan le matan galanga a ikamata ni ye dook mata.

⁸Motong la di tooltool yo tiyepe potai ye nga, ngan tiye di tooltool kapala yo muku ngan tikamata igaugau pat le so ye di tooltool nga, ngan tikamata le tipartortor nen, “Ai, i tool tani yo muku ngan iwurur a igaugau pat le so in naii, too?”

⁹Ngan di tooltool kapala tiyei ne, “E, ya tani naii.” Bong di kapala tiyei ne, “Tiap, ya in matana dawa ben tool tani in leu, bong in tool san.” Ngan tiwete nen, motong la tool tani iyei ne, “Ai, i au tani naii.”

¹⁰Le nga di tooltool tina ngan titoru. Tiyei ne, “Nga kuyei belei a le matam rere, inbe kumata ni ye nga?”

¹¹Motong la iwete pang di nen, “Tool yo tipootoo ene ye Yesu i, in iyei tana le iyei ben tingi, motong la isirim matak ye, inbe iwete pau be la apusu matak ye ran kelingi yo Siloam i. Le nga ala la apusu matak ye ran tani, ngan la le matak rere a akamata ni ye nga.”

¹²Iwete nen, motong la di tooltool tina ngan titoru. Tiyei ne, “Ngan tool tani in iyepe ngai?”

Ngan iyei ne, “Atoo, au i lok galanga ye tiap.”

Di Paresi Titor Panini Tool Tani Ye Tool Yo Ikarata I

¹³Motong la tikaua tool tani yo muku ngan matan kis i, in a tila pang ye di Paresi. ¹⁴Yesoo, ye kene yo Yesu iyei tana le ben tingi a ikarata tool tani in matana le dook mata ye i, in ye lal kidi Yuda ke sungunu.

¹⁵Motong la di Paresi tina ngan titoro tool tani. Tiyei ne, “Ai, matam nga yelei a le dook mata nga?”

Ngan tool tani in iwete pang di nen, “Isirim matak ye tana yo iyei le ben tingi nga, motong la apusu matak ye ran, ngan la le nookoot nga matak rere a akamata ni ye nga.”

¹⁶Iwete pang di nen, motong la di Paresi kapala tiyei ne, “Tool in Maro iwanga la isi, nga tiap, yesoo ikap tutu lal kiidi Yuda yo ke sungunu, in tiap.”

Bong di Paresi tina kapala tiyei ne, “Nga yelei, tool yo ke yeingi noonoo i, in ke be iyei mos yo nen nga?” Ngan nen le di tapdi tiparpoto.

¹⁷Motong la di Paresi tina ngan tiportak be titoro tool mata kis tani, in mulu nen, “Lom tar be tool tani yo iyei ong le matam rere i, in tool belei?”

Ngan iraua betanga kidi nen, “Ya in Maro koonoo atu.”

¹⁸Muku ngan tool tani in matan kis, motong la nookoot nga matan rere nga, bong di kuto maimai ke di Yuda titara lodi medana ye yo nen, ngan tiap. Le nga tiwanga pang tamana le tinana a timan. ¹⁹Timan, motong la titor di nen, “Ai, i angru natumim tani yo kawete be ye kene yo tinana ipasuiu ye in nga, ngan matan kis, in naii, too? Ngan nga yelei a le nookoot ngan ikamata ni nga?”

²⁰Ngan tamana le tinana tiyei ne, “Amru nga lomam galanga ben i natumam, inbe kene yo tinana ipasuiu ye in nga, ngan matan kis. ²¹Bong yelei a le nookoot nga ikamata ni, inbe sei tool iyei matana nga le irere i, in amru nga lomam galanga ye tiap. Le be nen ngan katoru. Ya in tool maiyoko, le ole ya taunu iwete pang.” ²²Ngan tool tani in tamana le tinana titattadai di Yuda, ngan la le tiwete betanga nen nga. Titattadai di nen, yesoo muku ngan di kuto maimai ke di Yuda tiraua betanga be kumata le tool sa iwete a ipapos ben Yesu in Kirisi nga, ngan ole tigunkala le ke be ilo rumu kidi Yuda ke gaongo in lono lo iye di tigaua mulu tiap. ²³Ngan ye punu in la le tool tani tamana le tinana tiyei ne, “Katoru. Ya in tool maiyoko oo.”

²⁴Motong la di Yuda tina ngan tikiui tool tani yo matan kis in paru ki man tiwete panga nen, “Nookoot nga kuyitmaka Maro ene, inbe kuwete betanga moolmool pam ye matana. Oo kuwete, am nga lomam galanga be tool yo kuweta i, in tool ke yeingi noonoo.”

²⁵Tiwete nen, motong la iraua betanga kidi nen, “Au i lok galanga tiap be ya in tool ke yeingi noonoo, too tiap. Bong so ataleu yo lok galanga ye, in nen, muku ngan matak kis, bong nookoot nga matak rere le akamata ni ye.”

²⁶Motong la di Yuda tina ngan titoru mulu nen, “Tool tani in iyeie soo so pong? Inbe iyei matam belei a irere nga?”

²⁷Titoru nen, motong la iraua torungu kidi. Iyei ne, “Awete pang a kalongo koote. E nga yelei a lomim be kalongo mulu nga? Ang nga o lomim be kayei ben di galiunu lapau, too?”

²⁸Tool tani in iwete nen, le nga di Paresi tina ngan katedi malmal le tiwete panga nen, “Ong in la kuyei tool tani in galiunu i. Bong am nga Mose di galiunu. ²⁹Inbe am nga lomam galanga nen, betanga yo Mose ikap, ngan Maro iwete kes panga. Bong tool in, lomam galanga ye ni yo ipa ye, in tiap.”

³⁰Motong la tool tani in iraua betanga kidi nen, “Tool ni la iyei matak nga le irere mulu i. E, nookoot nga kawete gogomim a kawete be lomim galanga ye ni yo ipa ye, in tiap. ³¹Idi nga lod galanga nen, Maro in ke be ilongo betanga ke di tooltool yo ke yeingi noonoo, ngan tiap. Bong ya in ole ilongo betanga ke tool yo isung panga, inbe itoo dada le imot yo Maro lono be itoo nga. ³²Ngan mukot yege ni le se nookoot nga, ngan talongo

touo gasanga ke tool sa be iyeie tool atu yo tinana ipasuiu ngan matan kis in le matan rere, ngan tiap. ³³Le kumata be tool i Maro iwanga la isi ngan tiap nga, ngan matin nga le iyei so yo nen, nga tiap.”

³⁴Iwete nen, motong la di Paresi tiraua betanga ki nen, “Ong in ye kene yo tinam ipasui ong ye in nga, ngan kupa ye noonoo la kusi nga. E nga yelei, be kupatomonai am, too?” Motong la di Paresi tina ngan tigunkala le ke be ilo rumu kidi Yuda ke gaongo in lono lo iye di tigaua mulu tiap.

Di Tooltool Yo Titara Lodi Medana Tiap Nga, Ngan Tiyei Dawa Ben Di Tooltool Mata Kis

³⁵Yesu ilongo betanga ke so tina yo pombe ye tool tani nga, le nga la ipuske, motong la iwete panga nen, “Ai, kutara lom medana pang Tool Moolmool ke Maro, too tiap?”

³⁶Motong la tool tani itoru nen, “Tool mai, atorong, Tool Moolmool ke Maro, in sei? Oo, kuweta pau a nen ngan atara lok medana panga.”

³⁷Tool tani in iwete nen, motong la Yesu iyei ne, “Tool yo nookoot kumata i, in ya tani naii la iwetewete pong i.”

³⁸Motong la tool tani in iyei ne, “Tool Mai, au i atara lok medana pong.” Motong la igun turunu, inbe isung pang Yesu.

³⁹Motong la Yesu iwete panga nen, “Ye punu yo au i asi tana ye i, in be si akarata betanga ke di tooltool ye dada le urata kidi yo tiyei nga. Ngan nanga, di tooltool yo matadi kisis nga, ngan ole matadi rere a tikamata ni mulu. E di tooltool yo matadi rere a tikamata ni nga, ngan ole tiyei ben di mata kis.”

⁴⁰Yesu iwete nen, motong la di Paresi pattu yo tiyepe potai ye nga, ngan tilongo tina yo iwete nen nga, le nga titoru. Tiyei ne, “Ai, nga yelei? Kuwete be am nga matamam nga ikisis lapau, too?”

⁴¹Motong la iwete pang di nen, “Kumata be matamim ngan ikisis nga, ngan matin nga le taukamim busunu yo ke noonoo nga. Bong nookoot nga kawete be matamim ngan irere a kakamata ni, le noonoo kiang nangan la ikenen go ngan.”

Yesu In Tool Dook Mata Ke Be Matan Kala Di Sipsip

10 ¹Motong la Yesu iseke betanga ki mulu a iwete pang di nen, “Awete pang moolmool nen, tool yo be ilo pang ye di sipsip, ngan ipa ye dada ke koongoo tiap, bong irookoo sokorai ye ni san a ilo pang koongoo lono i, in tool ke pinnau inbe tool ke garungunu so kidi tooltool kapala. ²Bong tool yo ipa ye dada ke koongoo a ilo pang koongoo lono i, in tool yo be matan kala di sipsip i. ³Ngan nen le tool yo ikodokala dada ke koongoo i, in ole iso dada panga. Lo ngan be ikiu di sipsip ki tina ngan atu atu edi nga, ngan ole tilongo kalngana le titoo, inbe irara

di a tidu pang tana. ⁴Inbe ye kene yo be irara di sipsip ki ya taunu tina ngan a tidu tana le imot nga, ngan ole ipa le imuku, inbe titoo, yesoo lodi galanga ye kalngana oo. ⁵Ngan di sipsip tina ke be titoo sokorai tool san tiap. Kumata be tool san ikiu di nga, ngan ole tikoo, yesoo di ngan lodi galanga ye kalngana tiap.”

⁶Yesu iwete le ikatte betanga pang di Paresi nen, bong ngan lodi galanga ye betanga yo iwetewete pang di ye nga, ngan punu tiap. ⁷Le tina iwete pang di mulu nen, “Awete pang moolmool nen. Au tauk i la dada ke koongoo yo be di sipsip tipa ye i. ⁸Ngan di tooltool le imot yo timuku a timan pang ye di sipsip nga, ngan di tooltool ke pinnau, inbe di tooltool ke garungunu so kidi tooltool kapala, bong di sipsip tina tilongo kalngadi tiap. ⁹Ngan au tauk i la dada ke koongoo i. Ngan nen le kumata sei tool be iman yau a be nen ngan ilo pang koongoo lono nga, ngan ole apamule ye so dook tiap yo be igarungu i. Inbe ole ipa a ilo be isi, a be nen ngan ikap kaningi yo be ikan a itoka i. ¹⁰Ngan tool yo ke pinnau i, in iman be man ipinoo di sipsip, inbe iraumata di a be igarung di leu. Bong au i asi nga, ngan be si akaua yepongo yo dook mata le dook mata ki taunu i, in pang di.

¹¹“Au i la tool dook mata ke be matak kala di sipsip i. Ngan tool dook mata ke be matan kala di sipsip i, in ole ya taunu iraiia tinini be ilon di sipsip ki ye. ¹²Bong kumata le tikaua tool atu a titaru be matan kala di sipsip tina, a be nen ngan ikap pat ye urata kootoonoo ki leu nga, ngan ya in dawa ben di sipsip tina ngan taudi moolmool, in tiap. Le ye kene yo be ikamata gaunu gok be iman pang ye di nga, ngan ole iyege di sipsip tina sila tikino, inbe ikoo welewele a ila. Lo ngan be gaunu gok tani in ole iman a man ikan di, inbe inin di a timagirigiri a tikoo. ¹³Ngan tool tani in ole ikoo a ila, yesoo ya in iyei urata be ikap pat ye leu, le lon rru mata ye di sipsip tina, ngan tiap.

¹⁴“Au i la tool dook mata ke be matak kala di sipsip i. Le lok galanga ye di sipsip kiau, inbe di lodi galanga yau, ¹⁵dawa ben yo Tamak lon galanga yau, inbe au lok galanga ye nga. Inbe ole araia tinik be alon di sipsip tina ngan ye nga. ¹⁶Ngan au i di sipsip kiau kapala lapau, bong di ngan tiyepe ye koongoo i tiap. Le ole akap di a timan lapau, a nen ngan ole tilongo kook, inbe man agaua di tiye di sipsip kiau kapala nga le tiyepe ye budanga atu, inbe tool ataleu la be matan kala di i. ¹⁷Le ye punu i la le Tamak in lono pau mai san ye i, yesoo au i ole araia tinik a amata, lo ngan be amadit le se amaur mulu. ¹⁸Ngan tool sa ke be iraumata a amata le apa so, nga tiap, bong atoo au tauk lok la le ayei nen nga. Ngan au i gurana kiau ke be araia tinik a amata, inbe gurana kiau ke be amadit mulu le se amaur, yesoo atoo betanga yo Tamak ikap pau nga.”

¹⁹Yesu iwete nen a di Yuda tina ngan tilongo, le nga tiparpoto mulu.
²⁰Ngan nen le di alunu la tiyei ne, “Ai, nga yelei a kalongo tool in koonoo nga? Ya in so sadi idiwiwoo le ngan iyei kapakapa.”

²¹Bong ngan di diedi kapala tiyei ne, “Ngan betanga nga ke be tool yo so sadi idiwiwoo i, in iwetewete ye, nga tiap. Ngan lomim belei, so sadi in ke be iyeie tool yo matan kis in le matan rere, too?”

Yesu Iwete Be Iye Tamana Nga Ataleu

²²Ngan gaongo maiyoko ke sungunu yo be di Yuda lodi tut ye kene yo di sasa kidi tiso dada ke bareme ke sungunu ye i, in pombe Yerusalem. Ngan lal tani in pombe ngan igoro mou lapau. ²³Le nga Yesu ilo bareme mai ke sungunu lono, lo ipa ye ni yo tiwete ene ye Kookoowoo ke Solomon i. ²⁴Inbe di Yuda timan le man tigaua a tigaliu, inbe tiwete panga nen, “Ai, tayepe kaiye mata oo, ole nge lo kupapos pam a nen ngan lomam galanga yong? Kumata be ong i Kirisi nga, ngan kuwete pobe pam.”

²⁵Motong la Yesu iraua betanga kidi nen, “Au i awete pang oo, bong ngan katara lomim medana pau tiap. Ngan mos yo ayei ye Tamak ene nga, ngan be ipaposau pang a kakamata. ²⁶Bong ngan katara lomim medana pau tiap, yesoo ang nga di sipsip kiau tiap. ²⁷Di sipsip kiau nga tilongo kalngak a titoo au. Au i lok galanga ye di, ²⁸inbe ole akaua yepongo dook mata yo taukan motingi i, in pang di. Ngan nen le ke be timmata a tilledi, ngan tiap. Inbe tool sa o ke be man ipasnak di ye baek tiap lapau. ²⁹Yesoo, Tamak la ikap di pau i. Ya in gurana ki mai san le illos so nga le imot, le tool sa ke be man ipasnak di sipsip nga ye Tamak baene, ngan tiap. ³⁰Ngan au i aye Tamak nga ataleu.”

³¹Di Yuda tilongo tina yo Yesu iwete nen nga, le nga katedi malmal a tikap pat be tikatmate ye a mata, ³²bong ngan iwete pang di nen. Iyei ne, “Au i apatnai mos maimai alunu ke Tamak a kakamata oo. E nga mos nangai kakamata ngan lomim dook tiap ye a le kakap pat be kakatmatau ye i?”

³³Motong la di Yuda tina ngan tiwete panga nen, “Am nga be amkatmatong ye urata dook mata yo kuyei nga, ngan tiap. Bong kon paseme Maro, yesoo ong i tool sokorai, bong kuwete be ong taum in Maro. Le ye punu in la le amkap pat be amkatmatong ye i.”

³⁴Motong la Yesu iraua betanga kidi nen, “Betanga yo tiwodo lo ye ger kiang, ngan iwete nen, ‘Au i awete nen, ang nga maro.’”^m ³⁵Muku ngan Maro iwete betanga ki pang di tooltool, ngan le iwete be di ngan maro. Le betanga tina ngan tiwodo lo ye rau ki oo, le ke be tayege sa a idu tana, nga tiap. ³⁶Ngan au i, Tamak ya taunu la ipootau, inbe iwangau

^m 10:34 Rau ke Woungu 82:6

a le asi tana i. Bong ngan yelei a awete be Au i Maro Natunu nga, ngan kawete be akan paseme Maro nga? ³⁷Kumata le be ayei urata ke Tamak tiap nga, ngan kin katara lomim medana ye betanga kiau be. ³⁸Bong au i ayei urata ke Tamak. Ngan nen le kumata be katara lomim medana ye betanga kiau tiap nga, ngan katara lomim medana ye urata yo ayei nga, a nen ngan lomim galanga nen, au i Tamak iyepe yau, inbe au i ayepe ye Tamak.” ³⁹Yesu iwete nen, le nga di Yuda tina ngan tikapye be tikauu mulu a tiparama, bong ngan ilungmai di, inbe ikoo a ila.

⁴⁰Motong la Yesu imulu a ila ngan le la ikesiutu ran Yodan le ila pombe ye ni yo muku ngan Yowan irriu di tooltool ye i. Le nga sila iyepe ye ni tani, ⁴¹inbe di tooltool alunu la timan pang ye nga. Ngan timan, motong la di tapdi tiwetewete nen, “Ai, Yowan in iyei touo mos sa be iyei tarkilanga panga, ngan tiap, bong betanga le imot yo Yowan iwetewete ye tool i nga, ngan moolmool sa.” ⁴²Le ye kene tani in di tooltool yo tiyepe ye ni tani nga, ngan alunu la titara lodi medana pang Yesu nga.

Matenge Ke Lasarus

11 ¹⁻²Ngan tool atu yo ene Lasarus i, in matamatenge mai i kauu. Ya in iye di lini ru nga Mata iye Madia, ngan tiyepe ye malala yo ene Betani i. Ngan Lasarus lini yo Madia i, in garup tani yo be iti so ke saliningi yo kini ki dook mata i, in ilo Tool Mai kene pono, inbe imusmus ye ya taunu kutono raunu i. ³Le nga di lini tina ngan tiwanga pang Yesu nen, “Tool Mai, tool tani yo lom panga mai san i, in la matamatenge mai ikauu i.”

⁴Ye kene yo Yesu ilongo bangana kidi ye in nga, ngan le iwete nen, “Matamatenge ni ke be iyeie tool ni a imata le ipa so, ngan tiap. Bong be nen a nen ngan di tooltool tikamata gurana mai ke Maro. Le in dada yo be iyeie Maro Natunu ene le ilo ete ke be di tooltool tipayiti ye i.” ⁵Ngan Yesu in lono pang Mata iye toonoo inbe Lasarus mai san, ⁶bong ye kene yo ilongo betanga be Lasarus in matamatenge mai ikauu nga, ngan le ila tarai tiap. Iyepe ye ke ru mulu ye malala tani yo iyepe ye i.

⁷Le nga ke ru tina ngan imot, motong la iwete pang di galiunu nen, “Ai, nga ole tamulu a tala pang tana mai Yudia mulu.”

⁸Bong ngan di galiunu tina ngan tiwete panga nen, “Pannoongoo, nookoot sa airi ngan di Yuda tikap malmal pong a tikapye be tikatmatong ye pat nga. E nga yelei a be kumulu a kula pang ni nga?”

⁹Motong la Yesu iyei ne, “Nga yelei, manga yo ke be ipa ye muntu le du rrai, ngan sangaul be ru, too? Ngan nen le kumata tool be ipa kemai nga, ngan o ke be itutu tiap, yesoo ke isini le ikamata ni ye. ¹⁰Bong kumata tool be ipa bong nga, ngan ole itutu, yesoo taukan sul yo be ikamata ni ye i.”

¹¹Yesu iwete pang di nen a imot, motong la iwete pang di mulu nen, “Tool kiidi Lasarus ni ngo iken mata. Bong ole ala, a la apoongoo a imadit.”

¹²Motong la di galiunu tiwete nen, “Tool Mai, kumata le be iken mata nga, ngan ole matamatenge ki imot, le tinini dook mata mulu.” ¹³Ngan Yesu in iwetewete ye matenge ke Lasarus, bong di galiunu ngan lodi galanga tiap. Tiyeisa o Yesu iwete be Lasarus nga o iken mata moolmool.

¹⁴Motong la Yesu iwete pobe pang di nen, “Lasarus imata oo, ¹⁵bong au i lok ponana yo ala nango tarai tiap nga, a be nen ngan kakamata soo so yo be ayeei panga in nga, ngan ole katara lomim medana pau ye. Oo, kamadit a tala pang ye la takamata.”

¹⁶Yesu iwete nen a imot, motong la Tomas yo tiwete ene san ye Didimus i, in iwete pang Yesu di galiunu kapala ngan nen. Iyei ne, “Ai, be nen ngan idi lapau tamadit a taye Yesu tala, a nen ngan la tiraumatidi taye a tammata.”

Yesu Ilono Madia Iye Mata Le Lodi Iken Dook Mata

¹⁷Ye kene yo Yesu iye di galiunu tina ngan tipa le la pombe potai pang ye malala Betani ye in nga, ngan Yesu ilongo betanga ben Lasarus bobono in titaru lo agoro lono ke di matenge a iken ye ke pai oo. ¹⁸Ngan Betani tani in iken potai pang Yerusalem le manga mooloo tiap.” ¹⁹Le nga di Yuda alunu la timan pang ye Mata iye Madia be man tilon di a be nen ngan lodi modoko ye lidi yo imata i, in be.

²⁰Ngan ye kene tani yo Mata ilongo betanga ben Yesu la ipa dada i, motong la iyege Madia sila iyepe rumu, inbe ipakala a ila le la itauaraii dada. ²¹Motong la iwete panga nen, “Tool Mai, nga yo be kuyepe ni nga, ngan matin nga le lik imata tiap. ²²Bong nookoot nga lapau, au i lok galanga nen, kumata be kutoro Maro ye so sa nga, ngan ole ikauu pong.”

²³Mata iwete nen, le nga Yesu iyei ne, “Lim ni ole imadit mulu le imaur.”

²⁴Motong la Mata iwete panga nen, “Au i lok galanga nen, ole imadit mulu ye lal yo Maro itaru be ikarata betanga kidi tooltool ye i. Yesoo, ye lal tani ngan ole Maro ipamadit di tooltool matedi a timadit mulu le imot.”

²⁵Mata iwete nen, le nga Yesu iwete panga. Iyei ne, “Au tauk i la apamadit di tooltool mulu ye ni ke matenge i, inbe akaua yepongo dook mata pang di i. Ngan nen le sei tool be itara lono medana pau inbe imata nga, ngan ole imata le ipa so tiap, bong ole imadit mulu a iyepe ye yepongo dook mata tani in. ²⁶Inbe di sema tooltool yo timaurur go, inbe titara lodi medana pau nga, ngan o ke be timmata le tipa so tiap. Ngan ong i kutara lom medana ye betanga kiau nga, too tiap?”

²⁷Motong la Mata iwete panga nen, “E, Tool Mai, au i atara lok medana yong ben ong i Kirisi. Ong i Maro Natunu yo be iwanga a isi tana i.”

ⁿ 11:18 Manga yo iken kataunu ye malala Betani inbe Yerusalem i, in mooloo tiap ben kilomita tol leu.

Yesu Lono Pang Lasarus Le Itang

²⁸Mata iwete nen a imot, motong la imulu a ila koonoo pang toonoo Madia a man imangunngun panga. Iyei ne, “Pannoongoo tani in iman oo, le nga itor yong.” ²⁹Ye kene yo Madia ilongo betanga nen nga, ngan le palbe leu be imadit a ila pang ye Yesu. ³⁰Ngan Yesu ilo pombe malala tiao, bong iyepe ye ni tani yo Mata la itauaraii ye i. ³¹Le nga di Yuda yo tiye Madia tiyepe rumu lono a be tiloni a lono iken dook nga, ngan tikamata tina yo palbe leu be imadit a idu pang tana nga, le nga titoo a tidu. Ngan tiyeisa be idu a ila pang ye agoro ke di matenge yo titara Lasarus bobono ye i, a nen ngan la itang ye nango.

³²Madia imale a ila pombe ye ni tani yo Yesu iyepe ye i, le nga ikamata, motong la igun turunu du Yesu kene punu ke dama, inbe iwete panga. Iyei ne, “Tool Mai, nga yo be kuyepe ni nga, ngan matin nga le lik imata tiap.”

³³Ngan Yesu ikamata tina yo itang, inbe di Yuda yo titoo a tiye timan nga, ngan titang lapau nga, le nga Yesu lono gurrungu inbe katen pas.

³⁴Motong la itor di nen, “Ni nangai kataru ye i?”

Motong la tiwete panga nen, “Tool Mai, kuman man kumata.”

³⁵Yesu la ikamata le nga itang.

³⁶Ngan di Yuda tikamata tina yo itang nga, le nga tiyei ne, “Kakamata nga, ya ni lono pang tool ni mai san.”

³⁷Bong ngan di diedi kapala tiyei ne, “Ya ni ikarata tool yo matan kis in le matan rere mulu, e nga yelei a lono be ilono tool ni a nen ngan imata be, tiap nga?”

Yesu Ipamaditi Lasarus A Imadit Mulu

³⁸Yesu ipa le la pombe ye agoro tani yo titara Lasarus bobono ye i, le nga lono dook tiap, inbe katen pas mulu. Ngan agoro tani in iken ke kawal madini. Inbe pat somai atu la titapulu la tikatkala agoro koonoo ye i. ³⁹Motong la iwete pang di nen, “Oo, kapulu pat in a ikoo.”

Ngan tool tani imata in lini yo Mata i, in iwete panga nen, “Tool Mai, nookoot nga o ikini a dook tiap oo, yesoo imata a iken ye ke pai oo.”

⁴⁰Motong la Yesu iwete panga nen, “Muku ngan awete pong be kutara lom medana pau, ngan ole kumata gurana mai ke Maro.”

⁴¹Yesu iwete nen, le nga tipulu pat tani yo tikatkala agoro koonoo ye i. Motong la itada pang ete, inbe iyei ne, “Tamak, au i lok ponana pong yo kulongo pataraungu kiau nga. ⁴²Au i lok galanga, ong in kanakana ngan kulongo kook. Bong lok ye di tooltool yo tikododo ni nga, ngan la le awete nen, a be nen ngan titara lodi medana nen, be ong in la kuwangau a asi i.”

⁴³Yesu iwete nen a imot, motong la koonoo le mai nen, “Lasarus, kupas a kusi tana!” ⁴⁴Yesu koonoo nen, motong la Lasarus tani imadit a ipas

a isi tana. Ngan le ipa ye wam tina yo tipiu kene le baene le damono ye nga. Motong la Yesu iyei ne, “Kagoolook wam ngan ye, inbe kawete panga a ila.”

Di Tooltool Maimai Kidi Yuda Tisere Dada Yo Be Tiraumata Yesu Ye I
(*Matiu 26:1-5; Maka 14:1-2; Luka 22:1-2*)

⁴⁵Di Yuda tina yo timan be man matadi so Madia nga, ngan tikamata so yo Yesu iyeii i, le nga di alunu la titara lodi medana panga nga. ⁴⁶Bong di kapala ngan tila pang ye di Paresi la tiwete pang di ye so tani yo Yesu iyeii i. ⁴⁷Motong la di tooltool maimai ke paroranga so pang Maro tiye di Paresi tikiu di tooltool kuto maimai kidi Yuda yo matadi kala di ye momo le yepongo kidi nga, ngan man tigaua, inbe tiwete pang di. Tiyei ne, “Ai, nga ole tayei bele? Tool ni iyei gogo mos matana matana alunu san a iyei ben tarkilanga panga oo. ⁴⁸Kumata le tapatauu be iyei nen nga, ngan ole di tooltool le imot titara lodi medana panga. Lo ngan di Rom ole timan man tigarung di tooltool kiidi tipa ye bareme mai kiidi yo ke sungunu i.”

⁴⁹Motong la edi atu yo ene Kepas i, in iyei tool mai ke paroranga so pang Maro ye rai tani in, in iwete pang di nen, “Ang nga lomim galanga ye so siap yege! ⁵⁰Ang nga lomim galanga ye dada atu yo be ilonang, in lapau? Dada dook mata in nen: Kumata be tool atu ikol di tooltool kiidi a imata nga, ngan ole di tooltool kiidi le imot sa tilledi tiap.”

⁵¹Kepas iwete betanga nen ye ya taunu lono tiap, bong iyei tool kuto mai ke paroranga so pang Maro ye rai tani in, ngan la le iwete betanga ben di Maro koonoo ye Yesu yo be imata a nen ngan ilon di Yuda i.

⁵²Ngan imata nga, ngan be ilon di Yuda leu tiap, bong be igaua Maro di natunu le imot yo timagirigiri a tiyepe nin la nin nga, a be nen ngan man tigaua ye budanga atu. ⁵³Le nga ye ke tani in a ilo nga, ngan di tooltool maimai kidi Yuda tigaua a tirau betanga, inbe tisere dada yo be tiraua Yesu ye a imata i.

⁵⁴Ngan nen le Yesu ipa mallangana mulu la di Yuda matadi tiap, bong iyege ni tani in, inbe ila iyepe ye ni atu yo iken potai pang ye ni sorrakene i. Ila pombe, motong la iye di galiunu sila tiyepe ye malala atu ke ni tani yo ene Epraim i.

⁵⁵Ye kene tani in lal maiyoko kidi Yuda yo be lodi tut ye Paskimoolooningi ke Maro i, in potai be pombe. Le nga di Yuda yo tiyepe ye malala kapala nga, ngan alunu tilo pang Yerusalem be lo titoo momo kidi Yuda a di tapdi tiyei di le tinidi galanga ye Maro matana muku ngan, lo ngan be lal ke Paskimoolooningi tani in pombe. ⁵⁶Tilo, motong la matadi saraia Yesu, ngan tikamata tiap. Le nga tilo tikodo koongoo lono ke bareme mai ke sungunu, inbe di tapdi tipartortor. Tiyei ne, “Ai, nga lomim tar bele? Ole ise ye lal maiyoko ke sungunu i lapau, too tiap?”

⁵⁷Bong di tooltool maimai ke paroranga so pang Maro tiye di Paresi tikap

betanga pang di tooltool nen, kumata le sei tool lon galanga ye Yesu be iyepe ngai nga, ngan be iwete pang di a be nen ngan tikauu a tiparama.

Madia Iti So Kini Ki Dook Mata Lo Yesu Kene

(Matiu 26:6-13; Maka 14:3-9)

12 ¹Ke limi be atu mulu la iken go pang dama nga, lo ngan be lal ke Paskimoolooningi Ke Maro, in pombe. Ye kene tani in Yesu ipa le la pombe Betani, ye malala ke Lasarus, tool tani yo ipamaditi mulu ye ni ke matenge i. ²Motong la di tooltool ke malala tani in tiyeie kaningi atu a be nen ngan tikanen ye Yesu, inbe lodi ponana ye. Le nga Mata iso kaningi a be imalimi di ye, inbe Lasarus la iye di tooltool yo tiye Yesu tikan so nga, ngan tiwur ye kookoowoo ke kaningi so. ³Motong la Madia lo ikaua so ke saliningi yo tikarata ye kai nad le pat ki mai san i, in a isi le si itioo lo Yesu kene pono, inbe imusmus kene ye ya taunu kutono raunu. Ngan so ke saliningi tani in kini ki dook mata san le ingaua rumu lono mai in le imot.

⁴Bong Yesu di galiunu tina ngan atu, yo ene Yuta Iskariot, tool tani yo be pang dama ni ngan ole itara Yesu la di koi ki baedi i, in iwete nen, ⁵“Ona tiap! Nga yelei takaua so ke saliningi ni a tayawari tiap nga? Nga yo be tayawari nga, ngan matin nga le takap pat silba^o ben 300, lo ngan be takap pat tina ngan pang di tooltool yo ballingadi tiap nga.” ⁶Ngan Yuta tani in lono ye di tooltool yo ballingadi tiap nga, ngan la le iwete nen, nga tiap. Bong iwete nen nga, yesoo ya in tool pinnaune. Ngan ya in urata ki ke be matan kala depe ke pat kidi, bong kanakana ngan ya taunu ipinoo pat tina yo titartar lo ye depe tani nga.

⁷Yesu ilongo tina yo iwete nen nga, le nga iyei ne, “Ai, kayege sila iyepe! Ya in itarmosaia so in pang lal yo be amata ngan tikaratau a tikelmai au ye i. ⁸Di tooltool yo ballingadi tiap nga, ngan kanakana ngan ole kaye di kayepe, bong au i o ke be ayang tayepe ye ke yo kanakana, ngan tiap.”

Di Tooltool Maimai Ke Paroranga So Pang Maro

Tiraua Betanga Be Tiraumata Lasarus

⁹Ye kene tani in, di Yuda malala mai la lodi galanga ye Yesu yo iyepe Betani nga, le nga tila be la tikamata. Ngan lodi be la tikamata Yesu leu tiap, bong be la tikamata Lasarus yo Yesu ipamaditi mulu ye ni ke matenge, in lapau. ¹⁰Le nga di tooltool maimai ke paroranga so pang Maro ngan tikarata betanga be ole tiraumata Lasarus a imata lapau. ¹¹Yesoo, di Yuda alunu la tikamata so yo Yesu iyei ye Lasarus i, le nga tiyege di kuto maimai tina, inbe tila le la titara lodi medana pang Yesu nga.

^o **12:5** Ngan pat silba atu in ben pat ke be tayimi tool atu ye urata kootoonoo ki ye ke atu yo ikau urata ye i.

**Yesu Lo Pombe Yerusalem Ngan Di Tooltool Tiyitmaka Ene Ben Ya In
Tool Kuto Mai Atu**

(Matiu 21:1-11; Maka 11:1-11; Luka 19:28-40)

¹²Tiyepe a bongbongini ki, le nga di tooltool malala mai tina yo tilo Yerusalem be lo tikamata lal maiyoko ke sungunu tani nga, ngan tilongo bingi ben Yesu la ipa dada i nga be se pombe Yerusalem. ¹³Motong la di tooltool tina ngan tikap so dawa ben kautuku raunu a tipakala a tidu pang diki be du tikamata. Le nga du tikamata, motong la koodi le mai nen.

“Tayitmaka Maro ene!

Maro ole iyei urata dook mata pang tool yo isi ye Tool Mai ene i.^p

Maro ole iyei urata dook mata pang tool yo iyei kuto mai a be matan kala tana kidi Isrel le imot i.”

¹⁴Ngan Yesu ikaua asara ke solanga di tooltool yo ene donki i, in kase paunu atu man iwur pono, inbe ipa ye a ilo pang Yerusalem. Ngan iyei nen le iye betanga tina yo tiwodo lo ye Rau ke Maro nga, ngan iwete nen,

¹⁵“Ang di tooltool ke malala mai Yerusalem yo iken ye kawal Saion i, kin katattadai be!

Kakamata, tool kuto mai kiang yo be matan kala tana mai kiang le imot i,

in ya la iwur ye donki kase paunu atu in pono, a ise i.”^q

¹⁶Ngan kulkulunu yege nga, ngan di galiunu lodi galanga ye betanga tina ngan punu tiap. Bong ye kene yo Yesu imadit mulu a Maro iyeie ene le ilo ete ke be di tooltool tipayiti nga, motong la lodi tut betanga yo muku ngan tiwodo a ilo ye Rau ke Maro ye nga, ngan iwete ye Yesu. Inbe ye kene tani in lodi tut ye so le imot yo di tooltool tiyei panga ngan lapau.

¹⁷Ngan ye kene yo Yesu koonoo pang Lasarus a imadit mulu ye ni ke matenge nga, ngan di tooltool malala mai la tiye Yesu tiyepe. Ngan la le di tooltool tina ngan timadit a tikaua bingi ye so tani yo Yesu iyeii i, in pang di tooltool. ¹⁸Ngan nen le di tooltool alunu la tilongo betanga ke mos tani yo Yesu iyeii a be iyei ben tarkilanga panga i, le nga timadit a tipakala a tidu pang diki le du titauaraii dada. ¹⁹Di Paresi tikamata di tooltool tina yo tiyei nen nga, le nga di tapdi tiwetewete nen, “Kakamata nga, nookoot nga idi nga o tayeie so siap, yesoo di tooltool le imot la titoo nga.”

Yesu Iwete Ye Matenge Ki

²⁰Di tooltool malala mai tina yo tilo pang Yerusalem be lo tisung ye lal maiyoko ke sungunu tani nga, ngan di tooltool kapala ngan di Girik. ²¹Le nga di Girik tina ngan tila pang ye Pilip, tool ke malala Betsaida yo iken ye tana mai Galili i. Tila ye, motong la tiwete panga nen, “Tool mai, am

p 12:13 Rau ke Woungu 118:25-26 **q 12:15** Sakaria 9:9

nga lomam be amkamata Yesu pa.” ²²Le nga Pilip la iwete pang Antares, motong la yaru timadit a tila la tiwete pang Yesu nga.

²³Motong la Yesu iraua betanga kidi yaru nen, “Lal yo Maro be iyeie Tool Moolmool ke Maro ene le ilo ete ke be di tooltool tipayiti ye i, in nookoot nga la pombe nga. ²⁴Awete pang moolmool nen, kumata be tool atu ipe dingding patunu du tana lono tiap nga, ngan ole isup tiap le kanono tani yo ataleu in la be iken i. Bong kumata be ipe du tana lono le kulini iwi nga, ngan ole isup a ipu le itar kanono alunu welewele. ²⁵Ngan nen le kumata tool atu be lono pang yepongo ki ke tana i mai san nga, ngan ole ilene. Bong kumata tool atu be iwala murini pang yepongo ki ke tana i nga, ngan ole ikaua yepongo dook mata yo taukan motingi i. ²⁶Le kumata sei tool be ilonau a iyei urata dawa ben kapraingi kiau nga, ngan ole itoo au. Ngan nen le ni nangai yo be ayepe ye i, in ole ya iyepe ye lapau. Inbe Tamak ole iyitmaka tool tani yo be iyei urata kiau i, in ene.”

²⁷Motong la Yesu iwete mulu nen, “Nookoot nga au i lok gurrungu san, le nga ole awete belei? Ole be ayei ne, “Tamak, kulonau a kugutaka so yo be pombe pang yau nookoot i”? Tiap! Au i ke be awete nen tiap, yesoo ye punu in la le asi tana i ye i, a be lal ke so moonoo nen nga, ngan pombe pang yau. ²⁸Le Tamak, ong taum kuyeie em le ilo ete ke be di tooltool tipayitong ye!”

Yesu iwete nen, motong la tool atu kalngana iwetewete ke malala ke Maro a isi nen, “Au i ayeie ek le ilo ete ke be di tooltool tipayitau ye oo, inbe ole ayei nen mulu.”

²⁹Ngan di tooltool malala mai tina yo tikododo potai ye Yesu nga, ngan tilongo, le nga tiyei ne, “Ai, looloo la itara i.” Bong ngan di tooltool kapala tiyei ne, “Tiap! Bangabangana ke Maro atu la iwetewete panga i.”

³⁰Tiwete nen, motong la Yesu iyei ne, “Betanga yo nookoot si kalongo nga, ngan isi be si ilonau tiap, bong be ilonang. ³¹Nookoot nga i lal yo Maro be ikarata betanga kidi tooltool ke tana i ye dada dook tiap kidi yo tiyei nga. Inbe ya in ole inganga tool yo iyei kuto mai a be matan kala tana mai i le imot i, in a ikoo. ³²Ngan au i nookoot nga ayepe ye tana i, bong pang dama ni be tiyitmakau le lo atuku kai palasingi kaini nga, ngan ole agaua di tooltool le imot a timan pang yau.” ³³Yesu iwete nen ngan be nen a ya taunu ipaposi ye dada yo be imata ye i.

³⁴Le nga di tooltool malala mai tina ngan tilongo, le tiyei ne, “Am nga lomam galanga be ger ke Maro iwete nen, be Kirisi in ole iyepe nen a tala. E nga yeiei a kuwete be ole tiyitmaka Tool Moolmool ke Maro nga? Ngan Tool Moolmool ke Maro in sei?”

³⁵Motong la Yesu iwete nen, “Awete pang nen, lal mooloo tiap la be sul iken kataunu yang nga. Le sul be ikenen yang nen go nga, ngan kapa ye nunngana, a be nen ngan todo idukang be. Yesoo, kumata le tool be ipa todo lono nga, ngan ole lon galanga ye ni nangai yo be ipa pang ye

i, in tiap. ³⁶Le nookoot nga ye kene yo sul tani in ikenen yang go nga, ngan katara lomim medana pang sul tani a be nen ngan kayei ben sul di natunu.” Yesu iwetewete pang di tooltool tina nen a imot, motong la iyege di sila tiyepe, inbe itarkoolene ye di a ipa a ila.

Di Yuda Alunu San La Titara Lodi Medana Pang Yesu Tiap Nga

³⁷Yesu iyei kaiye mos alunu a iyei ben tarkilanga panga be di tooltool tikamata, bong titara lodi medana panga pitiap yege. ³⁸Ngan iyei nen nga, ngan le lo iyei betanga ke Maro koonoo yo Esai in iwodo nga, le itar kanono moolmool. Ngan Esai tani in iwete nen,

“Tool Mai, sei be itara lono medana ye betanga kiam i,
inbe sei be ikamata gurana kiong yo kupapos ye urata yo kuyei
nga? Tool siap yege.”^r

³⁹Ngan ye punu yo titara lodi medana pang Yesu ye tiap in nen, yesoo Esai iwodo betanga san mulu in iwete nen,

⁴⁰“Maro iyei matadi le tikamata ni tiap,
inbe ipammata lodi le lodi galanga ye so siap.

Ole nen ngan matadi nga tikamata so ye, inbe lodi galanga ye
betanga punu,

ngan ole tiportak lodi a timulu pang yau a be nen ngan akarata di
le dook mata.”^s

⁴¹Esai in iwete nen, yesoo ikamata be pang dama ni ngan gurana mai ke Yesu ole iyeie ene le ilo ete ke be di tooltool tipayiti ye, ngan la le iwete betanga nen ye nga.

⁴²Ye kene tani in di tooltool yo titara lodi medana pang Yesu nga, ngan kapala ngan di kuto maimai lapau. Bong titattadai di Paresi, le lodi be tipapos lo medana kidi tina ngan ila mallangana tiap, yesoo ole nen ngan di Paresi tigunkala di le ke be tilo rumu kidi Yuda ke gaongo in lono lo tiye di tigaua mulu tiap. ⁴³Ngan di Paresi tina ngan lodi pang dada yo be di tooltool tiyitmak edi ye, in mai san, bong lodi pang dada yo Maro be iyitmak edi ye, in tiap.

⁴⁴Motong la Yesu iwete le maimai nen, “Sei tool be itara lono medana pau nga, ngan ya in itara lono medana pau leu tiap, bong itara lono medana pang Tamak yo iwangau a asi i, in lapau. ⁴⁵Inbe sei tool yo ikamatau i, in ikamata Tamak yo iwangau a asi i. ⁴⁶Ngan au i asi ye tana i nga, ngan dawa ben sul, a be nen ngan di sema tooltool be titara lodi medana pau nga, ngan o ke be tiyepe ye ni todo lono mulu tiap.

⁴⁷Le kumata sei be ilongo betanga kiau le itoo tiap nga, ngan au tauk i o apaposi ye urata dook tiap ki yo iyeii i, a be nen ngan Maro iyemenaii ye, ngan tiap. Yesoo, au i asi nga be si apapos di tooltool ke tana ye urata

^r 12:38 Esai 53:1 ^s 12:40 Esai 6:10

dook tiap kidi yo tiyei nga tiap, bong asi nga be si ikap di a apamulu di ye so dook tiap yo be igarung di i. ⁴⁸Bong sei tool be ikap betanga kiau a iparama tiap, inbe iwala murini pau nga, ngan betanga kiau tina yo awete nga, ngan ole ipaposi ye urata dook tiap ki yo iyeii i, a be nen ngan Maro iyemenai ye lal yo itaru be ikarata betanga kidi tooltool ye i. ⁴⁹Ngan au i awete sokorai betanga nga ye au tauk lok tiap, bong Tamak yo iwangau a asi i, in ya la ikap betanga nga pau be awete, inbe iwete nin dada yo be awetewete ye i. ⁵⁰Le lok galanga nen, betanga ke Tamak nga, ngan ke be ikaua yepongo dook mata yo taukan motingi i, in pang di tooltool. Ngan nen le betanga tina le imot yo awete nga, ngan atoo Tamak koonoo ye betanga yo iwete pau be awete nga.”

Yesu Ingas Di Galiunu Kedi

13 ¹Ngan ke ataleu iken go pang dama, lo ngan be lal maiyoko kidi Yuda yo be lodi tut ye Paskimoolooningi ke Maro i, in pombe. Le nga Yesu lon galanga nen, lal ki yo be iyege tana i inbe imulu a ilo pang ye Tamana i, in iman potai oo. Ngan kulkulunu yege le ise ye kene tani in nga, ngan Yesu lono mai san pang di tooltool ki ya taunu yo tiyepe ye tana i. Inbe ye kene yo be lo imata ye i, in ipatnaia dada yo be lono pang di mai le mai san moolmool ye i.

²Le nga rrai a Yesu iye di galiunu tigaua be tikan so. Ngan tool kuto mai kidi so sadi in idiwiwi Yuta Iskariot, yo Simon natunu i, in lono a be nen ngan itara Yesu la di koi ki baedi i. ³Ngan Yesu in lon galanga nen, ya in Tamana itar so tina nga le imot la baene be iyei tool kuto mai a matan kala. Inbe lon galanga nen, ya in Maro iwanga la isi nga, le ole imulu a ilo pang ye Maro. ⁴Le nga Yesu iwulai kaningi so, inbe imadit tina le idudu sousoungu mooloo ki in du tana, inbe ikap manmaningi pattu a iwitkala lo galini. ⁵Motong la iti ran du ye omai atu, inbe imadit ye ngasingi di galiunu tina ngan kedi a imanman ye manmaningi yo iwitkala lo galini i.

⁶Ngan iyei nen le la pombe ye Simon Pita, le nga Pita imadit tina le itoru nen, “Tool Mai, ngan lom belei, ole kungas kek, too?”

⁷Motong la Yesu iraua betanga ki nen, “So yo ayei nga, nookoot nga ong i lom galanga ye tiap, bong pang dama ni nga, ngan ole lom galanga ye.”

⁸Le nga Pita iwete panga nen, “Atoo, au i o ke be amalum pong be kungas kek pitiap yege.”

Pita iwete nen, motong la Yesu iyei ne, “Kumata le be angas kem tiap nga, ngan ong in o ke be kuyepe yau tiap.”

⁹Le nga Simon Pita iyei ne, “Tool Mai, be nen nga, ngan kungas kek leu be, bong kungas baik inbe kutok lapau.”

¹⁰Motong la Yesu iwete panga nen, “Tool be irriu koot nga, ngan ke be irriu mulu tiap, bong ole ingas kene leu, inbe tinini mai i igalanga

le imot. Ngan ang nga tinimim igalanga oo, bong ang nga le imot tiap.”

¹¹Ngan Yesu in lon galanga ye tool yo be itaru la di koi ki baedi in oo.

Ngan ye punu in la le iwete be di le imot ngan tinidi igalanga tiap nga.

¹²Yesu ingas di galiunu tina ngan kedi a imot, motong la isousou mulu ye sousoungu mooloo ki tani, inbe imulu la iwur ye nene. Motong la itor di nen, “Ai, ang nga lomim galanga ye soo so yo ayeii pang in lapau, too?

¹³Ang nga kakiu au ye ‘Pannoongoo’ inbe ‘Tool Mai’ nga, ngan kawete gorrau le dook mata, yesoo au i urata kiau tina nangan. ¹⁴Le kumata be au i Tool Mai inbe Pannoongoo kiang la angas kemim nga, ngan ole ang lapau, kayei nen a kangas di diemim kapala kedi. ¹⁵Ngan au i ayei dada nen pang nga, ngan be nen a matamim too, inbe ang lapau ole kayei dada dawa ben yo ayei pang nga. ¹⁶Awete pang moolmool nen, tool yo iyei urata ben kapraingi i, in ene mai le illoso tool mai ki, in tiap. Inbe tool yo tool san iwanga ye urata i, in ene mai le illoso tool yo iwanga i, in tiap lapau. ¹⁷Ngan nookoot nga ang ngan lomim galanga ye dada yo ayeii pang, in punu oo. Le kumata be katoo dook nga, ngan Maro ole iyei urata dook mata pang.

¹⁸“Betanga yo au i awete nga, ngan pang ang le imot tiap, yesoo au tauk i lok galanga ye di tooltool yo apootoo di pau nga. Bong dookoot be nen a betanga yo iken ye Rau ke Maro i, in ole kanono pombe moolmool. Ngan betanga tani in iwete nen, ‘Tool yo amru amkan porong i, in ole iyitmaka kene be iyirtoo au ye.’^t

¹⁹“Ngan so yo nookoot awete pang ye nga, ngan kanono pombe moolmool tiao. Bong au i lok be aso talngamim ye, a be nen ngan pang dama ni be pombe nga, ngan ole katara lomim medana nen be Au I Tool Tani Yo Iyepe Nen I. ²⁰Le awete pang moolmool nen, kumata sei tool be ikaua tool yo awanga a ila, in a iyei dada dook mata panga nga, ngan tool in ben iyei dada dook mata nen pau lapau. Inbe sei tool be iyei au dook mata nga, ngan tool in iyei dada yo nen ngan pang Tamak yo iwangau a asi i, in lapau.”

Yuta Itara Yesu La Di Koi Ki Baedi I

(Matiu 26:20-25; Maka 14:17-21; Luka 22:21-23)

²¹Yesu iwete pang di galiunu nen a imot, inbe ikanamiai ngan lon gurrungu san. Motong la iwete pobe pang di nen, “Awete pang moolmool nen, ang tina nga atu la be itarau la di koi kiau baedi i.”

²²Iwete nen, le nga di galiunu tina ngan lodi sarere le matadi ikenen ye di diedi, inbe lodi kaua urata nen, ngan iwete nen ye sei. ²³Ngan di galiunu tina ngan atu yo Yesu lono panga mai san i, in iwur potai pang ye lapau. ²⁴Le nga Simon Pita iyei tomonai ye kutono pang ene tani be itoru, ngan sei iwete nen ye i.

^t 13:18 Rau ke Woungu 41:9

²⁵Motong la galiunu tani, in irusu le la itadana Yesu, inbe itoru mos leu nen, “Tool Mai, ngan sei kuwete nen ye i?”

²⁶Le nga Yesu iyei ne, “Nga ole atepala porong kasin, inbe aroro ye sur yo iken omai lono i, lo ngan be akap pang ang tina nga atu. Ngan ya in tool tani yo awete nen ye i.” Motong la ikap porong kasin a iroro ye sur, inbe ikap pang Yuta Iskariot yo Simon natunu i. ²⁷Ye kene yo Yuta tani in ikap porong tina ngan ye in nga, ngan le Satan idewe a ilo lono.

Motong la Yesu iwete panga nen, “Soo so yo lom be kuyeii i, in kuyeii taraii.” ²⁸Yesu iwete panga nen, le nga di diede kapala yo tiye tiwur ye kookoowoo ke kaningi so nga, ngan tilongo, bong ngan lodi galanga ye betanga yo Yesu iwete ngan punu tiap. ²⁹Ngan Yuta tani in matan kala depe kidi yo ke pat i, le nga di tooltool kapala tiyeisa o Yesu iwete panga be la iyimi kaningi man tikan ye lal maiyoko ke sungunu tani, too be la ikap so pang di tooltool yo ballingadi tiap nga. ³⁰Ngan Yuta ikap porong kasin tina ngan a ikan, le tina palbe leu inbe ipas a idu pang tana. Ngan bong oo.

Yesu Iwete Ger Paunu Pang Di Galiunu

³¹Yuta ipas a idu tana a ila, motong la Yesu iwete nen, “So yo nookoot nga be pombe pang ye Tool Moolmool ke Maro i, in ole iyeie ene le ilo ete ke be di tooltool tipayiti ye. Inbe urata ki yo be iyeii i, in ole iyeie Maro ene le ilo ete ke be di tooltool tipayiti ye lapau. ³²Ngan kumata be iyeie Maro ene le ilo ete nga, ngan Maro ya taunu ole iyeie Natunu tani in ene le ilo ete nen lapau. Le mooloo tiap Maro ole iyeie ene le ilo ete ke be di tooltool tipayiti ye.”

³³Motong la iwete mulu nen, “Di natuk nga, ole ayang tayepe kasin, lo ngan be kaserau. Ngan betanga i muku ngan aweta pang di Yuda oo, ngan nanga nookoot nga aweta pang nga. Le malala yo be alo pang ye i, in ang nga o ke be kalo ye tiap. ³⁴Le nookoot nga be awete ger paunu pang nen: Lomim pang di diemim mai san. Ngan au i lok pang mai san, le katoo dada gaongo leu a lomim pang di diemim mai san nen lapau. ³⁵Kumata be lomim pang di diemim mai san nen nga, ngan ole di tooltool le imot lodi galanga ben ang nga di galiuk moolmool.”

³⁶Yesu iwete nen, le nga Simon Pita itoru. Iyei ne, “Tool Mai, nga be kulo pang ngai?” Motong la Yesu iraua betanga ki nen, “Malala yo be alo pang ye i, in nookoot nga ong i o ke be kutoo au a aru talo ye tiap. Bong pang dama ni nga, ngan ole kutoo au le kuse ye.”

³⁷Motong la Pita itoru mulu nen, “Tool Mai, nga yelei a nookoot nga ke be atoo ong tiap nga? Au i ole araia tinik be alonong a amata.”

³⁸Pita iwete nen, motong la Yesu iyei ne, “Ong i lom tar be ole kuraia tinim moolmool be kulonau a kumata, too? Ngan awete pong moolmool nen, bong katai nga, ngan ole tareke itang tiao, inbe kupataukala a kuwete le patol be ong i lom galanga yau tiap.”

Yesu In Dada Ke Be Di Tooltool Tipa Ye A Tilo Pang Ye Tamana

14 ¹Motong la Yesu iwete pang di galiunu mulu nen, “Ai, lomim gurrungu be. Bong katara lomim le imede pang Maro, inbe katara lomim le imede pau lapau. ²Rumu ke Tamak ni, lono sokalanga alunu san. Le nga amuku a alo nga, ngan be lo akarata ni pang. Ngan yo be betanga i moolmool tiap nga, ngan matin nga le awete nen pang tiap. ³Kumata le be alo akarata ni pang le imot nga, ngan ole amulu a asi be si akau ang, a be nen ngan ang lapau ayang talo le lo tayepe ye ni yo be ayepe ye i ⁴Ngan ang nga lomim galanga ye dada ke malala yo be alo pang ye i.”

⁵Yesu iwete nen, motong la Tomas itoru. Iyei ne, “Tool Mai, am nga lomam galanga ye ni yo be kulo pang ye, in tiap. Le nga ole amyei belei be lomam galanga ye dada ki nga?”

⁶Motong la Yesu iraua betanga ki nen, “Au tauk i dada, inbe betanga moolmool ke Maro, inbe yepongo dook mata yo taukan motingi i. Le tool atu sa ke be ilo pang ye Tamak ye dada san tiap, bong ye au ataleu. ⁷Kumata be lomim galanga yau moolmool nga, ngan matin nga le lomim galanga dook ye Tamak lapau. Le nookoot katai a ilo nga, ngan la be lomim galanga ye, inbe kakamata nga.”

⁸Motong la Pilip iwete panga nen, “Tool Mai, be kupatnaia Tamam pam nga, ngan ole iye lomam.”

⁹Le nga Yesu iyei ne, “Ona tiap! Pilip, au i ayang tayepe kaiye san, e nga lom galanga yau tiao, too? Kumata sei tool be ikamatau koot nga, ngan ya in ikamata Tamak oo. E nga yelei a kuwete be apatnaia Tamak pang nga? ¹⁰Nga yelei, o kutara lom medana ye betanga kiau yo awete be au i ayepe ye Tamak, inbe Tamak iyepe yau, ngan tiap, too? Ngan betanga yo awete pang nga, ngan au tauk i akap ye lok la awete, ngan tiap, bong Tamak yo iyepe yau i, in ya taunu la iyei urata ki i. ¹¹Le katara lomim medana ye betanga yo awete be au i ayepe ye Tamak, inbe Tamak iyepe yau i. Bong kumata le be kayei nen tiap nga, ngan lomim tut ye mos yo ayei ngan leu, a be nen ngan ipamadit lomim ngan katara lomim medana ye. ¹²Awete pang moolmool nen, kumata sei tool be itara lono medana pau nga, ngan ole iyei urata yo dawa ben ayei nga. Inbe ole iyei urata maimai le illos yo ayei nga, yesoo au i nga be alo pang ye Tamak. ¹³Inbe soo so yo kator ye, ye au ek nga, ngan ole ayei, a be nen ngan ayeie Tamak ene le ilo ete ke be di tooltool tipayiti ye. ¹⁴Ngan nanga, soo so be ang nga kator ye, ye au ek nga, ngan ole ayei.”

Yesu Ipamede Betanga Be Ole Iyawara Maro Amunu Silene A Isi

¹⁵Motong la Yesu iwete mulu nen, “Kumata le be ang nga lomim pau mai san nga, ngan ole katoo betanga kiau yo akap pang nga. ¹⁶Inbe au

i ole atoro Tamak, a nen ngan iyawara Loningi san mulu pang be iyepe yang ye ke tina yo kanakana nga le imot. ¹⁷Ngan Loningi tani in Maro Amunu yo be si ipapos betanga moolmool ke Maro pang i. Le di tooltool ke tana i nga, ngan o ke be tikauu tiap, yesoo di ngan tikamata tiap, inbe lodi galanga ye tiap lapau. Bong ang nga lomim galanga ye, yesoo iyepe yang, inbe ole iyepe lomim lapau. ¹⁸Au i ke be ayegang le si kayepe sokorai dawa ben kase madunu, ngan tiap, bong ole amulu a asi pang yang. ¹⁹Ngan nanga, ole tayepe le mooloo tiap, inbe di tooltool ke tana i tikamatau mulu tiap, bong ang nga ole kakamatau, yesoo, au i ole amadit mulu le ayepe ye yepongo yo dook mata i. Ngan nen le ang lapau ole kayepe ye yepongo dook mata tani. ²⁰Ye kene tani in ang nga ole lomim galanga nen, au i ayepe ye Tamak, inbe ang ngan kayepe yau, inbe au ayepe yang. ²¹Ngan nen le sei tool be ikap betanga kiau nga a iparama, inbe itoo nga, ngan ya in tool tani yo lono pau mai san i. Inbe tool tani yo lono pau mai san i, in Tamak ole lono panga mai san. Inbe au lapau ole lok panga mai san, le ole au tauk apatnai au panga.”

²²Yesu iwete nen, motong la Yuta Iskariot tiap, bong Yuta san in itoro Yesu nen, “Tool Mai, nga yelei a ong taum kupatnai ong pam, bong lom be kupatnai ong pang di tooltool ke tana i tiap nga?”

²³Motong la Yesu iraua betanga ki nen, “Kumata sei tool be lono pau mai san nga, ngan ole itoo betanga kiau yo apatomonai ang ye nga. Ngan nen le Tamak ole lono panga mai san, inbe ole amru amsi a si amyepes ye tool in. ²⁴Bong sei tool be lono pau mai san tiap nga, ngan ke be itoo betanga kiau yo apatomonai ang ye, ngan tiap. Ngan betanga yo awete pang a kalongo nga, ngan au tauk betanga kiau tiap, bong ke Tamak yo iwangau a asi i.

²⁵“Ngan ye kene yo ayang tayepe ye i, ngan awete pang ye so tina ngan le imot oo. ²⁶Bong Loningi tani yo be Tamak iwanga le ipa ye ek a isi i, in Maro Amunu Silene. Ya in ole ipatomonai ang ye so nga le imot, inbe ole ipamadit lomim a nen ngan lomim tut ye so le imot yo awete pang ye nga. ²⁷Ngan au i nga be ayegang a alo, le kayepe ye lo silene yo kiau i. Ngan lo silene kiau yo be akauu pang i, in dawa ben ke di tooltool ke tana i yo tiyei pang di diedi, nga tiap. Le kin katattadai a lomim gurrungu be.

²⁸“Ang nga kalongo yo awete pang nen, ‘Au i ole ayegang a alo, bong ole amulu pang yang a asi.’ Kumata le be lomim pau mai san nga, ngan ole lomim ponana yo be alo pang ye Tamak nga, yesoo Tamak in ene mai san le illosau. ²⁹Ngan lok be awete pang muku ngan, lo ngan be so tani in pombe, a be nen ngan ye kene yo be pombe ye in nga, ngan ole katara lomim medana pau. ³⁰Le au i o ke be ayolo betanga mata tiap, yesoo tool kuto mai yo matan kala tana i, in ya la iman i. Ngan ya in taukan gurana yo be iyeie so sa pau nga. ³¹Bong au i be ayei nen a be nen ngan

di tooltool ke tana i lodi galanga nen, au i lok pang Tamak mai san, ngan la le atoo koonoo be ayei soo so yo iwete pau ye be ayei nga.”

Yesu iwete pang di nen a imot, motong la iyei ne, “Oo, kamadit. Tayege ni a tala.”

Yesu In Ooroo Wain Kaini

15 ¹Yesu iwete nen a imot, motong la iwete pang di galiunu mulu nen, “Au i ooroo yo ene wain i, in kaini moolmool, inbe Tamak in kumu taunu. ²Ngan wain baene le imot yo ipu tiap nga, ngan Tamak ole ingedekat du tana. Inbe baene le imot yo ipu nga, ngan ole isolai le imallanga, a be nen ngan isudud paunu mulu nga, ngan ipu le kanono alunu welewele. ³Ngan ang nga ben ooroo wain baene yo kumu tamana isolai le imallanga nga, yesoo ang ngan katara lomim medana ye betanga yo awete pang nga. ⁴Le ang nga kayepe yau nga, ngan au i ole ayepe yang nen lapau. Ngan kumata le wain baene atu be iso ye wain kaini le imede tiap nga, ngan o ke be ya taunu ipu a itar kanono, ngan tiap. Ngan gaongo leu, kumata le ang ngan kayepe yau le kamede tiap nga, ngan o ke be kayeie so siap lapau.

⁵“Au i ooroo wain kaini, inbe ang ngan dawa ben wain baene. Ngan kumata tool be iyepe yau le imede inbe au ayepe ye nga, ngan ole urata ki yo iyei, ngan itar kanono dook mata. Bong kumata be iyepe yau tiap nga, ngan o ke be iyeie so siap lapau. ⁶Kumata le tool atu be iyepe yau le imede tiap nga, ngan ole dawa ben kai baene yo tingedekati a tikatte le iwor i. Ngan kai baene yo nen nga, ngan ole di tooltool tiwinoko, inbe tikatte lo ei lono a ei ikan. ⁷Bong kumata be kayepe yau le kamede, inbe kaparama betanga kiau a katoo dook nga, ngan soo so yo lomim be katorau ye nga, ngan ole akap pang le imot. ⁸Inbe ye kene yo be kayei so nen le itar kanono nga, ngan ole ipaposang ben ang ngan di galiuk moolmool. Le ye dada in la be kayeie Tamak ene le ilo ete ke be di tooltool tipayiti ye i.

⁹⁻¹⁰“Au i lok pang mai san, dawa ben Tamak yo lono pau mai san i. Ngan kumata le be katoo betanga kiau yo akap pang nga, ngan ole lok pang mai san, dawa ben yo atoo betanga ke Tamak nga, ngan le Tamak lono pau mai san nga. Ngan nen le kaparama dada tani yo be lok pang mai san ye i, in le imede.

¹¹“Ngan au i awete pang ye so nga le imot, a be nen ngan ayeie ang le lomim ponana dawa ben au i. Le moolmool, lo ponana kiang tani in ole mai le mai san. ¹²Le betanga kiau yo be katoo ngan nen: Lomim pang di diemim mai san, dawa ben yo au i lok pang mai san nga. ¹³Kumata tool atu be lono pang di tooltool ki mai san, le ya taunu iraiia tinini be imata a ilon di ye nga, ngan ya in ipatnaii ben dada ki yo be lono pang di tooltool ki ye mai san i, in illos dada yo kapala nga.

¹⁴“Kumata be katoo betanga kiau yo akap pang ngan dook nga, ngan ang nga ben di tooltool kiau. ¹⁵Ngan nen le au i ke be akiu ang ye kapraingi mulu tiap, yesoo tool yo iyei kapraingi i, in lon galanga ye so yo tool mai ki iyei, ngan tiap. Ngan nanga, ole akiu ang ye di tooltool kiau, yesoo betanga le imot yo Tamak iwete pau ye nga, ngan la awete pang ye koot nga. ¹⁶Ang ngan kapootau tiap, bong au i la apootang, inbe akap gurana pang be la kayei urata, a be nen ngan urata kiang tina ngan itar kanono, ngan kanono ole iken nen a tala. Le kumata be kapatarau pang Tamak ye au ek, inbe katoru ye so sa be ikauu pang nga, ngan ole ikauu pang. ¹⁷Le betanga kiau yo akap pang nga, ngan nen: Lomim pang di diemim mai san.”

Di Tooltool Ke Tana Ole Tikadono Yesu Di Galiunu

¹⁸Motong la Yesu iwete pang di galiunu tina ngan mulu nen, “Kumata le di tooltool ke tana i be tikadonang nga, ngan lomim tut nen, muku ngan tikadonau nen lapau. ¹⁹Kumata le be ang ngan kayepe ben di tooltool ke tana i nga, ngan ole lodi pang mai san ben ang ngan di tooltool kidi tapdi nga. Ngan ye punu yo tikadonang ye i, in nen, ang nga ke tana i tiap, yesoo apootang be ole kayege dada le momo yo ke tana i nga. ²⁰Le lomim tut betanga yo awete pang koot nga: ‘Tool yo iyei urata ben kapraingi i, in ene mai le illoso tool mai ki, in tiap.’ Ngan nanga, kumata be di tooltool tiyei dada dook tiap be tigarungau ye nga, ngan ole tigarungang nen lapau. Inbe kumata le titoo betanga kiau yo be apatomonai di ye nga, ngan ole titoo betanga kiang nen lapau. ²¹Ang ngan man katoo au le ole tiyei dada dook tiap yo nen ngan pang, yesoo di ngan lodi galanga ye Tool yo iwangau a asi i, in tiap. ²²Le au i yo be asi a si awete betanga nga pang di tiap nga, ngan matin nga le taukadi noonoo yo be tisolo nga. Bong nookoot nga, taukadi dada yo be tiyei ne, ‘Am nga lomam galanga be so yo amyei, ngan amkapsap ye noonoo, nga tiap.’ ²³Ngan nen le sei tool yo be ikadonau i, in ikadono Tamak nen lapau. ²⁴Ngan yo be amye di amyepe inbe ayei urata medana yo tool sa ke be iyei tiap, ngan tiap nga, ngan matin nga le taukadi noonoo yo be tisolo nga. Bong nookoot nga mos yo ayei ngan tikamata oo, bong tina la tikadonau le tipoorootau pa ye Tamak nga. ²⁵Le dada yo tiyeii i, in be nen a iyeie betanga atu yo tiwode lo ye ger kidi in le itar kanono moolmool. Ngan betanga tani in iwete nen, “Taukadi punu yo be tikadonau ye i.”^u

²⁶“Bong Loningi kiang yo be awanga a isi pang yang i, in iye Tamak tiyepe. Ya in Maro Amunu, inbe au i ole awanga a isi be si ipapos betanga moolmool ke Maro, inbe iwetewete pang di tooltool ye urata yo kiau

^u 15:25 Rau ke Woungu 69:4

nga. ²⁷Le ang lapau kawetewete pang di tooltool ye urata kiau, yesoo kulkulunu yege ye kene yo apamaditi urata kiau ye in nga, ngan la ayang tayepe tayepe a se nookoot katai nga.”

16 ¹Motong la Yesu iyei ne, “Au i awete pang nen nga, ngan be nen a lomim medana yo kataru pau i, in katte be. ²Ngan ole tingangang a kakoo ye rumu kidi Yuda ke gaongo. Inbe pang dama ni be lal pombe nga, ngan ole di tooltool yo tiraumatamatang a kammata nga, ngan ole lodi tar nen be nga tiyei urata dook mata pang Maro. ³Di ngan ole tiyei dada yo nen ngan pang, yesoo di ngan lodi galanga ye Tamak tiap, inbe lodi galanga yau tiap lapau. ⁴Ngan au i be awete betanga nga pang, a be nen ngan ye kene yo be tiyei dada nen pang nga, ngan ole lomim tut ye so yo awete pang ye nga. Kulkulunu ngan awete pang ye so yo nga tiap, yesoo au i ayang tayepe.”

Urata Ke Maro Amunu Silene

⁵Motong la Yesu iwete mulu nen, “Nookoot nga au i be amulu a alo pang ye tool tani yo iwangau a asi i, bong ang nga sa itorau be alo pang ngai, ngan tiap. ⁶Ang nga lomim modoko mai san ye betanga yo awete pang nga. ⁷Bong awete pang moolmool nen, ngan dook mata be ayegang a alo, a nen ngan alonang. Yesoo, kumata le be alo tiap nga, ngan Loningi kiang tani in o isi tiap. Bong kumata le alo nga, ngan la be ayawari a isi pang yang nga. ⁸Le ye kene yo be isi ye in nga, ngan ole ipagalanga di tooltool ke tana i lodi, le lodi galanga ye noonoo yo kidi nga, inbe ye dada dook mata noonoonoo yo ke Maro nga, inbe ye lal yo Maro itaru be iyemenai di tooltool ye i. ⁹Ngan nen le ole ipagalanga lodi a be nen ngan lodi galanga be di ngan tiyei noonoo, yesoo di tooltool yo nen ngan titara lodi medana pau tiap. ¹⁰Inbe ole ipagalanga lodi ye dada dook mata noonoonoo ke Maro, yesoo au i atoo dada noonoonoo ki le nga be alo pang ye Tamak, ngan ole ke be kakamatau mulu tiap. ¹¹Inbe ole ipagalanga lodi lapau ye lal yo Maro itaru be iyemenai di tooltool ye i, yesoo tool kuto mai yo matan kala tana i, in Maro ipaposi ye urata dook tiap ki yo iyeii i, in oo, le ole iyemenaii ye.

¹²“Au i betanga kiau alunu san la lok be awete pang ye nga, bong nookoot nga ole imoo pang be lomim galanga ye nga. ¹³Bong ye kene yo be Maro Amunu be isi a si ipapos betanga moolmool ke Maro nga, ngan ole ipasongosongang ye betanga tina yo moolmool nga. Le betanga yo be iwete pang ye nga, ngan iwete sokoraia sa ye ya taunu lono tiap, bong ole iwete pang ye betanga yo ilongo ye Tamak nga, inbe ole iwete pang ye soo so yo be pang dama ni ngan pombe nga. ¹⁴Ya in ole ikap betanga yau, lo ngan be iwete pang, a nen ngan ye dada yo iyeii nen i, in ole iyeie ek le ilo ete ke be di tooltool tipayitau ye. ¹⁵Ngan so le imot yo ke Tamak nga, ngan kiau. Ngan la le awete pang be Maro Amunu ole ikap betanga yau, lo ngan be iwete pang nga.”

Lo Modoko Ole Iportak Le Iyei Lo Ponana

¹⁶Motong la Yesu iwete pang di mulu nen, “Ole tayepe le mooloo tiap, ngan ole kakamatau mulu tiap. Lo ngan be kayepe kasin, ngan ole kakamatau mulu.”

¹⁷Ngan tina Yesu iwete nen a di galiunu tilongo nga, le nga di tapdi tipartortor. Tiyei ne, “Ai, betanga yo iweta paidi i, in punu belei? Iyei ne, ‘Ole tayepe le mooloo tiap, ngan ole kakamatau mulu tiap. Lo ngan be kayepe kasin, ngan ole kakamatau mulu.’ Inbe iwete mulu nen, ‘Ngan nen, yesoo nga be alo pang ye Tamak.’ Ngan yo iwete nen nga, ngan betanga ki in punu belei?” ¹⁸Le nga di galiunu tina ngan tipartortor mulu nen, “Ai, betanga yo iwete be ole tayepe le mooloo tiap i, in punu belei? Idi nga lod sarere ye soo so yo iwetewete ye i.”

¹⁹Yesu di galiunu tina ngan di tapdi tiwetewete nen nga, ngan ikamata di le lon galanga ben ole titoru ye betanga tina. Le nga iwete pang di nen, “Ang ngan kator panin di diemim ye betanga yo awete pang nen, ‘Ole tayepe le mooloo tiap, ngan o ke be kakamatau mulu tiap. Lo ngan be kayepe kasin, ngan ole kakamatau mulu.’ ²⁰Awete pang moolmool nen, ang nga ole lomim modoko, inbe katang, bong di tooltool ke tana i nga, ngan ole lodi ponana. Moolmool, ang nga ole lomim modoko, bong lo modoko kiang tani in ole palbe leu be iportak le iyei ben lo ponana. ²¹Le dawa ben garup yo lal ki ke pasuiungu ngan kapon massingi ye kase a be ipasuii i. Bong ye kene yo be ipasuii kase tani in koot nga, ngan ole lon kalli masngana, inbe lon ponana, yesoo ipasuii kase tani in a isi tana oo. ²²Ngan gaongo leu ye ang nga lapau. Nookoot nga lal kiang be ole lomim modoko, bong ye kene yo be akamatang mulu ye in nga, ngan ole lomim ponana. Ngan lo ponana kiang tani in tool sa o ke be ilelang ye, ngan tiap. ²³Ye kene tani in nga, ngan ang nga o ke be museremim be katorau ye so sa, ngan tiap. Le awete pang moolmool nen, kumata le be kapatarau pang Tamak, inbe katoru ye soo so ye au ek nga, ngan ole ikauu pang. ²⁴Mukot a ise nga, ngan katoru ye so sa ye au ek, ngan pitiap. Le kator ngan ole kakap so, a nen ngan ole lomim ponana le lomim ponana kaiye.”

Gurana Ke Yesu Illosa Gurana Ke Tana I

²⁵Yesu iwete nen a imot, motong la iyei ne, “Betanga yo awete pang nga, ngan akatte betanga ye leu. Bong pang dama ni be tagoro lal yo be pombe in nga, ngan ole awete pang nen mulu tiap, bong ole awete betanga mallangana pang ye Tamak. ²⁶Ye kene tani in nga, ngan au i ole akaua koomim, inbe apatarau pang Tamak a atoru be ilonang, ngan tiap, bong ang tapmim ole kapatarau panga ye au ek. ²⁷Ngan Tamak ya taunu in lono pang mai san, yesoo ang ngan lomim pau mai san le katara lomim medana pau be au i aye Maro amyeye, motong la asi nga. ²⁸Moolmool, au i apa ye Tamak la le asi tana i nga, le nookoot nga ole ayege tana i, inbe amulu a alo pang ye Tamak.”

²⁹Yesu iwete nen, motong la di galiunu tiyei ne, “Nookoot nga la kotte betanga tiap, bong kuwete betanga mallangana pam nga. ³⁰Le nookoot nga am nga lomam galanga nen, ong in lom galanga ye so nga le imot. Le ke be kunama tool sa be itorong ye torungu ki muku, lo ngan be kuraua torungu ki, ngan tiap. Ngan amkamata dada kiong yo nen i, le am nga amtara lomam medana nen, be ong in kuye Maro kayepe, motong la kusi nga.”

³¹Tiwete nen, motong la Yesu iyei ne, “Nookoot nga la o katara lomim medana nga, too? ³²Bong kapalongo, lal tani yo awete pang ye be pombe i, in nookoot nga pombe oo. Le mooloo tiap ngan ole kamagirigiri a ang atu atu kakoo pang ye malala kiang. Inbe ole kawulai yau le au taleu la be si ayepe i. Bong au taleu tiap, yesoo Tamak la be iyepe yau i. ³³Ngan au i awete betanga yo nga pang, a be nen ngan kaman yau man kayepe ye lo silene yo kiau i. Ye kene yo be kayepe ye tana i nga, ngan ole urata moonoo dook tiap la be pompombe pang yang nga. Bong kakodo le kamede, yesoo gurana yo ke tana i, in allosi oo.”

Yesu Ipatarau

17 ¹Yesu iwete nen a imot, motong la itada pang ete, inbe ipatarau nen, “Tamak, lal tani in pombe oo. Le kuyeie Natum ene le ilo ete ke be di tooltool tipayiti ye, a be nen ngan Natum iyeie em le ilo ete nen lapau. ²Ngan ya i, kouo gurana mai panga be iyei mai pang di tooltool nga le imot, a be nen ngan ikaua yepongo dook mata yo taukan motingi i, in pang di tooltool yo kop di panga nga. ³Ngan dada yo be di tooltool titoo ngan ole tikaua yepongo dook mata yo taukan motingi i, in nen. Di ngan ole lodi galanga yong ben ong taleu in la Maro moolmool i, inbe lodi galanga lapau ye Yesu Kirisi yo kuwanga a isi i. ⁴Ngan urata yo kop pau be ayei nga, ngan ayei porai a imot oo. Le ye dada yo ayei nen nga, ngan la le ayeie em le ilo ete ke be di tooltool ke tana i tipayitong ye nga. ⁵Le nookoot nga Tamak, kuyeie ek le ilo ete ke be di tooltool tipayiti, dawa ben yo muku ngan tana i pombe tiao inbe ayong tayepe ngan kuyeie ek le ilo ete nen nga.”

Yesu Ipatarau Ye Di Galiunu

⁶Motong la Yesu ipatarau mulu nen, “Au i apaposong pang di tooltool ke tana i yo kop di pau nga, ngan oo. Di ngan di tooltool kiong, motong la kop di pau nga. Inbe di ngan titoo betanga yo kiong ngan dook mata. ⁷Le nookoot nga lodi galanga nen, so le imot yo kop pau nga, ngan ipa yong. ⁸Inbe betanga le imot yo kuwete pau ye nga, ngan awete kes pang di a tilongo oo. Le nookoot nga lodi galanga nen, au i apa yong la asi nga, le titara lodi medana be ong la kuwangau a asi i.

⁹“Ngan nen le au i apatarau be alon di. Bong apatarau nga be alon di tooltool yo ke tana i, nga tiap. Au i apatarau nga be alon di tooltool yo kop di pau nga, yesoo di ngan di tooltool kiong. ¹⁰Le di tooltool le imot

yo kiau nga, ngan kiong, inbe di tooltool le imot yo kiong nga, ngan kiau. Di ngan la tiyeie ek le ilo ete ke be di tooltool tipayitau ye nga. ¹¹Ngan au i o ke be ayepe le mos mata ye tana i tiap, nookoot nga be asila pang yong. Bong di nga ole si tiyepe nanga la tana pono nga. Tamak, ong taleu in la em mison i, le matam kala di dook ye gurana kiong yo nookoot ngan kusuketi pau koot i, a be nen ngan tigaua le atu, dawa ben yo aru tagaua le atu nga. ¹²Ye kene yo aye di amyepe ye in nga, ngan matak kala di ye gurana kiong yo kusuketi pau i, le tiyepe dook mata. Ngan nen le di atu sa ilene tiap, bong atu kidi yo ilene le ipa so i, in ilene a be nen ngan iyeie betanga yo iken ye Rau kiong in le itar kanono moolmool.

¹³“Nookoot nga be ayege di a asila pang yong, bong ye kene yo be aye di amyepe ye tana i go nga, ngan lok be awete pang di ye betanga yo nga, a be nen ngan ayei di le lodi ponana dawa ben au i. Le moolmool, lo ponana kidi tani in ole mai le mai san. ¹⁴Betanga yo kiong nga, ngan awete pang di oo. Ngan la le di tooltool ke tana tikap malmal pang di ye nga, yesoo di ngan ke tana i mulu tiap, ben au tauk i, au i ke tana i tiap lapau. ¹⁵Le apatarau pong nga be kop di a tikoo ye tana i, nga tiap, bong be matam kala di dook ye tool dook tiap Satan, ole nen ngan igarung di. ¹⁶Di ngan di tooltool ke tana i mulu tiap, dawa ben au tauk i, au i ke tana i tiap lapau. ¹⁷Ngan betanga kiong ngan moolmool le imot, le lok be betanga kiong tina ngan iyei di le tirai lodi le imot pong be tiyepe yong dawa ben di tooltool kiong yo kupootoo di pong ong taum nga. ¹⁸Ong in la kuwangau a le asi tana i. Ngan nanga, nookoot nga ole awanga di tooltool tina yo kop di pau nga, ngan a tila ye di tooltool kapala yo tiyepe ye tana i nga. ¹⁹Ngan au i araia lok le imot pong be ayepe yong dawa ben tool kiong yo kupootoo pong ong taum i, a be nen ngan alon di ngan ole di lapau tirai lodi le imot moolmool pong be tiyepe yong dawa ben di tooltool kiong yo kupootoo pong ong taum ngan lapau.”

Yesu Ipatarau Ye Di Tooltool Yo Be Titara Lodi Medana Panga Nga

²⁰Motong la Yesu ipatarau mulu nen, “Patarangu kiau i, in be alon di galiuk leu ye tiap, bong apatarau nga be alon di tooltool yo tilongo betanga kidi galiuk yo tiwete nga, ngan le titara lodi medana pau, ngan lapau. ²¹Le Tamak lok be kugaua di tooltool tina le imot, le tiyepe ye budanga atu, dawa ben yo ong in kuyepe yau, inbe au i ayepe yong nga. Inbe di le imot tiyepe yidi aru lapau, a be nen ngan di tooltool yo ke tana i nga, ngan ole titara lodi medana nen, ong in la kuwangau a le asi i. ²²Ngan dada yo kuyeie ek le ilo ete ke be di tooltool tipayitau ye i, in nookoot nga ayiei pang di lapau, a be nen ngan tigaua le atu, dawa ben yo aru tagaua le atu nga. ²³Ngan au i ayepe ye di, inbe ong in kuyepe yau. Le ye dada yo i, au i lok be nen a tigaua lodi le atu moolmool, a be nen ngan di tooltool ke tana nga lodi galanga nen, ong in la kuwangau

a le asi i, inbe ong in lom pang di mai san dawa ben yo lom pau mai san nga.

²⁴“Tamak, au i lok be di tooltool le imot yo kop di pau nga, ngan tise yau se aye di amyepi ye malala yo be ayepe ye i, a be nen ngan tikamatau yo kuyeie ek le ilo ete ke be di tooltool ipayiti nga. Ngan mukot ye kene yo kutar lang le tana tiao nga, ngan lom pau mai san le kuyeie ek le ilo ete nen.

²⁵“Tamak, ong in tool noonoonoo. Di tooltool ke tana nga, ngan lodi galanga yong tiap. Bong au i lok galanga yong, inbe di galiuk nga lodi galanga nen, ong la kuwangau a le asi i. ²⁶Le au i la apaposong pang di a le lodi galanga yong i, le ole ayei nen pang di le ikenen leu. Ole ayei nen a be nen ngan lodi pang di tooltool mai san dawa ben yo ong in lom pau mai san nga. Inbe ole ayei nen a be nen ngan au tauk i lapau, ayepe ye di.”

Yuta Itara Yesu La Di Koi Ki Baedi I

(*Matiu 26:47-56; Maka 14:43-50; Luka 22:47-53*)

18 ¹Ye kene tani in Yesu ipatarau nen a imot, motong la iye di galiunu tipa le tikesiutu ran yo ene Kitron i. Ngan ran tani ke koonoo kapala in kumu atu yo tipe kai olip ye i, le nga Yesu iye di galiunu tina ngan tipa so le tilo kumu tani in lono.

²Ngan Yuta, tool tani yo be itara Yesu la di koi ki baedi i, in lon galanga ye kumu tani, yesoo kene kapala, ngan Yesu iye di galiunu lo tigaua nango. ³Le nga Yuta irara di tooltool ke patokongo budanga atu ke Rom tiye di bianga yo di tooltool maimai ke paroranga so le di Paresi tiwanga di nga, ngan a tila pang ye kumu ke olip tani. Di ngan tila ngan kapala tilanga sul a titoko, inbe di kapala ngan tikap so yo tika rata le ilolo dawa ben sul nga, inbe kapala ngan tikap dawa ke patokongo.

⁴Ngan Yesu in lon galanga ye so le imot yo be pombe panga, ngan oo. Le nga ipa le ila potai ye di, motong la itor di nen, “Ai, ang nga kasere sei?”

⁵Motong la tiraua betanga ki nen, “Am nga amsere Yesu ke Nasaret.”

Le nga Yesu iwete pang di nen, “I au tani naii.”

Ngan Yuta, tool tani yo be itara Yesu la di koi ki baedi i, in iye di tooltool tina ngan tikodede. ⁶Ye kene tani in yeisa be Yesu iyei ne, “I au tani naii,” ngan le tidikmai pang mur inbe timolol du tana.

⁷Motong la Yesu itor di mulu nen, “Ang nga kasere sei?” Ngan se tiyei ne, “Yesu ke Nasaret.”

⁸Le nga Yesu iwete pang di nen, “Awete pang muku oo, i au tani naii. Le au i la kaman be man kaserau i, a kakau au, inbe kayei di tooltool kiau nga be, a tila.” ⁹Yesu iyei nen, ngan le iyei betanga tina yo iwete muku nga le itar kanono moolmool. Ngan betanga tina ngan iwete nen, “Au i matak kala di tooltool yo kop di pau nga, ngan nen le di atu sa ilene tiap.”

¹⁰Ngan Simon Pita, in pul ki atu ke patokongo lapau. Le nga iposi tina le itarakede kapraingi ke tool kuto mai ke paroranga so pang Maro, in talngana oonoo, le imakede. (Ngan kapraingi tani in ene la Malkas i.)

¹¹Motong la Yesu iwete pang Pita nen, “Ai, kupariri pul kiong in a ilo ye nene mulu! Nga yelei, lom be ayin ye ruku ke masngana yo be Tamak ikauu pau i, in tiap, too?”

Tikaua Yesu A Ila Pang Ye Anas

¹²Motong la di tooltool ke patokongo tina ngan tiye kuto mai kidi yo matan kala di i, inbe di bianga yo tikodokala bareme mai ke sungunu nga, ngan tiparama Yesu a tipauu ye ooroo medana. ¹³Motong la tikauu a tila pang ye Anas yo Kepas roonoo i, in muku. Ngan Kepas tani, in iyei tool kuto mai ke paroranga so pang Maro ye rai tani in. ¹⁴Inbe ya in la muku ngan iwete pang di Yuda nen, “Dada dook mata in nen: Kumata be tool atu ikol di tooltool kiidi a imata nga, ngan ole di tooltool kiidi le imot nga sa tilledi tiap.”^w

Pita Ipataukala A Iwete Be Ya In Lon Galanga Ye Yesu Tiap (*Matiu 26:69-70; Maka 14:66-68; Luka 22:55-57*)

¹⁵Ye kene tani yo tikaua Yesu a tila pang ye Anas nga, ngan le Simon Pita iye Yesu galiunu san, in yaru titoo lapau a tila. Ngan tina tool kuto mai ke paroranga so pang Maro, in lon galanga ye Yesu galiunu san tani, ngan la le timalum panga be itoo Yesu a ilo pang koongoo lono nga.

¹⁶Bong Pita in iyepe ke diki potai pang ye dada, inbe inam. Le nga Yesu galiunu tani yo tool kuto mai ke paroranga so pang Maro, in lon galanga ye i, in imulu du iwete pang garup yo matan kala dada i, motong la ikaua Pita a yaru tilo pang koongoo lono nga. ¹⁷Tilo, motong la garup tani yo matan kala dada i, in itoro Pita nen, “Ong i o tool tani ni galiunu atu, too?”

Bong ngan Pita ipataukala a iyei ne, “Tiap! Au i tiap.”

¹⁸Ngan ni sil dook tiap, le nga di kapraingi ke tool kuto mai ke paroranga so pang Maro, ngan tiye di bianga tikodo le tiwakaia ei yo tipata i, inbe iloo di. Le nga Pita lapau ila iye di tikodo, inbe ei tani in iloo.

Tool Kuto Mai Ke Paroranga So Pang Maro Itor Panini Yesu (*Matiu 26:59-66; Maka 14:55-64; Luka 22:66-71*)

¹⁹Ye kene tani in tool kuto mai ke paroranga so pang Maro, in itor panini Yesu ye di galiunu, inbe ye betanga yo ipatomonai di tooltool ye nga. ²⁰Motong la Yesu iwete panga nen, “Au i betanga yo awete pang

^w 18:14 Yowan 11:50

di tooltool nga, ngan atarkoolek inbe awete sa sollono, ngan tiap, bong awete mallangana le imot. Le kanakana ngan apatomonai di tooltool ye ni nangai yo di Yuda timan tigaua ye i. Le apatomonai di ye rumu kidi Yuda ke gaongo, inbe ye bareme mai ke sungunu. ²¹E nga yelei be kutorau nen nga? Be nen ngan kutor di tooltool la tilongo betanga kiau nga. Di ngan ole lodi galanga ye betanga yo awete nga.”

²²Ye kene tani yo Yesu iwete nen ye in nga, ngan le bianga atu yo ikododo potai ye i, in ipodo damono, inbe iyei ne, “Ai, kuwete be in dada dook mata la kuraua betanga ke tool kuto mai ke paroranga so pang Maro ye i, too?”

²³Motong la Yesu iwete panga nen, “Kumata be awete betanga sa dook tiap nga, ngan kupaposi la mallangana. Bong be awete betanga dook mata nga, ngan nga yelei a le kurau sokorai au nga?” ²⁴Motong la Anas iwete le ooroo tina yo tipaua Yesu ye i, in iken ye nen, inbe tikauu a tila pang ye Kepas yo iyei tool kuto mai san ke paroranga so pang Maro i.

Pita Ipataukala A Iwete Mulu Be Ya In Lon Galanga Ye Yesu Tiap
(*Matiu 26:71-75; Maka 14:69-72; Luka 22:58-62*)

²⁵Ngan Simon Pita tani in ikododo a ei iloo. Le nga di tooltool tina yo tiye tikododo nga, ngan titoru mulu. Tiyei ne, “Ong i o tool tani ni galiunu atu, too?”

Bong ngan Pita ipataukala a iyei ne, “Tiap! Au i tiap.”

²⁶Motong la kapraingi atu ke tool kuto mai ke paroranga so pang Maro, in rara ke tool tani yo Pita itarakede talngana i, in iyei ne, “Ai, ong i ben akamatong kuye Yesu kayepe nango la kumu lono ke olip ngo, kuwete?”

²⁷Bong ngan Pita ipataukala mulu. Tina yo ngan ye kene tani in palbe leu inbe tareke itang.

Tikaua Yesu Lo Ikodo Dama Ke Pailot
(*Matiu 27:1-2, 11-14; Maka 15:1-5; Luka 23:1-5*)

²⁸Motong la di Yuda tikaua Yesu a tiyege rumu ke Kepas, inbe tikauu a tila pang ye rumu ke tool kuto mai kidi Rom yo matan kala tana mai Yudia i. Ngan ye kene tani in muntu yege, ngan di Yuda tina lodi kaua urata nen be di tapdi nga o tilo rumu lono ke tool kuto mai kidi Rom in tiap. Yesoo, ye ger kidi in igunkala di ke be tilo ye rumu ke di tooltool rara san tiap. Di Yuda tina ngan tiyei be nen ngan ole di tapdi tigarung di ye Maro matana ngan o ke be tikan asara ke lal yo be lodi tut ye Paskimoolooningi Ke Maro, in tiap. ²⁹Le nga tinam a tiyepe ke diki, inbe Pailot isi pang ye di si itor di nen, “Ang nga kakaua tool in se kapatokode a ikodo matak ye soo so?”

³⁰Pailot itor nen, motong la tiyei ne, “Kumata tool i be tool ke yeingi dada dook tiap kidi talnga dikidiki tiap nga, ngan matin nga le amkauu a amman pang yong tiap.”

³¹Le nga Pailot iyei ne, “Be nen ngan kakauu a kala, lo ngan be la kakarata betanga ki ye ger yo kiang ang tapmim nga.” Bong ngan di Yuda tina ngan tiyei ne, “Am nga, timalum pam ye raumatenge di tooltool tiap.” ³²Ngan so yo nen ngan be pombe, a be nen ngan iyeie betanga tina yo muku ngan Yesu iwete ye dada yo be imata ye i, in le kanono pombe moolmool.

³³Le nga Pailot imulu a ilo pang rumu lono, motong la ikiui Yesu a ilo le lo itoru nen. Iyei ne, “Oo kuwete, ong i la tool kuto mai yo matam kala di Yuda le imot i, too?”

³⁴Pailot itor nen, motong la Yesu iraua betanga ki. Iyei ne, “Ngan in torungu kiong ong taum, too tool sa la iwete pong yau la le kutor nen nga?”

³⁵Le nga Pailot iwete panga nen, “Nga yelei, kuwete be au i di Yuda atu, too? Ngan di tooltool kiong ong taum, tiye di tooltool maimai ke paroranga so pang Maro la tikau ong a kuse pang yau nga. Ngan ong i kuyeie soo so?”

³⁶Motong la Yesu iraua betanga ki nen, “Dada kiau yo be matak kala di tooltool ye i, in dawa ben dada ke di tooltool yo ke tana i, nga tiap. Ngan yo be atoo dada ben kidi tooltool ke tana i nga, ngan matin nga le di kapraingi kiau timadit a tirau di kuto maimai kidi Yuda yo timan be man tikau au a tiparamau nga. Bong dada yo ayei tool kuto mai a matak di tooltool kiau ye i, in dawa ben di tooltool kuto maimai yo ke tana i, nga tiap.”

³⁷Yesu iwete nen le nga Pailot itoru, “Ai, moolmool! Ong i o tool yo iyei tool kuto mai, ngan atu, too?”

Motong la Yesu iraua betanga ki nen, “Betanga kiong yo kuwete be au i tool kuto mai i, in moolmool. Ngan ye punu in la le tinak ipasui au a asi tana ye in nga, a be nen ngan awete betanga moolmool pang di tooltool nga le imot. Ngan nen le di tooltool yo lodi dook mata ye betanga moolmool nga, ngan ole tilongo betanga kiau.”

³⁸Yesu iwete nen, le nga Pailot itoru. Iyei ne, “Ngan betanga moolmool, in soo so?”

Motong la Pailot imulu a idu pang tana ye di Yuda tina du iwete pang di nen, “Ai, tool ni apuske touo so sa yo ikapsap ye, ngan tiap. ³⁹Bong momo kiang Yuda atu in nen: Ye rai kanakana nga, ngan kumata le be talo ye lal maiyoko kidi Yuda ke be lodi tut ye Paskimoolooningi Ke Maro in pombe nga, ngan ole katorau be apadu di tooltool yo tiyepe rumu dook tiap kidi talnga dikidiki lono nga, ngan atu a isi tana. Le lomim be apadu tool kuto mai yo matan kala di Yuda le imot in a isi pang yang, too?”

⁴⁰Pailot itor nen, bong ngan di Yuda tina ngan koodi a tiraua betanga ki. Tiyei ne, “Tiap, ya in kupadua be! Kupadu Barabas a isi pang yam!” Ngan Barabas tani, in muku ngan ipamaditi patokongo a be tinganga di Rom ye tana kidi Yuda, inbe ya in tool dook tiap ke pinnau lapau.

Pailot Iwete Be Tipatoto Yesu Lo Kai Palasingi Kaini

19 ¹Di Yuda koodi nen, motong la Pailot iwete pang di tooltool ke patokongo a tikaua Yesu la tisaliti ye ooroo medana. ²Inbe tikaua ooroo yo dongana iso in a titali, inbe titaru lo Yesu kutono. Motong la tisousouu ye sousoungu yo kooroonoo dook mata i,^x ³inbe tiyei sere ye a tipa a tilo be tisi inbe tiyei ne, “Aa, tool mai yo matam kala di Yuda le imot i, kemai dook!”

⁴Motong la Pailot tani in ipas mulu a idu tana du iwete pang di Yuda tina nen, “Kakamata, nga ole akauu a isila pang yang, bong lomim galanga nen, au i apuske touo so sa yo tool i ikapsap ye, nga tiap.” ⁵Le nga ye kene yo Yesu be ipas ye in nga, ngan ooroo yo dongana iso a titali i, inbe sousoungu kooroonoo ngan iken tinini, inbe ipa ye a idu pang tana. Motong la Pailot iwete pang di nen, “Kakamata, tool tani bi!”

⁶Yeisa be di tooltool maimai ke paroranga so pang Maro tiye di bianga be tikamata, yo ngan tina le oorootang inbe koodi le mai. Tiyei ne, “Kapatota lo kai palasingi kaini a imata! Kapatota lo kai palasingi kaini a imata!”

Di tooltool tina koodi nen, bong ngan Pailot iraua betanga kidi nen, “Ang tapmim kakauu la kapatota lo kai palasingi kaini. Au i apuske touo so sa yo tool i ikapsap ye, ngan tiap.”

⁷Motong la di Yuda tiraua betanga ki nen, “Ger kiam atu in iwete nen, tool be iyei nen ngan ole imata, yesoo iwete be ya in Maro Natunu.”

⁸Pailot ilongo di Yuda yo tiwete nen nga, le ittattadai welewele. ⁹Le nga imulu a ilo rumu lono lo itoro Yesu mulu nen, “Ai, ong i kupa ke ngai?” Bong Yesu mala be iwete touo kan betanga siap. ¹⁰Motong la Pailot iwete panga nen, “Nga yelei a lom be kuraua betanga kiau tiap nga? Ong i o lom galanga yau tiap, too? Au i gurana kiau ke be amalum yong a kula, inbe gurana kiau ke be awete a tipatotong lo kai palasingi kaini.”

¹¹Pailot iwete nen, motong la Yesu iraua betanga ki nen, “Kumata be Maro yo iyepe ete ni, in ikap gurana pong tiap nga, ngan o taukam gurana yo ke be kudada pok nga. Ngan nen le tool yo itarau la baem i, in noonoo ki mai san le illos noonoo yo kiong nga.”

¹²Ngan Pailot ilongo tina yo Yesu iwete nen nga, le nga ikapye be isere dada yo be imalum panga a ila ye i. Bong ngan di Yuda tina ngan koodi tootoo panga nen, “Tool yo iwete be ya taunu in iyei tool kuto mai pang tana i le imot i, in koi ke Sisa. Le kumata be kumalum pang tool in a ila nga, ngan ong in tool ke Sisa tiap.”

¹³Pailot ilongo tina yo di Yuda tiwete nen nga, le nga lo ipamulu Yesu a isi tana, inbe ya in sila iwur ye kookoowoo ke tool ke karatanga

^x **19:2** Sousoungu yo kooroonoo dook mata i, in dawa ben purupuru bolana.

betanga, ye ni atu yo tiweta ye Pat Somai Menmenngana i. (Ngan ni tani in ye di Ibru koodi ngan tiweta ye Gabata.) ¹⁴Ngan ye kene tani in lal kidi Yuda be tipare kaningi pang lal maiyoko kidi yo be lodi tut ye Paskimoolooningi Ke Maro ye i. Ngan ke ise a isolu kati kataunu kat ye so ben ke matana sangaul be ru oo. Motong la Pailot iwete pang di Yuda tina nen, “Kakamata, tool kuto mai tani yo matan kalang le imot i, in bi.”

¹⁵Bong ngan di Yuda tina koodi le mai nen, “Kakauu a ikoo! Kakauu a ikoo! Kupatota lo kai palasingi kaini a imata!”

Ngan koodi nen, le nga Pailot iyei ne, “Nga yelei, be apatoto tool kuto mai yo matan kalang le imot i, in ilo kai palasingi kaini, too?”

Motong la di tooltool maimai ke paroranga so pang Maro ngan tiraua betanga ki nen, “Am nga, tool sa mulu be iyei kuto mai a matan kalam, nga tiap, bong Sisa ya taleu.”

¹⁶Le nga Pailot imalum pang di a itara Yesu la di tooltool ki ke patokongo baedi be la tipatota lo kai palasingi kaini.

Tipatoto Yesu Lo Kai Palasingi Kaini

(Matiu 27:32-44; Maka 15:21-32; Luka 23:26-43)

Motong la di tooltool ke patokongo tina tikaua Yesu a tila. ¹⁷Ngan ya taunu ikooro kai palasingi ki, inbe tiyege malala mai a tidu ke diki, motong la tila pang ye ni atu yo tiwete ene ye Tool Kutono Ruruana i. (Ngan ni tani in ye di Ibru koodi nga, ngan tiweta ye Golgata). ¹⁸Tila ye ni tani, motong la tipatota le ipa ye di tooltool ru lapau a tilo kai palasingi kaini nga. Ngan le yaru tituku ye madini tina yo ru nga, inbe Yesu in ituku ke kataunu.

¹⁹Motong la Pailot iwete le tiwodo betanga pattu ilo ye siri, inbe tirauu lo kai palasingi kutono ke Yesu. Ngan betanga tina ngan iwete nen: YESU KE NASARET, Tool Kuto Mai Yo Matan Kala Di Yuda Le Imot I. ²⁰Ngan Pailot iwete le betanga tina ngan tiwodo le tiportak ye di Ibru le di Latin le di Girik koodi. Ngan ye ni tani yo tipatoto Yesu lo kai palasingi kaini ye i, in potai pang ye malala mai lapau. Le di tooltool ke Yuda alunu la man tikamata betanga tina ngan a tikinkati nga. ²¹Motong la di tooltool maimai ke paroranga so pang Maro ngan tila la tiwete pang Pailot nen, “Ai, nga yelei a kuwodo betanga ngo be ‘Tool Kuto Yo Matan Kala Di Yuda Le Imot,’ in nga? Bong be nen ngan kuwodo nen, ‘Tool I Iwete Be Ya In Tool Kuto Mai Yo Matan Kala Di Yuda Le Imot I.’”

²²Tiwete nen, motong la Pailot iraua betanga kidi nen, “Dookoot, soo betanga yo awete a tiwodo koot nga, ngan tiwodo oo.”

²³Ye kene tani in di tooltool ke patokongo tina ngan tipatoto Yesu lo kai palasingi kaini a imot, motong la tikap lonloningi ki a tipoto le iken ye budanga pai. Inbe di pai timalimi di ye so tina. Inbe tikaua sousoungu mooloo ke Yesu in lapau a tikamata ngan sousoungu ki tani in tikap touo

wam sa matana ki ki a tisaii ye tiap, bong wam ataleu la tisaii ye ke ete a ipa so le idu lopo i. ²⁴Le nga di tooltool ke patokongo tina ngan di tapdi tiwetewete nen, “Nga o ke be tasarraki tiap. Bong be nen ngan takatte madamada ngan ole madamada ipaposo sei tool yo be ikaua sousoungu i.”

Ngan dada yo tiyeii i, in le iyeie betanga tina yo iken ye Rau ke Maro nga, ngan le kanono pombe moolmool. Ngan betanga tina ngan iwete nen,

“Ole timalimi lonloningi kiau nga, a tikap pang di.

Inbe ole tikatte madamada a be nen ngan madamada ipaposo tool yo be ikaua sousoungu mooloo kiau i.”^y

Le dada i la di tooltool ke patokongo tiyeii i.

²⁵Ngan di garup pattu yo tikodo potai pang ye kai palasingi ke Yesu nga, ngan Yesu tinana, iye Yesu tinana kase, inbe Madia yo Kelopas rimana i, in iye Madia san yo ke malala mai Makdala i. ²⁶Ye kene tani in Yesu be matana nen, ngan ikamata tinana, inbe galiunu yo lono panga mai san i, in ikodo potai ye nga. Motong la iwete pang tinana nen, “Tinak, natum tamoto nain.” ²⁷Motong la iwete pang galiunu tani in nen, “Garup in ong tinam.” Le ye kene in galiunu tani, in imadit tina le ikaua Madia a yaru tilo rumu ki lo iye tiyepe a matan kala.

Yesu Imata

(Matiu 27:45-56; Maka 15:33-41; Luka 23:44-49)

²⁸Yesu in lon galanga nen, urata ki yo be iyei ngan imot oo, le nga iyei ne, “Au i moorookau.”^z Ngan betanga yo iwete nga, ngan le iyei betanga tina yo iken ye Rau ke Maro nga, ngan le kanono pombe moolmool.

²⁹Ngan bor atu yo ooroo wain surunu malingene iken ye i, in iken potai lapau. Le nga tikaua so ben punpun a tisilia du ye ooroo wain surunu tani, inbe tisuii ye pi kaini, motong la tislamii lo pang ye koonoo.

³⁰Yesu iyini touo wain malingene tina ngan kasin a imot, motong la iwete nen, “Imot oo.” Iwete nen le tina gurin maloi, inbe imooroon pattu leu le imata yege.

³¹Ngan ye ke tani in di Yuda be tipare kaningi pang lal maiyoko kidi ke sungunu yo be bongbongini ki ngan pombe i. Ngan nen le di Yuda lodi be tiyege di tooltool tina ngan bobodi sila tituku kai palasingi kaini ye lal kidi ke sungunu, nga tiap. Le nga tila pang ye Pailot be la titoru a be imalum nga, ngan la tiraukat di tooltool tol tina ngan kedi, a nen ngan be timmata nga, ngan tiyun bobodi isi tana. ³²Le nga tila titor ngan Pailot imalum, motong la di tooltool ke patokongo tina ngan tila la tiraukat tool tina ngan atu yo ituku kai palasingi kaini ke Yesu madini i, in kene. Motong la tila tiraukat san yo

^y 19:24 Rau ke Woungu 22:18 ^z 19:28 Rau ke Woungu 22:15; 69:21

ituku ke Yesu madini san, in kene lapau. ³³Bong ye kene yo tila ye Yesu nga, ngan tikamata tina yo imata koot nga, le nga tiraukat kene tiap. ³⁴Motong la di tooltool ke patokongo tina, ngan atu ikaua yu a ikurumbono Yesu madini ye. Ngan le pattu leu be rara ipa ye ran irara ye madini a isi. ³⁵(Ngan tool yo ikamata so nga i, in ya taunu la ikaua bingi ye i, a be nen ngan ang lapau katara lomim medana ye. Ngan betanga yo ikaua bingi ye nga, ngan moolmool. Inbe ya taunu lapau, lon galanga be betanga yo nga moolmool.) ³⁶Ngan so tina nga pombe nga, ngan le iyeie betanga atu yo iken ye Rau ke Maro i, in le kanono pombe moolmool. Ngan betanga tani in iwete nen, “Tiraukata turana siap.”^a ³⁷Inbe betanga san yo iken ye Rau ke Maro lapau, in iwete nen, “Di ngan ole matadi pang ye tool atu yo tikurumbono madini i.”^b

³⁸Ngan so tina ngan pombe a imot, motong la Yosep ke malala Arimatia in ila la itoro Pailot a be imalum ngan la ikaua Yesu bobono. Ngan Yosep tani in Yesu galiunu atu lapau, bong itattadai di Yuda le ya taun ipaposi la mallangana tiap. Le nga la itoro Pailot, ngan Pailot imalum panga, motong la ila la ikaua Yesu tani in bobono a ila. ³⁹Ngan Nikodimas, tool tani yo muku ngan ila ye Yesu bong la yaru tiwetewete i, in ya lapau iyei Yosep ene a yaru tila. Tila ngan ikap kai surunu yo tikaata ye kai ru yo edi mir inbe alos nga. Ngan kai surunu tina yo ikap nga, ngan mai le imoo dook.^c ⁴⁰Le nga yaru tikaua Yesu bobono a tila, motong la titi kai surunu tina ngan ilo ye tinini, inbe tipiuu ye wam kookoonoo le titoo momo kidi Yuda yo tiyei ye di tooltool matedi nga. ⁴¹Ngan ye ni tani yo tipatoto Yesu lo kai palasingi kaini ye i, in kumu atu iken potai pang ye lapau. Inbe kumu tani in tikaata agoro ke di matenge paunu atu ye, bong titar touo tool matene sa bobono ye tia. ⁴²Ye kene tani in di Yuda be tipare kaningi pang lal kidi ke sungunu. Ngan agoro tani ke tarungu di matenge i, in iken potai lapau. Le nga Yosep iye Nikodimas tikaua Yesu bobono la titaru ye agoro tani in.

Yesu Imadit Mulu Ye Ni Ke Matenge
(*Matiu 28:1-8; Maka 16:1-8; Luka 24:1-12*)

20 ¹Lal kidi Yuda ke sungunu in iman a ila, inbe ke san yo Sande i, in pombe. Ngan muntu bongmai koot todotodo go, inbe Madia ke Makdala in imadit tina ngan le ila pang ye agoro ke di matenge tani yo titara Yesu bobono ye i. Le nga ipa la pombe ngan ikamata pat yo tikatkala agoro tani in koonoo ye i, in tipulu a ikoo ye agoro koonoo oo. ²Ila ikamata nen nga, le nga idada a imulu a ila pang ye Simon Pita iye Yesu galiunu tani yo lono panga mai san i, in la iwete pang di yaru. Iyei ne, “Ona, tikaua Tool Mai bobono yo iken agoro lono ke di matenge in a tila oo. Le lomam galanga ye ni yo la titaru ye i, in tiap.”

^a 19:36 Pamulenge 12:46; Kinkatingi 9:12; Rau ke Woungu 34:20 ^b 19:37 Sakaria 12:10

^c 19:39 Ngan kai surunu tina, ngan moongoo ki ben 34 kilogram.

³Le nga Pita iye Yesu galiunu san tani in timadit a tidada a tila pang ye agoro ke di matenge tani be la tikamata. ⁴Yaru tidada gaongo a tila, bong ngan Yesu galiunu san tani in idada a illoso Pita le la pombe ye agoro tani in muku. ⁵Motong la itur, inbe ipakele pang agoro tani in lono, ngan ikamata wam tina yo tiduku Yesu bobono ye nga, ngan ikenen, bong ilo agoro lono tiap. ⁶Bong Simon Pita yo idada mur i, in ila tina ngan le ipa so a ilo agoro lono. Ngan ikamata wam tina ngan ikenen, ⁷inbe ikamata wam san yo tipui Yesu kutono ye i, in tilulu a titaru le iken kandor ye wam yo kapala nga. ⁸Motong la Yesu galiunu san tani yo idada a ila pombe muku ye agoro tani i, in ya lapau idewe a ilo agoro lono. Ngan ikamata so tina le itara lono medana be Yesu imadit moolmool. ⁹(Ye kene tani in yaru lodi galanga dook tiao ye betanga yo iken ye Rau ke Maro be Yesu ole imata lo ngan be imadit mulu, ngan tiap.) ¹⁰Motong la Yesu di galiunu ru tina ngan timulu a tila pang rumu kidi nga.

Yesu Pombe Pang Ye Madia Yo Ke Makdala I
(*Matiu 28:9-10; Maka 16:9-11*)

¹¹Di galiunu ru tina ngan timulu a tila, bong Madia yo ke Makdala i, in ikodo ke diki potai pang ye agoro ke di matenge tani, inbe itang. Le nga itangtang go, inbe itur a be ipakele lo pang agoro lono nga, ¹²ngan ikamata di bangabangana ru ke Maro. Ngan yaru wam kidi kookoonoo, inbe tiwur ye ni tani yo muku ngan titara Yesu bobono ye i. Le atu iwur ye ni yo Yesu kutono pang ye i, be san iwur ye ni yo Yesu kene pang ye i. ¹³Motong la di bangabangana ru tina ngan titoro Madia nen, “Garup, nga yelei a kutang nga?”

Le nga Madia iwete pang di nen, “Tikaua Tool Mai kiau bobono a tila oo, le nga lok galanga ye ni yo la titaru ye, in tiap.” ¹⁴Madia iwete nen, inbe iportak ngan ikamata Yesu yo ikododo nga. Bong ikamata ngan lon galanga ben ya in Yesu, ngan tiap. ¹⁵Motong la Yesu itoru nen, “Garup, nga yelei a kutang nga? Ngan kusere sei?”

Ngan iyeisa o tool yo matan kala kumu i, le nga iwete panga nen, “Tool mai, kumata be ong la kouu a kula in nga, ngan kuwete pau ye ni yo la kutaru ye i, a be nen ngan la akauu.”

¹⁶Iwete nen, motong la Yesu iwete panga nen, “Madia.”

Le nga be iportak pang ye ngan ikilla, motong la iwete panga ye di Ibru koodi nen, “Raboni!” (Ngan betanga yo Raboni in punu ben Pannoongoo.)

¹⁷Motong la Yesu iyei ne, “Kin man kutokau be, yesoo au i nga alo ye Tamak tiao. Bong kula ngan kuwete pang di diek kapala yo titara lodi medana pau nga, ngan nen, ‘Ole amulu a alo pang ete ye Tamak yo ang ngan Tamamim lapau i, inbe Maro kiau yo Maro kiang lapau i.’”

¹⁸Motong la Madia ke Makdala tani in ila la ikaua bingi pang Yesu di galiunu tina nen, “Ai, au i kamata Tool Mai tani oo!” Inbe iwete pang di ye betanga tina yo Yesu iwete panga ye nga.

Yesu Pombe Pang Ye Di Galiunu

(*Matiu 28:16-20; Maka 16:14-18; Luka 24:36-49*)

¹⁹Ye Sande tani in rrai ki nga, ngan Yesu di galiunu tina ngan titattadai di Yuda, le nga tilo rumu lono lo tigaua a tiyepe, inbe titiukala dada ke rumu tani a tipamede le imede. Ngan tiyepe, inbe Yesu pombe le lo ikodo kataunu kidi, inbe iyei ne, “Lo silene ke Maro iken yang.” ²⁰Iwete nen a imot, motong la ipatnai baene le madini tina ngan pang di a tikamata. Ngan tina tikamata Tool Mai tani nen nga, le tina lodi ponana le lodi ponana welewele.

²¹Motong la Yesu iwete pang di mulu nen, “Lo silene ke Maro iken yang. Tamak la iwangau a le asi i. Ngan le gaongo leu, nga be awangang a nen ngan kala.” ²²Yesu iwete nen a imot, motong la imai di ye amunu, inbe iyei ne, “Kakaua Maro Amunu Silene. ²³Kumata le be kagiri noonoo kidi tooltool nga, ngan ole noonoo kidi tina ngan ikoo ye di. Bong kumata be kagiri noonoo kidi tiap nga, ngan ole noonoo kidi tina ngan ikentoo di.”

Yesu Pombe Pang Ye Tomas

²⁴Ngan Tomas yo tikiui ene san ye Didimus i, in Yesu di galiunu tina yo sangaul be ru nga, ngan atu kidi. Ya in, ye kene yo Yesu lo pombe pang ye di galiunu tina ye in nga, ngan iyepe tiap. ²⁵Le nga Yesu di galiunu kapala tina tiwete panga nen, “Am nga amkamata Tool Mai tani oo.”

Bong ngan Tomas iyei ne, “Kumata le be akamata moonongoo ke tutui ye baene tiap, inbe atara baek buruburene ilo ye moonongoo ke tutui tina ngan tiap inbe ading touo moonongoo yo iken ke madini in tiap nga, ngan o ke be atara lok medana ye pitiap yege.”

²⁶Tomas iwete pang di nen, le nga tiyepe tiyepe a ke limi be ru iman a ila, motong la Yesu di galiunu tina ngan tigaua a tiyepe rumu lono mulu. Inbe Tomas tani in iye di tiyepe lapau. Ngan rumu tani yo tiyepe ye i, in dada ki ngan tipamede le imot, bong Yesu ilo le lo ikodo kataunu kidi, inbe iwete pang di nen, “Lo silene ke Maro iken yang.” ²⁷Motong la iwete pang Tomas nen, “Oo, kuman kutara baem buruburene me e ni. Inbe kumata baek nga. Inbe kusulmaia baem man, man kuding touo moonongoo yo iken ye madik i. Kin lom rru mulu be, bong kutara lom medana pau.”

²⁸Ngan tina Yesu iwete panga nen nga, le nga Tomas iyei ne, “Ong i Tool Mai kiau, inbe ong i Maro kiau.”

²⁹Motong la Yesu iwete panga nen, “Ong i kumatau, ngan la le kutara lom medana pau nga. Bong di tooltool yo tikamatau tiap, inbe titara lodi medana pau nga, ngan ole Maro iyei urata dook mata pang di le lodi ponana.”

Ye Punu Yo A Le Yowan Iwodo Rau I

³⁰Yesu iyei gogo mos alunu san ye di galiunu matadi a tikamata, bong awodo le imot a ilo ye rau i tiap. ³¹Bong betanga yo awodo ilo ye rau i

nga, ngan be nen a katara lomim medana pang Yesu be ya in Kirisi, tool yo Maro ipootoo be si ikap di tooltool ki a ipamulu di ye so dook tiap yo be igarung di i. Ngan ya in Maro Natunu. Le kumata be katara lomim medana panga nga, ngan ole kakaua yepongo dook mata yo taukan motingi i, in ye ya taunu ene.

Yesu Ipaposi Pang Di Galiunu Limi Be Ru

21 ¹Tiyepe a ke kapala iman a ila, motong la Yesu pombe mulu pang di galiunu tina, ngan potai pang ye ran koonoo Taibirias.^d Ngan dada yo pombe pang ye di i, in nen. ²Ye kene tani in Simon Pita iye Tomas, yo ene san Didimus i; inbe Nataniel ke malala Kana yo iken ye tana mai Galili i; inbe Sebedi di natunu tamoto ru nga, inbe Yesu di galiunu ru mulu la tigaua a tiyepe nga. ³Tiyepe, motong la Simon Pita iwete pang di nen, “Ai, au i nga ole du ayoosoo a akap i sa.”

Ngan di diene tina tiyei ne, “Am lapau, ole amyong tadu.” Le nga du tiyiri ye ookoo atu, a tidu. Bong ye bong tani in nga, ngan le tikap touo i siap yege. ⁴Le nga muntu bongmai koot, ngan Yesu di galiunu tina ngan tikamata yo ikododo tana nga, bong lodi galanga ben ya in Yesu, nga tiap.

⁵Motong la Yesu koonoo pang di nen, “Di tooltool kiau nga, kaua i sa lapau?”

Ngan tiraua betanga ki nen, “Tiap sa!” ⁶Le nga Yesu iwete pang di nen, “Be nen ngan kakatte pu kiang mulu isila ookoo madini ke aromim oonoo in, ngan ole kakap i.” Motong la tikatte pu tani in idu, ngan le i alunu welewele la lo titingi nga, le ke be tiyaua pu tani in a ise ookoo lono tiap.

⁷Motong la Yesu galiunu tani yo lono panga mai san i, in iwete pang Pita nen, “Ai, ni Tool Mai tani nani.” Ngan Simon Pita tani in idudu sousoungu ki, inbe iyei urata. Bong yeisa be ilongo yo ene san in iwete panga nen, “Ni Tool Mai tani nani,” motong le ikap taraia sousoungu ki tani a isousou ye mulu, inbe ipas du ran lono a iwe pang ye a idi. ⁸Inbe Yesu di galiunu kapala ngan tipie ye ookoo a titoo, inbe tiyolo pu tani in ipa ye i tina ngan a tidi pang tana. Yesoo, tidau manga mooloo ye tana tiap. ⁹Tidi tisolo tana, ngan tikamata ei garengana yo ikanen nga, inbe i atu ikenen ei tani in pono nga. Inbe ikamata porong pattu ikenen lapau.

¹⁰Motong la Yesu iwete pang di nen, “Kakap i yo nookoot kakap nga, ngan sa man.”

¹¹Yesu iwete nen, le nga Simon Pita du irookoo a ilo ookoo lono lo iyolo pu tani in a idi tana. Ngan pu tani in ipon ye i maimai leu, inbe i tina ngan alunu le alunu le kinkatingi ki ben 153, bong tikupraia pu tiap. ¹²Motong la Yesu iwete pang di nen, “Kaman a man kakan so.” Yesu

^d 21:1 Ngan ran Taibirias tani in tiwete ene san ye ran Galili.

iwete nen ngan le di galiunu tina ngan sa mala be itoru nen, “Ong i sei?” nga tiap, yesoo lodi galanga ye be ya in Tool Mai tani. ¹³Le nga Yesu ila la ikap porong tina ngan a ikap pang di, motong la ikaua i tani a ikauu pang di lapau. ¹⁴Ngan kene yo Yesu imata, motong imadit mulu ye in nga, ngan le pombe pang ye di galiunu paru oo, e patol nanga la nookoot ngan pombe pang ye di nga.

Yesu Iwete Pang Pita

¹⁵Ye kene tani in tikan so a imot, motong la Yesu iwete pang Simon Pita nen, “Simon, Yowan natunu, ong i lom pau mai san moolmool le kullos di diem nga, too?”

Ngan se Pita iyei ne, “E, Tool Mai. Ong i, lom galanga yau nen, au i lok pong mai san.”

Motong la Yesu iwete pang nen, “Kupakan di sipsip kiau.”

¹⁶Motong la Yesu iwete panga mulu nen, “Simon, Yowan natunu, ong i nga lom pau mai san moolmool, too?”

Ngan se Pita iyei ne, “E, Tool Mai. Ong i, lom galanga yau nen, au i lok pong mai san.”

Motong la Yesu iwete pang nen, “Matam kala di sipsip kiau.”

¹⁷Motong la Yesu iwete panga mulu nen le patol ki. Iyei ne, “Simon, Yowan natunu, ong i lom pau mai san, too?”

Yesu itoru nen le patol, le nga Pita lon moo ye betanga yo iyei ne, “Ong i lom pau mai san, too?” Motong la iwete pang Yesu nen, “Tool Mai, ong in lom galanga ye so nga le imot. Le lom galanga nen, au i lok pong mai san.”

Motong la Yesu iwete pang nen, “Kupakan di sipsip kiau. ¹⁸Awete pong moolmool nen, ye kene yo tinim paunu go nga, ngan ole ong taum kulonlon ye lonloningi kiong, inbe kupa pang ye ni yo lom be kula pang ye i. Bong ye kene yo be kuyei kolman ye in nga, ngan ole kuyitmaka baem pang ete, inbe tool san ilonlonong, lo ngan be irarong pang ye ni yo lom be kula pang ye tiap nga.” ¹⁹Ngan Yesu iwete pang Pita nen nga ikatte betanga ye soo dada yo be Pita imata ye i, a nen ngan iyeie Maro ene le ilo ete ke be di tooltool tipayiti ye i. Yesu iwete pang nen a imot, motong la iyei ne, “Kuman a man kutoo au.”

Betanga Ke Yesu Galiunu Yo Lono Panga Mai San I

²⁰Yesu iwete pang Pita nen a yaru tila, motong la Pita be ilalele, ngan ikamata Yesu galiunu tani yo lono panga mai san i, in itoo di yaru. Ya in tool tani yo tigaua a tikan so nga, ngan irusu le la itadana Yesu, inbe itoru mos leu nen, “Tool Mai, nga ole sei tool be itarong la di koi kiong baedi i?” ²¹Ye kene in Pita ikamata le nga itoro Yesu nen, “Tool Mai, nga ole yeiei ye tool i?”

²² Motong la Yesu iwete panga nen, “Kumata le lok be iyepe matana rerene nen le ilo ye lal yo be amulu a asi ye in nga, ngan ole yelei yong? Ong in kuman a kutoo au!” ²³ Yesu iwete nen le betanga tani in imasak kataunu ye di diene kapala yo titara lodi medana panga nga, ngan be galiunu tani in o ke be imata tiap. Bong ngan Yesu iwete touo betanga sa be tool tani in ole imata tiap, ngan tiap. Bong ngan iwete leu nen, “Kumata le lok be iyepe matana rerene nen le ilo ye lal yo be amulu a asi ye in nga, ngan ole yelei yong?”

²⁴ Le in Yesu galiunu tani yo iwetewete ye so tina yo ikamata nga, inbe iwodo betanga ki lo ye rau i. Le lod galanga nen, so yo iwetewete ye nga, ngan moolmool.

²⁵ Ngan so alunu san la Yesu iyei lapau nga. Bong kumata be tiwodo betanga ke so tina ngan atu atu le imot ilo ye rau nga, ngan ole tana mai kiidi le imot i taukan manga yo be tatar rau tina ngan ye i.